



**Bericht Von dem heyligen Abendmal, vn[d] dem einigen
Opffer vnnd Priesterthumb Christi, sampt etlichen anderen
notwendigen Puncten,**

<https://hdl.handle.net/1874/456803>

Verichte

Von dem heyligen Abendmal/vñ dem einigen Opffer vñnd Priesterthumb Christi/sampt etlichen andern notwendigen Puncten/ geschrieben etwan vor vierzig jaren/


Durch

NICOLAVM RENEY

SEN von Bensheim gewesenen
 Prediger zu Bischoffsheim/ies
 zund erst in druck auß
 gangen/

In der Churfürstlichen
 Stat Heydelberg/ durch
 Johannem Mayer.

1 5 6 3.



Dem Christlichen Leser
 gnad vñnd frid von Gott dem
 Vatter/durch vnsern Herrn vñnd
 Heyland Jesum Chris-
 tum.

S Christlicher lieber
 Leser/dieweil heutiges
 tags an vilē orten hin
 vñ wider so mancher-
 ley newe schriffte/von
 den Religions sachen/
 die jezunder in der Christliche kirchen
 streitig seind/in offnē druck außgehē/
 deren jähalt den mehrentheyl anders
 nichts ist/den ein vnchristlichs gefehr-
 tichs gezänck / mit allerley schmach
 vñ schandworten besfleckt/Damit ein
 jeder sein eygen rhum vñnd ehz/mit
 vndertruckūg / ja auch (wie es in sol-
 chem gezänck pflegt zu geschehen) mit
 verlust der warhent suchen.

Vñ aber durch solchs vilfältiges vñ vnrichtiges schreibē/etlicher derē newen Scribenten/der gemeyne mann den weg der warheit zu treffen/nicht allein je lenger je irziger vnd zweyfelhafftiger gemacht wird: sonder auch/da noch etliche gute alte Fußstapffen vñ anleitüg zu der warheit in schriff-ten gelehrter vñ gottseliger menner so vor etlicher zeit gelebt/fürhandē/wērdē im solche entweder mit list/ oder mit gewalt auß den henden vñ augen gerissē/ vñ vnder die banck gestossen.

Derhalben so haben wir/Christlicher guter wolmeynung/ auß liebe der Göttlichē warheit / vñ dieselbe nach vnserem besten vermögen helffen zu befürderen/etliche alte Schrifften in offnen druck wöllen lassen außgehen/ so etwa vor vierzig jaren vō dem gelehrten vñ gottseligen Man Nicolao Keneyssen von Benspheyen gewesen
 net

nen Kirchediener zu Bischoffshem
im Kraiggaw geschrieben sein wordē/
vnd vom Authore selbst zū truck ver-
fertiget / aber doch von wegen seines
tödlichen abgangs biß anher hinder-
bliben.

Darinn neben anderen Christlichen
guten/vñ diser zeit gar notwendigen
Lehren/ so dazumal (welches zuuer-
wunderen) in der dickē finsternuß des
Pabsthums so hell vnd klar getriben
sein worden/ auch zu sehē was Gott-
selige gelehrte vnd fromme leuth all-
hie in disen Landē/ vom heyligen A-
bēdmal des Herrn einfeltig auß Got-
tes wort gelehret vnd gehalten haben
ehe deñ man sich in dise weitleufftige
vnd langwirige Hader vnd gezänck
mit verbitterung der gemüter gegen
eynander hat eingelassen.

So du nun/ Christlicher lieber Les-
ser/ zu trost deines eigenen gewissens/
vnd

vnd versicherung deines heils vnd
 seligkeit/auff den rechtē grunde der
 Göttlichen warheit dises vnd ande-
 rer puncten halben/ begerest zukom-
 men: So lise mit fleiß was diser Gott
 selige Mann in disen Schrifftē vom
 ganzen handel gelehret hat.

Wollen aber hiemit niemands we-
 der auff gedachtes Herrn Nicolai
 Kenesēs/ noch einiges anderē men-
 schen lehr/ wie der Namē habē möcht/
 gewisen haben/ deñ allein so ferz die-
 selbige mit Gottes wort/ vñ den Ar-
 tickeln vnser alten/allgemeynen vñ
 vngewenffelten Christlichen Glau-
 bens (welche vns gleich als ein kurze
 vnd gewisse Richtschnur/von allen
 lehren zurtheilen/ fürgeschriben vñ
 gegeben seind/vbereinkommen: Sonder
 vns mit sampt allen Menschen/wie
 auch diser Authoz selbst thut/d' Christ-
 lichen vñ notwendigē Regel des heyl-
 ligen Augustini vnderwerffen.

Da

7.
Da er spricht:

Wir sollen nicht aller leuth schriff-
ten/ob sie gleich berümpft/ vnd keines
irthumbhs halbē verdecktig seind/der
heyligē schrift gleich haltē/ Also daß
wir meinen/es were den ehren die wir
inen schuldig sein/zu nahet/wen wir
etwas in jren büchern nit lobten vnd
annemen/die wir durch Gottes gnad
entweder selbst/oder auß andrer leuth
erinnerung befinden/daß sie etwan in
einem stück anderst hetten gehalten/
denn die warheit vermag. Also lise
ich der anderen Bücher/vnd also wil
ich auch daß die meine von anderen
gelesen werden/2c.

1. Thessal. 5.

Den Geist dempffet nicht/die weis-
sagung verachtet nicht/prüfet aber als
les/vnd das gute behaltet.

¶ üij

Faint, illegible text, likely bleed-through from the reverse side of the page. The text is arranged in approximately 15 horizontal lines, with some lines appearing to be part of a list or numbered entries. The characters are very light and difficult to discern against the aged paper background.

Antwort

Nicolaj Keneyßen / auff
 die Artickel / so auß seinen Pre-
 digen in der Epistel zu den Hebreern
 zusammen geplehet / vnnnd den Edlen
 Ernuesten / Johannen vnd Philip-
 sen von Helmstat seiner Herr-
 schafft zu Bischoffshem /
 wider ihn vorge-
 tragen sind.



Der Erst Artickel.

S Jelas Ken-
 enßen hat gesagt in
 seiner Predig / auff
 S. Steffans tag /
 Es sey kein Gott-
 loser Volck / denn Bischoff vnnnd
 A v Pfafz

Pfaffen / Vnd nachgähns zu andern
zeiten gesagt / Es sey kein Gottloser
volck / denn der Bapst vnnnd sein an-
hang.

Antwort:

Dieweil diser Artikel mit einem 2.
verzeichnet ist / achte ich er soll darinn
der erste sein / daß er vor den andern ab-
lein ein grösser ansehens hat / vñ die je-
nigen so Euangelischer warheyt noch
vnbericht / allein sehen auff ensserliche
weltprächtige heiligkeyt vñ fromkeyt
der vermeinten geistlichen / welche sie
fast groß achten / möge gleich im an-
fang des handels zu zorn vnd vnwillen
bewegen / vñ die sach verhasset mache
dermassen dz jr gemüter hernach von
aller warheyt zuhören abgewendt / vñ
die predig des heiligē Euangeli; nidere
gelegt werde / Dz ist meins bedünckens
die ursach / daß diser Artikel mit einem
2. verzeichnet / an das erst ort gestellet
ist: Darumb ich ihnen auch aller ersten
verantworten wil. Sage also / es möge
wol sein / daß ich solche wort / oder red
gleich / wie der Artikel anstrucke /
geredt

geredt habe/wil mich des nit entschül-
 digen. Aber one allē zweifel hab ich nit
 also ganz blossē wort geredt/wie es d̄
 Artikel vorgibt/meinē vnglimpff mit
 schwächworten zuheuffen: sonder mit
 mehr andern neben Worten / die es vil
 leicht zureden bewegt haben. Dañ das
 heilig Euangelion von den vier Euan-
 gelisten beschriben/zeiget vns durch vñ
 durch auß kein halßstariger/wid̄spen-
 stiger/boßhafftiger vñ gottloser volck
 an/den die Bischoff/hohēprieſter/geist-
 lichen/Phariseer vñ schrifftgelehrte zu
 Jerusalem/welche sich allwegē dersel-
 bigen zeit wider Christū den Herren ge-
 ſetzt sein wort vñ werck geschmecht/ge-
 leſtert/veracht. vñ in verfolgt habē biß
 in dē tod. Wo sich nu vnſere hohēprie-
 ſter vñ Schrifftweisen/es seyen gleich
 Papst/Bischoff/Pfaffen/Münch ic.
 Jenichē vergleichē in boßheyt/falsch-
 heyt/gleißnerey/leſterūg vñ verfolgūg
 des heiligē Euāgelij Jesu Christi (wie
 sie zum theil thun) So folget on alles
 widersprechen/das sie auch zu vnseren
 zeiten/

zeiten / wie jenigen / mehr denn alle andere menschen / die aller widerspenstigen / verkerresten / gottlosesten vñ schedlichsten menschen sind / die auff erdē lebē. Wir soll mā aber im nu thun so die warheit am tag ligt von solchē leuten / vñ irem vnchristlichen wesen: Sol man das Euangelion predigē vnd doch solchē leuth gar geschweigen? o nein / das kan nicht geschēhē / auß der vsach / daß ein Prediger des heiligē Euangelij / ist ein geistlicher hirt: Johā. 21. vñ 1. Petr. 5. Aber eines hirten ampt / steht fürnēlich in zweyen hauptstücken. Das erste / daß er die Schäflein auff gute Weyde treibe: Das ander / daß er ir wol hütē / vñ sie verwar für den Wölffen. Also ein Predigers fürnemst Ampt ist / daß er das volck getrewlich mit dē reynen vñ uerfālsten wort Gottes weise vñ lehre. Darumb Christus zu Petro sprach / Johan. am letzten Cap. Weyde meine Schaff / so du mich anderst lieb hast etc. Das ander / daß er das volck getrewlich warne für den falschē geistlichē wölffen

fen / die sich in Schaffskleydung / das
 ist / in falscher vñ gleiffender heiligkeyt
 fürstellen / vnd doch innerlich reiffende
 Wölff seyn. Matth. 7. die mit ihren
 wolffszänen der erdichtē vnchristlichē
 menschen lehren / sätzen vñ ordnun-
 gen / die Seelen zerreißen vnd ewig ver-
 derben. Matt. 15. Von denen auch der
 heilig Paulus sagt / Actor. 20. Da er die
 elcistē zu Epheso beschicket hat / sprach
 er vnder andern worten / Habet acht
 nun auff euch selbst / vnd auff die ganz-
 ze Herdt / vnder welche euch der hey-
 lig Geist gesezet hat zu Bischoffen zu
 weyden die Gemein Gottes / welche er
 durch sein eigē blut erworben hat / Denn
 das weiß ich / daß nach meinem Ab-
 scheid werdē vnder euch kōmen schwe-
 re Wölff / die der Herdt nicht verschonē
 werden. 2c. Matt. 7. An iren Früchten
 solt ihr sie erkennen / Denn ob sie sich
 schon Geistlich nennen / so sihet man
 doch kein frucht des Geists auß ihnen
 wachssen / sonder allein die frucht des
 fleisch. Galat. 5. Ehebruch / Zurerrey /
 Vnreia

vnreinigkeyt/ geilheyt/ abgötterey/ zall
 berey/ feindschafft/ hader/ eyffer/ zorn/
 zancf/ zwytracht/ Secten/ haß/ mord/
 fressen/ sauffen vnd dergleichen: solch
 werden das Reich Gottes nicht erben
 noch vil weniger werden sie ande leub
 den rechten weg zu der seeligkeyt lernen
 oder jemandes darzu helffen mögē/ wie
 ein groß ansehens sie gleich haben vor
 der Welt. Also mögen nun dise zwey
 hauptstück/ Lehren/ vñ Warnen/ nicht
 von eynander getrennet werden/ vñ
 seind einem jeglichē Prediger gleich als
 hoch von nöten / als einem Hirten das
 weyden vñ das hüten ist. Wo ein Hir
 te also eynfeltig were/ dz er allein nach
 guter Weyde trachten wolt/ vnd nicht
 auch sorg habē zu hüten für dē Wöl
 fen/ der were fürwar ein vnützer Hir
 vñ widerumb/ wo er allein wolt hüten
 für den wölffen/ vnd nicht auch trach
 ten nach guter Weyde/ der were aber
 mals kein nütz. Die zwey stück/ Weyde
 vnd hüten/ müssen stäts bey einander
 sein/ Dergleichē auch wo ein Prediger
 allein

allein nach guter predig wolt trachtē/
 vnd nicht auch darneben dz volck/das
 er mit rechter Euangelischer lehr vnder
 wisen hat/verhüten vñ warnen/für dē
 heiligscheinendē wölffē/erdichtē geist
 lichen vñ falschen propheten/die vñ
 einem geistlichen namen vnd heiligem
 schein/eigēnützigē/verfürische vñ vn-
 christliche lehr fürgebē/darzu mit irem
 ergerlichen bösen leben vñ Exempel in
 offenlicher that vil Seelē verderbē/ein
 solcher Prediger were auch kein nütz.
 Widerum̄ wo einer allein warnē wolt
 vnd anderst nichts predigen/denn von
 solchē schädlichen wölffischen volck/
 auff demselbigen stāts ligen zuplewē/
 der were aber kein nütz. Dise zwey stück
 müssen auch stāts beyeinander sein/
 nemlich lehren vñd ermahnen/wie
 das weyden vñ hüten. Was recht güt
 vñd Christlich ist / sol man fleissig
 lernen, für dem aber was vnrecht/ver-
 fürisch/böß vñd ergerlich ist/sol man
 das volck mit gleichem fleiß warnen/
 Sonst wo man nicht warnen solt/
 vnd die

vnd die Wölff mit irem namen nicht
 anzeygen / müßt man das Euangelion
 zū grossern theyl hinweg thū / nemlich
 an allē orten wo Christus vñ die Apo-
 steln von den falschē Propheten auch
 iren lehren vñ leben warnung thun
 vñ müßt es darvor haben / daß kein sol-
 che falschheyt mehr bey vns auff Er-
 were / auch kein solche warnung mehr
 vonnöten. Christus sagt aber / das vn-
 kraut werde vnder dem guten Weytz
 wachssen / biß zu der Ernde / Matt. 13.
 das ist / in der welt werdē die bösen vn-
 dern guten sein / biß an den Jüngsten
 tag. Darumb auch solche warnung
 wirdt von nöten sein / alle dise zeit biß
 zu des Herren zukunfft.

Will man aber nun nit dulden vnd
 auch nit gern hören / daß man von den
 falschē geistlichen Prelatē vñ Pfaffen
 sage / vnd das gemein Volck von irem
 vnchristlichen lehren vñ Gottlosen le-
 ben warne. So wehre man inen zuvor
 ire falschhe lehr vñ gottlos lebē / Den so
 wirdt es nicht mehr not sein / jemandes
 für

für inen zu warnen / oder viel von inen
 zureden: So lang aber ire falscheit vnd
 verkerte Bosheit (daran das gemein
 volck geergert wirdt) weret / darvon
 nicht abstellen wollen: Als lang ist
 auch vonnöten / daß man das Arme
 volck für inen warne / vnd den Euan-
 gelischen Text Mat. 7. Sehet euch für
 vor den falschen Propheten ꝛc. frey
 auff sie deute. Auch den Mat. 16. Hü-
 tet euch für dem sawerteig d̄ Phariseer
 vnd Saduceer. Dergleichen Mat. 24.
 Sehet euch für daß euch niemands ver-
 führe / dann es werden viel falscher Pro-
 pheten vñ Christen kommen in meinem
 Namen / mit falschen zeichen vnd wun-
 dern / vnd werden viel verführen / luget
 zu daß ir inen nicht glaubet: Denn sie be-
 rümen sich des namen Christi hoch /
 sie sitzen aber nicht auff dem stul Chris-
 ti (wie die schrifftgelehrten vnd Phari-
 seer auff dem stul Mosi sassen. Matth.
 23.) das ist / sie leren das Euangelion
 Jesu Christi nit / sonder gleich wie die
 hoffertigen ehrgeizigen vnd eigens-
 B nützige

nützige Phariseer zusammen bundē schwe-
 re vntregliche bürden / vnd sie dem
 volck auff den hals legeten / aber selbst
 mit keinem finger anregten : Also thun
 vnser Prelaten vnd Pfaffen auch die
 wir für die aller geistlichsten menschen
 haben / die wir Gnad Herz vnd meister
 heißen / oben an den tisch setzen. Das
 sind eben die / welche von dem glau-
 ben abgetreten sind / Tim. 4. vnd an-
 hangen den irrige geistern vñ lehren der
 Teufel die da verbietē ehelich zu werde
 vnd vnder einem keuschen schein / sind
 sie selbst die aller grōste hürer. Sie ver-
 bieten die speiß von Gott geschaffen /
 den glaubigen mit danck sagung zunies-
 sen / vnd sie selbst sindt die aller fressig-
 sten menschen / welche die grōste köpff
 vnd feyeste beuch haben / denen sie als
 lein dienen vnd für ire götter haben /
 Philip. 3. Vnd wirdt also in ihnen er-
 füllet / das auch Paulus zu den Juden
 sagt Rö. 2. Du lehrest andere vñ lehrest
 dich selbst nicht : du predigst man soll
 nicht stelen / vnd du stillst : Du sprichst
 man

man soll nicht ehebrechen / vnd du selbst
 brichest die ehe / dir greuelst für den ab-
 göttern / vñ du selbst raubest Gott was
 sein ist : du rümeest dich des gesetzes vnd
 schendest Gott durch vbertretung des
 gesetz / denn ewert halben wirdt der Na-
 me Gottes verlestert vnder den Heiden.
 Also lehren vnd gebieten vnser Pfaffen
 daß sie selbst nicht thun / sie schenden
 Christum durch vbertretung seines Hei-
 ligen Euangelij / vnd wird der Name
 Christi durch ir gotelöß vnd ergerlich
 leben / das sie öffentlich one alle scham
 für Gott vñ d welt führen / geschmecht
 vnd gelestert. Ire lehre vnd leben geben
 zeugnuß vber sie selbst / daß sie eigent-
 lich die falschen lehrer sind / von denen
 der heilig Petrus sagt 2. Pet. 2. Die da
 neben einführen verderbliche secten (viel
 orden / regeln / mancherley form vnd
 weiß Gott zu dienen / in sonderlichen
 stetten / kleidung / farben / Schwarz /
 Weiß / vnd Grawe. ꝛc. mit wahl der
 speiß vnd dergleichen / Aber alles on
 geist / glaubē vñ warheit / wie dan allein
 B ij Gott

Gott geeredt will sein / Johan. 4. vnd
 verleugnen den Herren der sie erkauft
 hat ꝛc. durch welche der weg der war-
 heit verlestert wirdt / vñ die durch geiz
 mit erdichten wortē an dem volck hand-
 tierent. ꝛc. die da wandelen nach dem
 fleisch in der lust der vnſauberkeit / vnd
 die herschafften verrachten (Sie wöllen
 keinē König / Fürstē od̄ weltlichē Herrē
 von Gott verordnet / vnd than sein / mit
 zoll / steuer / schatzung / beeth / zins /
 frondienst / vnd andere : sonder wöllen
 ganz frey sein / vnd Herren vber alle Her-
 ren / die doch aller menschen knecht sein
 solten) Sie sindt keck vñ dürstig (sagt
 Paulus) Sie halten hoch von in selbst /
 sie erzittern nicht die Maiesteten zu-
 stern. ꝛc. sie führen ein zartlichs leben /
 vñ achten das zeitlich lebē für wollust /
 zechen vnd zeren woll von ander leut
 gütern / sie fressen der Armen Widwē
 heusser vnder dem schein des langen ge-
 bets / Matth. 23. ire augen seind voll
 ehebruchs / sie halten mit hüren hauf /
 vnd ir sunden ist nicht zuweren. Es hat
 auch

auch der Heilig Paulus von solche leu-
 then geweissaget / 2. Timo. 3. In den
 letzten tagen werde gewliche zeitung
 eintreten / den es werden menschen sein /
 die von in selbst halten / geizig / stolz /
 hoffertig / lesterer / den Eltern unge-
 horsam (als Mönch / Nonnen in den
 Clöstern / sind auß dem gehorsam irer
 Eltern / vnder Apt vnd Aptissin gezwun-
 gen) vnd anckbar / ungeistlich / vn-
 freundlich / starrig / schender / vnkeusch /
 vngütig / wilt / verrether / freffeler /
 auffgeblasen / die den wollust lieber ha-
 ben den Gott / die da haben das geberd
 eines gottseligen wandels / aber sein
 Krafft verleugnen sie zc. Ein frommer
 Christ besehe vnd lese diese zwen Text
 Petri vnd Pauli an iren ortten selbst / vñ
 halt sie mit vleissigen vffmerckung ge-
 gen den gestifften vnsern geistlichen leu-
 then / darnach vrtheil er / so wirdt er
 ein wunderbarlichen grossen gewel an
 inen sehen / Nemlich ein sols verkertes
 leben vnd vnchristlichen wandel / die
 sich mit Gott od seinem wort / in keinen

weg vergleichen. Auch verfürlich vnd
 ergerlich sindt dem gemeinen armen
 volck/ vñ ganz verderblich. Solt man
 denn das Arme gemein Christen volck
 nit für solchen vnschambaffrigen/
 Argerlichen vñ gotslesterlichē mensche
 warnen/ die es verführen vnd verderben
 an leib vñ seel/ Nemlich wo es der Text
 des heilige Euangelij/ so noch ordnung
 gelesen wirdt/ erfordert? Ja one zweif-
 fellist es hoch vonnöten/ dz ein iglicher
 Prediger ernstlichē vleiß ankere an die-
 sem ort/ dieweil man öffentlich siehet/
 das die warheit des heiligen Euangelij
 also grimmiglich one vnderlass von irē
 verfolgte wirdt. Kan man es aber je
 stracks nicht leiden/das etwas von die-
 sen feindē des Euangelij vor dem volck
 in warnuß weiß geredt würde? So kan
 man auch dz Euangelion nicht leiden/
 welches den stäts die Christen one alles
 ansehen der personen für solchen leuten/
 iren lehren/ vñ ergerlichē leben warnet.
 Doch von irē ergerlichē leben hernach
 im 9. Artikel gemeldet wird. Beschließ
 also

also hiemit diesen Artickel / das ich inen
 Gestehe / aber dermassen wie daruon ge-
 redt / vnd nicht bloß wie er verzeichnet
 ist / sonder mit andern anhengenden
 schrifftten / die solches zu reden verur-
 sacht haben / damit das volck für den
 reiffenden wolffen zu warnen / hoff ich
 möge es auch vor allen guthertigen
 frommen Christen verantworten / daß
 ich daran nicht vnrecht gethan habe /
 auch forters nicht vnrecht daran thun
 werde / so offte vnd dick mir der ordent-
 lich Text daruon zu reden begegnet. Das
 Euangelion schmeichlet den halßstar-
 rigen verstockten Phariseern gar nicht:
 wer inen aber schmeichlen will / der ges-
 het neben dem Euangelio / 2c.

Der ander Artickel.

Keneysen hat auff mitwoch
 noch sanct Michels tag gesagt:
 Die leutte hoffen fast auff ein
 Concilium / sie sollen sich nichts
 daran keren.

B üij Dieser

Antwort.

Dieser Artickel ist verzeichnet mit
 einem B. darumb achte ich er sol
 der ander in der ordnung sein/
 dieweil er nach dem ersten das gröste an
 sehens hat vor den menschen / die des
 heiligen Euangelij vnbericht / viel vnd
 groß halten auff menschen satzungen/
 mit welchē man doch Gott vergeblich
 dienet / Mat. 15. Ich gestehe aber dies
 sen Artickel ganz wie er geschriebē / hab
 in auch mit viel mehr Worten vnd vleis
 siger angezogē / den er alhie beschrieben
 ist / vñ verhofflich hab es nicht vnchrist
 lich gethan / diewel mein pflicht erfor
 dert / das heilig Euangelion vnd den
 beständigen warhafftigen glauben in
 Jesum Christum zu predigen / welcher
 allein die warheit / der weg / vnd das
 leben ist / Joh. 14. in diese welt kom
 men / zu verkünden der Armen das wort
 göttlicher gnaden vnd barmhertzigkeit
 beschlossen in dem ewigen Concilio: vñ
 aber kein menschlich Concilium auff
 erden

erden immer besser sein noch werden
 mag (dieweil alle menschen lugner
 sein/ psal. 115. Rom. 3.) denn das
 göttlich Concilium ist / welches vns
 der Sohn Gottes die ewige göttliche
 warheit selbst verkündiget hat: hab ich
 dasselbig gnadenreich Concilium nem-
 lich das Euangelion Jesu Christi vber
 alle menschliche Concilia fürgezogen/
 als in welchem allein vnser heil vnd se-
 ligkeit begriffen ist / so wir im von her-
 zen anhangen vnd glauben. Den je vn-
 ser glaub/ nicht auff menschen vnd iren
 gutduncken / sonder auff Gott vnd sei-
 nem wort bestehen muß / 1. Co. 2. wol-
 len wir anderst selig werden. Welcher
 mensch dem Euangelio Christi glau-
 bet / der wird selig: Welcher aber dem
 selbigen nicht glaubet / vnd von hertzen
 anhanckt / der wird verdampft / Mar.
 16. Vnd mögen im alle Concilia sampt
 iren satzungen nit vmb ein lorber helf-
 fen. Ja was solten sie können helffen
 oder zum ewigen leben forderen / so sie
 doch ganz vnbestendig vnd offt fast
 B v gröblich

gröblich geirret haben / wie hoch sie
 sich gleich des heiligē Geists berümen.
 Es ligt je am tag vnd kan nicht geleug-
 net werden / daß sie viel satzungen für-
 geben / die öffentlich wider Gottes wort
 sind / auch so haben etliche Concilia
 viel ding bestetiget vnd für Christlich
 gehalten / welche andere nachfolgende
 Concilia widerum als vnchristlich ver-
 dampft haben. Darzu so ist der Conci-
 lien grosse handlung / damit sie bissher
 vmbgangen sind / von iren eignen per-
 sonen / hohe würdigkeiten / pfründen /
 Bistummen / vnd zeitlichen gütern.
 Aber fast wenig vom rechten glauben /
 liebe / vnd Christlichem leben. Ich be-
 zeuge mich vff ire eigene Bücher des
 geistlichen rechtens / die besehe man mit
 vleiß / so wird man der Concilien hand-
 lung öffentlich spüren / vnd begreiff-
 lich mercken / wo inen das hertz stecke /
 vnd was geists sie besessen habe / vff
 den der heilig Paulus gleich als mit ein-
 nem finger zeigt / 1. Timo. 4. Denn sie
 haben je die ehe vnd speiß verboten
 von

von Gott allen Christen erlaubt / dar-
 rumb sie (als Paulus darvon redet)
 von dem glauben abtrinnig / den irri-
 gen geistern vñ lehrē der Teufel sind an-
 hengig wordē. Was soll man sich dan
 ir verdrösten / oder vff sie harren vnd
 verlassen? Fürwar gar nichts / mā woll
 den gern verführet vnd mit lügen betro-
 gen sein. Dieweil jm nun also ist / vnd
 mit iren eygen Büchern Bezeuget mag
 werden / daß die Concilia irrig vnd ein-
 ander selbst widerwertig erfunden / mit
 Sannen vnd verdammen / darzu viel
 mehr vff ire eigene wort vnd werck trei-
 ben zu vergeblichem dienst Gottes / den
 vff Gottes wort / glauben vnd liebe des
 nechsten / in welchem allein ein Christ-
 lich leben zu ewiger seligkeit fürderlich
 begriffen ist: So hoffe ich / dieser Arti-
 ckel sey nicht vnchristlich von mir ge-
 prediget / damit das volck lerne seinen
 glauben nicht stellen vff menschliche
 lügen vnd irthumb: Sonder vff gött-
 liche warheit vnd gerechtigkeit.

Dem

Denn ein Rechter Christ muß in den
 glaubens sachen nicht irrem/ zweiffeln/
 oder vngewiß sein: Sonder er muß in
 seinē hertzen aller ding ganz versichert
 vnd gewiß sein/ im warhafftigen wort
 Gottes/ Heb. 11. sonst möchte er nicht
 selig werden. Solche sicherung mögen
 alle Concilia auff erden nicht leisten/
 sonder allein Gott/der sein warhafftigs
 krefftigs wort durch seinē heiligē Geist
 in vnser hertzen schreibt/ Jere. 31. Heb.
 8. Damit er vnsern geist versichert/ das
 wir Kinder vñ erben Gottes sein/ Rom.
 8. Die Concilia schreiben woll auff per-
 gament vnd papier was ir gutduncken
 sey: die warheit aber können sie in der
 menschen hertzen nicht schreiben/ noch
 viel weniger der gnaden Gottes vnd der
 ewigen seligkeit versichern mit iren er-
 dichten laruenwerckē. Darum beschließ
 lich darnon zureden / Sage ich also:
 Wan schon die ganze weldt zusamen
 keme in ein Concilium/ vnd etwas han-
 delt one/ oder wider Gottes wort (Als
 vor offft geschehen ist) was were es an-
 derst/

berst / denn ein grosser hauff vermaledeiten lugner / auff welche niemans sein vertrauen oder glauben stellen kan. Ja viel weniger denn auff die Engell / welche doch auch der heilig Geist als lugner vermaledeiet / wo es möglich were / daß einer vom himmel keme / vnd ein ander Euangelion leret / den schon der Sohne Gottes vnd seine Aposteln geleret vnd verkündiget haben. Gall. 1. Derhalben ich das gemein volck offte vnd dick gewarnet hab / vnd so mirs die materi in die handt gibt / so warne ich auch noch mit allem vleiß daß sich kein mensch auff Concilia vertragen sol / nemlich die nicht puer Gottes ehre vnd der menschen heil in Gottes wort suchen: sonder allein iren Pracht vnd eigen nutz. Denn die Concilia habē offte (wie vor gesagt) schädlich geirret außserhalbens Gottes wort: mögen auch noch (wo sie nicht Gottes wort für die handt nemen) verderblich irren vnd betriegen. So sich denn ein mensch daruff verließ / were er ewiglich verdäpft:

Gottes

Gottes wort aber kan weder irren noch
 liegen oder betriegen / vnd verheisset das
 ewig lebē allen gläubigen / ꝛc. Siebey
 hab ich nicht verworffen Christliche
 versamlungen die Gottes wort für au-
 gen haben / vnd allein nach demselbi-
 gen handeln. Denn Christus spricht
 Matth. 18. Wo zwen oder drey in mei-
 nem Namen versamlet sind / da bin ich
 mitten vnder inen. Es ist aber zusor-
 gen daß ein solches Concilium im Na-
 men Christi zu vnsern zeiten noch lang
 nicht zusammen komme. Darumb wol-
 cher mensch also döricht were / der dar-
 rauff wolt warten / vnd in mittler zeit
 seinen glauben vff die äbentewer lassen
 anstehn / biß dz inen ein Concilium vnt-
 derrichtet was er glauben solt / wo im
 dieweil der thodt vorkeme / daß er das
 Concilium nicht erlebte: der hat schon
 seine seligkeit vff äbentewer verspielt.
 Darum laß mā Concilia Concilia blei-
 ben / vnd halt sich allein an den Sohn
 Gottes / man höre denselbigen / wie
 die vätterliche stim vom himel lehret
 Matth.

Matth. 17. So mag vnß nicht misslingen / denn er hat vns das recht warhafftig vnd gnadenreich Concilium Gottes offentbaret in dieser welt / welcher mensche demselbigen glaubt / der wird selig. Was können vns andere menschliche Concilia darzu geben: fürwar nichts / darumb vff sie nichts zu hoffen ist. Laß diesen Artikel also fest vnd krefftig bleiben / wie er vffgezeichnet ist / vñ schememich auch gar nicht / daß ich inen geprediget habe.

Der drit Artikel.

Niclas Keneyssen hat gepredigt vnd gesagt / Christus sey daß einig Priestertumb / vnd bedörff keiner erneuerung durch mes insetzen.

Antwort.

Diesen Artikel hab ich also geredt auß gründe vñ Epistel zu den Hebrern am 7. 9. vñ 10. cap. Christus ist

ist aller Christen menschen einiger vnd
 ewiger hoher Priester / der sie nun vor
 seinem himlischen Vater ewiglich ver-
 tritt vnd versönet / hat auch ein einiger/
 vnbeslechts / reines / heiliges opffer für
 sie gethan einmal am Creutz / welches
 nun ewiglich gilt vnd alwegen krefftig
 ist für die sünden aller glaubigen auf-
 serwelten menschen. Darumb bedarff
 man nun keines andern newen zeitlichen
 vnd leiblichen Priesterthums sampt
 iren opffren / denn Christus hat das
 zeitlich vnd leiblich Priesterthum im
 gesetz Mosis einmal auffgehoben / vnd
 in im selbst geistlich vñ ewiglich ersetzt
 / hat kein anders leiblichs vnd zeiti-
 lichs Priesterthum im newen Testa-
 ment verordnet noch ingesetzt. Aber alle
 Christen menschen sind geistlich Pries-
 ter in Christo / 1. Pet. 2. Darzu hat er
 selbst sein opffer für der menschen sünd
 auff einmal außgericht / ganz vollkom-
 mentlich vnd genugsam / Heb. 10. Also
 daß kein and opffer mehr hinderstellig
 ist vor die sünde. Darumb bedarff man
 keines

Keines andern opffers mehr mit Mess
 lesen / vnd darzu mißbrauchen brot vñ
 wein des Herren Nachmals / die er
 doch selbst nicht geopffert hat / sonder
 den Jüngern zu essen vnd drincken ge-
 ben / vnd damit / in krafft des geglaub-
 ten worts / auch zu niesen seinen war-
 hafftigen leib vnd bludt / vnd solches
 Befolgen zuthun (nemlich zu essen vnd
 zu trincken nicht zu opffern) zu seiner ge-
 dechnuß / ja er kan von keinem men-
 schen mehr geopffert werden / denn er
 ist nun von den thoten auffstanden zu
 einem ewigen vnsterblichen leben / vnd
 wird hinfurter nit mehr sterben / der
 thode wirdt nicht mehr vber in her-
 schen / Rom. 6. Sie zu sage ich nun daß
 dieser Artickel / wie ich inen angezeigt /
 wird fest bestehen vnd war bleiben / so
 lang als die Epistel zu dē Hebreern war
 bleibt in irē rechten gesunden verstande
 one menschen zusatz. Welche Epistel
 auch vnser vermeinte geistlichen nicht
 verleugnen können / den sie sich dersel-
 bigen öffentlich gebrauchen mit singen
 C vnd

vnd lesen in jren Kirchenämptern /
 vff die selbige bezeug ich mich / nemlich
 vff das 7. cap. darin vndern andern
 worten / also schrifftlich geredt wird /
 daß Christus ein ewiger Priester vff
 Kommen sey / nicht nach dem gesetz des
 fleischlichen gebots / daß ist / nicht nach
 dem gesetz Mosi : sond nach der krafft
 des vnendlichen lebens / nach der ord-
 nung Melchisedech / der ein König zu
 Salem / das ist / Jerusalem beschrieben
 wird / one geschlecht / one Vater / one
 Mütter / one anfang vnd one endt sei-
 nes lebens / zu einer figur des Sohns
 Gottes / welcher Priester ist in ewigkeit /
 bestetiget durch den geschwornen Ayde
 Gottes / psal. 109. Der **HEER** hat ge-
 schworen vnd wird in nicht gerewen /
 daß ist / er wirdts nicht endern / Du bist
 Priester in ewigkeit nach der ordnung
 Melchisedech / welcher weder anfang
 noch endt hat in d schrifft. Also ist auch
 Christus ein ewiger Priester.

Der leiblichen Priester waren viel zu
 der zeit des gesetz Mosi / vñ mußten the
 viel darumb seyn / vñ je einer nach dem

andern können/ daß sie vergänglich vnd
 sterblich waren (wie noch heut bey tag
 unsere vermeinte Priester auch sterba-
 lich seind) Darzu selbst auch mit schwä-
 cheit d sünden beladen (wie vnscie Prie-
 ster auch ober die schwachheit d sünden
 mit verstockter bosheit beladen sind)
 mochte derhalb nichts vollkommen auß-
 richten: Aber Christus / darumb das er
 ewig bleibt / hat er ein vnvergänglich
 Priestertumb / daher er auch ewig selig
 mache kan/ die durch ihn zu Gott kom-
 men / Vñ lebt inmerdar vns zuwertretten
 (was bedöffen wir dā nun anderer zeit
 lichē vñ leiblichen Priester mehr?) dem
 ein solchen hohē Priester (sagt d Text)
 zimpt sich vns zu habē / d darvone heilig /
 vnschuldig / vnbefleckt / vñ d den sündern
 abgesondert / vñ höher worden den der
 himel ist (d3 zil ha: kein Pabst nach Bi-
 schoff se erlang:) dem nicht deglich noch
 were / wie ier: hohē Priestern im gesez /
 zu erst für seine eigne sünde opffer zu
 than / darnach für des volcks sünde
 (wie unsere Priester auch noch vermei-
 nen Christum im Sacrament täglich

für die sünde zu opffern) denn solches
 hat Christus gethan (vnd ist auch alle
 ein sein Ampt das keinem menschen zu
 thun gebürt) da er einmal sich selbst
 opfferte. Denn das gesetz setzt menschen
 zu hohen Priestern / die da schwachheit
 haben (dergleichen das Papstumb mit
 seinen erdichtē eydtsgenossen auch han-
 delt) das wort aber des eydts den der
 Herr nach dem gesetz geschworen hat /
 setzet den Sohn ewiglich. Also ist off-
 fenbar in außgetruckten Worten des
 selbigen > cap. zu den Hebreern / daß
 das gesetz Mosi vmb seiner schwachheit
 vnd vnnutz willen / durch Christum
 vffgehoben vñ verendert ist in das gna-
 denreich Euangelion / auch das zeit-
 lich vnd leiblich Priestertumb vmb sei-
 ner vnuolkommenheit willen vffgeho-
 ben vnd verendert ist / in ein ewigs vnd
 geistlichs Priesterthumb / das nun ewig
 weret in Christo / der sich gesetzt hat zu
 der Rechten des Stuls der Maiestet
 im himmel / Hebre. 8. vnd 10. Derglei-
 chen weret auch sein opffer ewiglich /
 welches

welches er einmal volkomlich vñ gnug
 sam für vnser sünde am Creutz geopf-
 fert hat / Hebre. 10. Daß also die rechten
 Christen menschen / forthin keines an-
 dern leiblichen Priesters mehr vff erden
 bedöffen / auch keines andern opffers
 mehr für ire sünde / dieweil das einig
 opffer Christi vff einmal geschehen /
 (als der Text lauth) ewig vollkommen
 ist für aller Christgleubigen menschen
 sünde. Die wort sindt je klar gnug /
 Hebre. 9. Vnd lassen sich nicht verber-
 gen noch verdunckeln also. Christus ist
 durch sein eigen bludt einmal in das heil-
 lig eingangen vnd hat ein ewige erlö-
 sung fundē / besehe dē Text wollfrömer
 Christ. Er spricht einmal / sagt auch /
 Ein ewige erlösung / merck was dz ist /
 vnd laß dir die wort durch menschliche
 behendigkeit nicht auß deinen augen
 reißen / oder verdunckeln. Ferrers / He-
 bre. am 10. Steht geschrieben: Christus
 da er hat ein opffer für die sünde geopf-
 fert das ewiglich gildt / ist er gefessen
 zur Rechten Gottes / vñ wartet hinfür

Biß daß seine feindt zum schemel seiner
 fuß gelegt werden. Denn mit einem opf-
 fer hat er vollendet in ewigkeit die gehei-
 ligten. das ist / er hat durch sein einiges
 opffer am Creutz / ewiglich bezalt die
 sünde aller frommen außerswelten Chri-
 sten / also daß sie nun forter / so lang
 die weldt steht / keines andern leiblichen
 Priesters oder sündopffers mehr be-
 dürffen. Folget im Text. Es bezeuget
 vns aber des auch der heilig Geist / He-
 re. 31. Denn nach dem er zuvor gesagt
 hat / das ist das Testament / das ich
 men machen will nach diessen tagen /
 spricht der **HER** / ich will meine ge-
 satz in ire hertzen geben / vnd in ire sinne
 will ich sie schreiben / vnd irer sünden
 vñ vngerechtigkeit will ich nicht mehr
 gedencken / Wo aber solche vergebung
 ist (wie wir den vergebung der sünden
 in vnserm heiligen glauben öffentlich
 bekennen) da ist nicht mehr opffer für
 die sünde / was bedarff man den der
 opfferenden Messen vnd Messleser.
 Fürwar nichts. Wan wir aber das ein-
 nig

nig vnd ewigwerende opffer Christi
 für die sünde noch mehr wöllē opffern/
 so schmehen wir Christum vnd sein
 ampt/ darzu verleugnen wir öffentlich
 diesen Artikel Christlichs glaubē/ Ver
 gebung oder nachlassung der sünde. Wen
 so lang vnd viel wir für die sünde noch
 opffern / als lang glauben wir auch
 nicht / das sie verziehen sey: So sie denn
 noch nicht verziehen were / so were auch
 Christus noch nicht gestorben / hette
 auch noch nicht sein blut vergossen zur
 vergebung der sünden / vnd were daß
 ganz newe Testament falsch. Siehe
 du frommer Christ / was für gotsleste
 rung auß dem Messopffern folget. Da
 rumb laß sich niemandt den gleiffen
 den schein betriegen / die warheit so
 sie erkant wird / schlecht in ganz zubo
 den. So aber die vernünfftweissen al
 hie woltē sagen: ja es ist war / Christus
 hat einmal durch sein opffer am Creutz
 die sünden vergeben: Aber nun fallen
 wir doch noch allezeit teglich widerum
 in die sünde / darum ist vns wider sol
 che tägliche sünde / ein täglichs opffer

vonnöten. Solches opffer thut man
 nun in der Mess/ da man Sacramenta-
 lich handelt den waren leib vnd blude
 Jesu Christi. Antwort: Gegen den täg-
 lichen sünden vnd täglichen opffern/
 setze ich die ewige vollendung vnd be-
 zalung des ewigen vnd ewigwerenden
 opffers Jesu Christi/ dardurch vff ein-
 mal volkömlich bezalet sind aller glau-
 bigen sünde / mit denen sie auß schwä-
 heyt vnd blödigkeit res fleisches belad-
 den sind gewesen/ von anfang d weldt
 her/ vnd jezundt nach der zeit beladen
 sind/ auch noch beladē werden bis zum
 ende der weldt. Solchen verstand treget
 warhafftig vff im dz wörtlein (ewig)
 welches das wort (täglich) nit erlei-
 den mag. Denn was täglich ist/ das
 ist auch zeitlich vnd nicht ewig: Einig
 vnd viel stehn nicht in einem stall/ der-
 gleichen auch ewig vnd täglich stimmen
 nit zusammen/ je eines muß dem andern
 entweichen. Sind die täglichen opffer
 gerecht/ dere etwan viel on zall alle tag
 geschehen in Tempeln/ Stifften/ Klö-
 stern/

stern/ vnd Clausen von den Meslesern
 den Priestern: So folget one widerred/
 daß das einig vnd ewig opffer Christi/
 muß vnrecht vnd falsch sein. Ist aber
 dieses gerecht vnd vollkommen wie die
 geschriffte sagt: So muß das täglich
 falsch sein/ sie können nicht beidts gleich
 gerecht sein / als wenig als weiß vnd
 schwarz ein farb seind. Zum Andern/
 Gegen dem Sacramentlichen opffer
 des leibs vnd bluts Christi/ Setze ich
 daß Testament Christi. Denn je Chri-
 stus die verzeihung der sünden / durch
 den thodt seines leibs / vnd vergießung
 seines bludts (welche beide er seinen Jün-
 gern im Nachtmal mit Brot vñ wein in
 krafft des glaubens an sein wort/ vber-
 geben hat zu essen vnd trincken zu seiner
 gedecknuß) Nennet ers ein New Te-
 stament / vnd nicht ein opffer. Er heist
 die Jünger auch essen vnd trincken /
 vnd heist sie nicht opffern. Besehe du
 frommer Christ / den Text vom Nach-
 mal Christi / Matth. 26. Mar. 14.
 Luc. 22. 1. Cor. 11. So wirstu die war-
 heit

heit selbst erkennen. Was vndernimpt
man sich dan / in den geschafften Chri-
sti etwas zuthun / das er nicht geheissen /
oder anderst zu machen / den wie er ver-
ordnet hat? Es sihet gar nahe einem
frenel ähnlich. Damit ich aber diesen Ar-
tikel endlich in einer summa beschließe:
Sage ich also / Christus hat das vnvol-
komlich gesetz Mosi / sampt dem leib-
lichen vñ zeitlichen Priestertumb / auch
seinen opfferen vffgehoben / vnd vff
sich selbst gezogen alle ding geistlich /
volkomlich vñ ewiglich außzurichten /
daß nun forter im Newē Testamēt bey
den Christen / keines besondern leibliche
Priesters / auch keines teglichen vnd
zeitliche sündtopffers mehr noth were.
Sonder daß alle Christen durch in vnd
in im one vnderscheidt der Personen /
geistliche Priester weren / nit an den fin-
geren gesalbet / sonder im hertzen durch
den heilige Geist / 1. Joh. 2. Zu opffern /
nich Christum (wie die vermeinten
Priester sich vermessen) sonder geist-
liche opffer / die Gott angemen sind
durch

durch Christum / 1. Petr. 2. Darzu der
 heilig Paulus auch ermanet Rom. 12.
 Ich ermane euch liebe brüder / durch
 die barmherzigkeit Gottes / daß ihr
 ewere leib begeben zum opffer / das da
 lebendig / heilig vnd Gott wolgefellig
 ist / welches ist ewer vernünfftiger Got
 tes dienst / ps. 50. Ein betrübtter Geist
 ist Gott ein opffer. Psal. 4. Opfferet
 Gott das opffer der gerechtigkeit vnd
 hoffet in den **HERREN** / Psal. 150.
 Ich werde dir vffopffern das opffer
 des lobes / Heb. 13. Die frucht der leffzen
 die da bekennen deinen Namen / 26.
 Welcher nun ein frommer Priester will
 sein im Newen Testament / der luge
 daß er ein frommer Christ sey / Man
 oder weib / vnd daß er seinen eygner
 leib täglich opffer / das ist / die bö
 sen fleischlichen lusten vnd begirden in
 im selbst erwurde vnd tödte / Coloss. 3.
 Sie nicht laß regieren / Rom. 6. das
 mit sie nicht in der theilhaftigkeit des
 einigen vnd ewigen opffers Christi be
 rauben vñ des ewigē thodts erwürgen /
 Rom. 8.

Rom. 8. Kein mensch kan Christū opffern / er hat sich selbst vff ein mal geopffert / das ist ewiglich gnug für die sünden / der mensch opffer sich auch nun selbst im glauben / so ist er ein rechter Christlicher Priester. Welcher sich aber selbst nicht opffern will / sonder vermeinet je Christum mit Messen zu opffern: ist zubeforgen er sey verruchtden Crentzigern Christi gleich / vnd eines Christlichen Priesters namen nicht würdig / es acht inen schon die welt war für sie wolle / das wort Gottes besteht vn̄ kan nicht fehlen: aber der welt vnd vernunfft vrtheil fehlet in allē göttliche sachen / 1. Cor. 2. Von dem Mess opffer wird auch hernach gesagt / im 5. Artickel.

Der viert Artickel.

A. Keneyssen hat gesagt / Gesatz heisse in Gottes wort glauben / Auch gesagt / man soll kein täglichen Priester haben.

Der

Antwort.

Der diesen Artikel verzeichnet
 hat / der hat mich entweder
 nicht recht verstanden: oder aber
 sich im schreiben vbersehen. Denn ich
 hab nicht also geredt / Gesetz heist in
 Gottes wort glauben: Sonder also hab
 ich geredt / Das gesetz halten vnd erfül-
 len / heist Gottes wort glauben / vnd den
 nächsten lieben / darzu dienen mir vn-
 der viel andern geschribten diese sprüch
 Rom. 10. Vom glauben: Christus ist
 des gesetz ende / daran rechtfertig wird
 wer da glaubet. Itē / Gal. 5. Ich bezeugē
 ein iglicher der sich beschneiden lest /
 daß er noch des ganze gesetz schuldig
 ist zuthun / ihz sind aber von Christo /
 wan ihz durchs gesetz rechtfertig wol-
 let werden / vnd habt der gnaden gese-
 let: wir aber warten im geist der hoff-
 nung daß wir durch den glauben recht-
 fertig seien / 7c. Von der liebe / Rom. 13.
 Gall. 5. Wer den anderen liebet / der
 hat das gesetz erfüllet / denn das gesagt
 ist /

ist / Du solt nicht ehebrechen / Du solt
 nicht thödtē / Du solt nicht stehlen / Du
 solt nicht falsche zeugnuß geben : das
 wird in dießem wort verfasst / Du solt
 deinen nechsten lieben als dich selbst.
 Die liebe thut dem nechsten nichts böß /
 So ist nū die liebe des gesetz erfüllung.
 8 Artikel ist kaum also viel rede werdt.
 Will man predig hören / so höre man
 recht darauff / vnd so man sie nach
 schreiben will / so sehe man wol dar
 auff / das man nicht ein x. für ein v.
 setze / denn es macht die zall baldt
 groß / vnd ist doch nicht viel sonst dar
 hinder. Was ist solches klitterschrei
 Bens vonnöten / vnd wer künnte zu lert
 solche klüttereij all gnugsam verant
 worten? Ich hab auch nicht geredt
 von täglichen Priestern / wie der Art
 ickellaudt : sonder von leiblichen vnd
 zeitlichen Priestern / wie oben im drit
 ten Artikel bekant ist. Hiemit sey
 es jertzundt gnug geant.
 wort vff das klüt
 terwerck.

Der fünfft Artickel.

Vff Sonntag nach der heilige
drey König tag / hat Nicolaß
Keneysen geprediget / vnd als
er vnder anderem der Priester
zu redt wart / gesagt: Er wölt
alle Priester gewarnet haben
Christum zu opffern wie bis-
her / den Christus were einmal
geopffert / vnd wer in wider-
umb opfferte: der hencft in vñ
thöt in. Vnd wo mēhalten gut
were / kint ers auch noch wol /
wo er aber wie bisher mēhala-
ten müst / wolte er ehe vmb das
sew ampt zuhüten bitten / wo
man ime es leien wolt. Vnd
sagt / wan man Ales helt / so
opffert man in wider / hencft
vnd

vnd thöt in / vnd stellet in in
 heussell vnd brenndt lichter dar
 für / das were wider gethöt.

Antwort.

Zwen puncten werden in diesem
 Artikel begriffen: Der erste / wen
 man Mess lese / nach der päbstli-
 chen Kirchen ordnung / so Creutzige
 man Christum widerumb. Der ander
 punct ist von insperrung des heiligen
 Sacraments in die heusslein oder mont-
 strants / &c.

Den ersten puncten zuglauben / be-
 wegt mich nicht meine eigene meinung
 sonder die heilige göttliche geschrieffe
 welche kein frommer Christ laugnen
 kan. Denn in dem dritten buch Mosi /
 da anfenglich vnd figurlicher weiß von
 den opffern des gesatz gehandelt wird
 fürnemlich aber von den Sönopffern
 vñ Brandtopffern der vnvernünftige
 thiern / welche auff Christum gedeutet
 haben / da heist das wörtlein (opffern)
 so viel

so viel als tödten / da man hat dieselben
 thier müssen würgen / tödten vnd
 ihr blut vergiessen / das volck damit
 besprennen zu eusserlicher vnd leiblicher
 reinigkeit / daß also keine vergebung der
 sünden geschehe nach dem gesetz one
 blut vergiessung / Heb. 9. Dasselbig
 opffern vnd tödten der thiern hat ge-
 deutet auff Christum / der ist auch er-
 würget vnd getödet worden / hat sein
 blut vergossen / da er sich am Creutz
 geopffert hat für die sünden / zu reinig-
 gen unsere seelen oder gewissen. Darnon
 haben wir ein klaren Text im Newen
 Testament / Heb. 9. So das blut der
 Ochsen vnd der Böck (dauon Leuit.
 16.) Vnd die Aschen von der Kuh ge-
 sprengt / (dauon Num. 19.) Heiliget
 die vnreinen zu der leiblichen reinigkeit:
 Wie viel mehr das blut Christi / der
 sich selbst one mackel durch den heili-
 gen Geist Gott geopffert hat / wird
 unsere gewissen reinigen von den todte
 wercken zu dienen dem lebendigen Gott.
 Auß dem versteht nun jederman klar
 D gnug /

gnug / was das wörlin (opffern)
 heist / soviel es hieher vff Christum die-
 net / vnd welches die Messprieſter in
 irem kleinen vnd grossen Canon brau-
 chen / Nemlich heist es schlachten wü-
 gen / tödten / vnd blut vergiessen / denn
 man must im alten Testament die un-
 vernünfftigen thier / so zu sündopffern
 gebraucht worden / tödten / vnd ihr
 blut vergiessen / Leni. 4. vnd andern
 nachuolgenden Capiteln. Aber im Ne-
 uen Testament / ist Christus selbst das
 sündopffer / Rom. 8.2. Cor. 5. Heb.
 4. Der ist auch getödt worden vnd hat
 sein blut vergossen für vns / Matth. 27.
 Mar. 15. Luc. 23. Johan. 19. Sol-
 ches ist einmal geschehen / vnd ist
 gnug für der welt sünde / Johan. 1.
 aller der die an in glauben. Denn er
 hat damit eine ewige erlösung funden /
 Hebre. 9. vnd in ewigkeit vollendet die
 geheiligten / das ist / alle Christen / von
 anfang biß zum ende der welt / hat
 er durch seinen todt dem Vater verfüh-
 ret vnd zu gnaden bracht / Hebre. 10.
 Rom. 5.

Rom. 5. Ist darnach widerumb vff
 erstanden zu einem vnsterblichen leben/
 Vnd kan forter nicht mehr sterben/
 Rom. 6. Wo aber solches sein einigs
 opffer / vff einmal geschehen / nicht
 gnug were / vnd müste noch offemals
 geopffert werden (wie in die ver-
 meinten geistliche Messleser sich ver-
 messen zu opfferen) so müst auch Chri-
 stus offtmals leiden vnd sterben / Heb.
 9. Da sehe nun ein frommer Christ zu/
 vnd hab acht daruff mit vleiß (denn
 je hie mit zuschimpffen ist) was mit
 diesem Messlesen geschicht / darinn
 man Christum im heiligen Sacra-
 ment vndersteht zuopffern one seinem
 beuel / vnd wider die Helle Clare
 geschriffte / welcher geschriffte so wie
 glauben wollen (wie Billich) gibts
 sie offentliche gezeugnuß / daß die
 Päbstliche Messleser vnd opfferer/
 anderst nichts thun / so viel an
 ihnen ist) denn daß sie Christum
 D ij widers

widerumb Creutzigen vnd tödten / der
 Text / Heb. 9. leß sich nicht verbergen /
 da also geschrieben steht : Set sich Chri-
 stus offemals sollen opffern / so hette
 er auch offemals müssen leiden von an-
 fang der welt her. Nun aber am ende
 der welt ist er einmal erschienen durch
 sein eigen opffer / die sünde vffzuheben.
 Mercke hie in diesem spruch / wie opf-
 fern vnd leiden gegen einander gesetzt
 sind / vnd für ein ding gebraucht wer-
 den. Darnach mercke wie Christus die
 sünde vffgehoben hat aller seiner auß-
 erwelten glaubigen durch sein eigen opf-
 fer / das er selbst vff einmal außgerich-
 tet hat / vnd wil sie nicht aller erst vffhe-
 ben durch der Pfaffen Sacramentisch
 opffer / welchs sie selbst erdicht haben
 in der Mess / damit sie ganz vermessen-
 lich handeln / &c. Darumb sie auch on-
 widerred / die verstockten menschen sind
 so von rechtem glauben entfallen / Heb.
 6. Die allen iren trost vnd hoffnung al-
 lein setzen vff ire eigene werck vnd gnu-
 g thun / vnd nicht in das einig leiden Jesu
 Christi /

Christi / die da nicht glauben / daß es
 zu dieser zeit mehr gelt / vnd noch kress-
 tig sey die sünden aller glaubigen auß-
 zutilgen biß zum ende der welt : Son-
 der faren zu / vnd opfferen in wider-
 umb für die sünde der glaubigen leben-
 digen vnd todten. Wo aber Christus
 geopffert wird / da wird er getödt (so
 viel am opfferer ist) vnd sein blut ver-
 gossen wie die heilige schrift anzeigt /
 vnd oben bewisen ist / Also Creuzigen
 sie widerumb inen selbst den Sohn
 Gottes vnd halten in für ein spot /
 Heb. 6. pfuch des Meslesens / iapfuch
 der grossen blindtheit / daß man die
 warheit nicht sehen / noch den gottlo-
 sen greuel erkennen will : Sie seind auch
 die mutwilligen sündler / Heb. 10. Das
 ist / sie sind die vnglaubigen die den
 bundt Gottes brechen. Denn Gott hat
 vns verheissen er woll vns durch seinen
 Sohn ein gnediger Gott sein / so wir
 allein an in glauben / daß er vnser Kö-
 nig vnd priester / mitler vñ fürsprecher
 sey. Solches glauben die Mesopfferer
 D iij nicht /

nicht / sonder mit irem täglichen opffer / schmehen vnd verachten sie das vollkommen vnd ewig Priestertumb Christi / sampt seinem einmal gethanen krefftigen vnd ewigwerenden opffer / nach welchem kein ander opffer hinderstellig ist / Hebre. 10. Das heist den Sohn Gottes mit füßen treten / das blut des Testaments vnrein machen / vnd den Geist der gnadenschenden. Was könnte doch gewlicheres von einem menschen geschehen: Vnd dieweil sie nun nicht glauben an das einig vollkommen vnd ewig Priestertumb Christi / vnd das sein einiges opffer ewiglich krefftig sey / zuuersehung aller glaubigen sünden / für welche er gnug gethan hat / Esai. 53. 1. Pet. 2. Rom. 3. Vnd 5. Ephes. 1. Colos. 2. 1. Johan. 2. Johan. 1. (Denn wo sie solches glaubten / würden sie in nit mehr vnderstehn zu opfferen / vnd ein neues opffer anrichten mit seinem brot vnd Kelch / das er doch nicht befolhen hat) Folget ons widere

widersprechlich / dass sie des **HEILIGEN**
REICHES Brot vnd Kelch vnwürdiglich
 essen vnd trincken zum gericht / vnd
 werden schuldig an dem leib vnd blut
 Christi / welches nichts anderst ist / dan
 Christum widerumb Creuzigen vnd
 tödtē so viel an inen ist / Ich geschweig
 alhie der grossen vnchristlichē auffmä
 schafft vnd Krämereyen / so vber alle
 Franckforter vñ Nürnbergger Messe /
 in diesen Pfäffischē opfferendē Messen
 in Judas Namen außgericht werden /
 Sie kostē vnaußsprechlich großgute vñ
 gelt / so man siehet vff der Stifften
 vnd Clöster Järlichsinkommens / ꝛc.
 Welches alles vff die Mess gericht ist.
 Darumb sage ich bey diesem ersten
 puncten / vnd glaube nach anzeigung
 der schufft / dass alle die jenigen /
 so Christum in der Mess vnderstehn
 zuopfferen : die tödten vnd Creuz
 zigen in widerumb / so viel an inen
 ist . Verhalben gerewets mich noch
 nicht / dass ich die vermeinten Pries
 ter von solchen opfferenden Messen
 D iij gewarnet

getrennet habe. Es soll mich auch (ob
 Gott will) nicht gerewen so ichs schon
 mehr thun würde / wo mir raum und
 platz geben wirt Gottes wort zuverkün-
 digen / dardurch forderlich Gottes ehr
 vnd der menschen heil gesucht soll wer-
 den. Des sero hütens halben (davon im
 Artickel gemeldet wirdt) sage ich also.
 Es were ja tausend mal. Ser es hütet
 einer der sero / denn daß er Christum
 opfferte vnd Creutziget / Ursach ist die
 wan etwan schon eine sawe von der
 herden verlorē / darumb er rede vnd an
 wort müste geben: So were er dennoch
 (wen es gleich fast böß würde) gegen
 den Bawern zuverthedigen vñ mit gelt
 zubezalen: So aber ein pfaff durch sein
 gotslesterlich opfferen / vnd vnwürdig
 ges handelen der heiligen Sacramen-
 ten / des warhafftigen leibs vnd Bluts
 Christi / sein seele verlore / das were für
 war gegen Gott in keinen weg zuverthe-
 digen / Es möchte auch der schade vnd
 verlust mit aller welt gut nicht wider-
 keret vnd bezalt werden. Denn was kan
 der

der mensch geben damit er seine seel er-
 löse? Matth. 16. Marc. 8. Luc. 9. Ist
 darumb nicht also gar vbel geredt was
 ich von serohirten gesagt hab. Es sind
 warlich viel pfaffen / die täglich Mess
 lesen / denen zu irem heil viel nützer we-
 re / daß sie der sewe hüteten : sie weren
 auch etwan viel geschickter darzu / denn
 daß sie des Armen volcks hirten sollen
 sein : Die sewe weide were inen besser be-
 kant / denn die Bibel vnd der seelen wei-
 de des worts Gottes. Es ist je nicht
 böß / ein serohirt zusein : Aber fast böß
 ist es / vnder einem geistlichen heiligen
 Namen / ein serwisch / schendlich / ver-
 ruchs vnd gotslesterlichs leben führen /
 dardurch viel leut geergret vnd besleckt
 werden / die billicher in exempel eines
 goteseligen wandels vnd Christlichen
 lebens gebessert würdē. Aber niemands
 sicht darauff wie man lehret vñ lebet /
 allein wan die Messen gehalten wer-
 den / so ist die sach schlecht / ob schon
 der pfaff ein geiziger / Abgötterer / Les-
 sterer / Zusaußer / Raßler / Spiler /
 D v O ffentz

Öffentlicher Hurer / vnd wucherer ist
 von Gott verbandt vnd verdampft / 1.
 Cor. 5. vnd 6. Das decket das Messige
 wandt mit seinem gemalten Creutz all
 zu / Vnd die zierlichen scheinēden falsch
 geistlichen Messgeberden verblenden die
 ganze welt / daß man es mit gesehen
 den augen nicht sihet wo der fuchs im
 garn ligt. Man helt ein solchē p fassen
 vmb der Messen willen die er liset / für
 gang geistlich vnd from / man helt in
 als einen Herren vnd gnadet im / vnd
 erneret in Reichlich darbey von der
 anderen Christen gütern / welche viel
 billicher vnd Christlicher geben wür
 den / nach des **HERREN** befelch /
 den Armen / Hungerigen / Durstigen /
 Nacketen / Trostlosen menschen / den
 armen Witwen vnd Waisen / die in
 armut vnd elend / in angst vnd not
 leben / das hat Christus geheissen : Mess
 lesen / vnd in im Sacrament opffer
 ren / hat er nirgent geheissen / mag
 auch im ganzen Newen Testament
 mit keinem Buchstaben bewiesen wer
 den /

den. Aber das sind die rechte vrtheil Gottes / die welt will vnd muß blinde sein / Johan. 14. in allen rechten vnd Göttlichen sachen (denn sie kan den Geist der warheit nicht empfangen) bis daß ihr die augen mit dem verdampften Reichen Man in der Pein geöffnet werden / Luc. 16. Das exempel ist vns nicht vergeblich fürgeschrieben. Wer augen hat zu sehen vnd Oren zu hören / der sehe vnd höre was im Gott zeitget vnd saget / will aber jemans mutwilliglich blind vnd daub sein : Das wird warlich mit seinem eigen vnd grossen schaden geschehen.

Der ander punct des fünfften Artikels / ist von dem einsperren des heiligen Sacraments in die heußlein vnd monstranzen / davon in dem siebenten Artikel hernach auch gemeldet wird / Da hab ich aber nicht geredt (inhalt des Artikels) daß Christus widerumb getödt werde / so man das heilig
 Sacra

Sacrament in heußlin oder monstranz
 Ben einperret vñ liechtlin dafür brenn
 net/ 7c. Sonder also hab ich geredt.
 Es sey ein öffentlicher mißbrauch wi
 der die erste einfaltige erstiftung vnd
 insetzung von Christo geschehen im letz
 ten Nachmal/da des insperres/liecht
 Kerzen vnd Ampel Brennens/Aniens/
 Bueckens/ vnd anbetens dafür/ auch
 des vmbhertragens in guldenen mon
 stranzē mit weltlichem pracht/ Pfeife
 fen/ Singen/ Klingen/ 7c. mit kei
 nem wort gedacht wirdt. Welches eite
 le zuseze/ eigene erdichte werck vñ men
 schen fünde sind / one Gottes wort/
 welches keinen zusatz nach abbruch lei
 den mag / man besehe Matth. am 26.
 Marc. 14. Luc. 22. Vnd den heiligen
 Paulum / 1. Cor. 11. An welchen orten
 von der insatzung des heiligen Sacra
 ments gehandelt wirdt. Den gleich als
 wenig Christus daselbst befolhen hat/
 seinen leib vnd bludt in brot vnd wein
 in Messen zuopffern: also hat er auch
 nicht befolhē dasselbig brot einzusperrē
 dafür

Darfür liechter zubrennen / zuneigen / zu
 beten / ꝛc. Sonder hat allein befolhen /
 daß man essen vnd trincken / vnd seines
 todes gedechtnuß darbey haben solle.
 Alles was darüber mit diesem Sacra-
 ment gehandelt wird / das ist nicht
 auß göttlicher insatzung vnd ordnung
 Christi / sonder auß freuentlichem fürne-
 men der menschen / denen gar nicht ge-
 bürt / mit dem heiligen Sacrament
 Christi anderst zuhandlen / abe oder zu
 thun / denn wie er selbst zuthun befol-
 hen hat / vnd wie es die Aposteln selbst
 gebrauchte / auch vns zubrauchen gele-
 ret haben. Wir können je nicht besser mei-
 ster sein denn Christus / die ewige gött-
 liche weißheit selbst ist / wir werden
 auch one allen zweiffell / nicht frömere
 Christen sein / denn die heiligen Apo-
 steln gewesen sind / welche sich solcher
 ding bey dem heiligen Sacrament nicht
 gebrauchte / derselbigen auch in iren ge-
 schriften mit keinem büchstaben ge-
 dacht haben / so sie doch göttliche ehr-
 zupforderen / fast vleißig gewesen seind.
 Vnd

Vnd ist wol zuglauben, hetten sie durch
 den empfangenen heiligen Geist erkant/
 das solche handlung / die wir törechte
 menschen / bey vnd mit dem heiligen
 Sacrament treiben / zu der ehre Gottes
 dienstlich were: sie hetten gewisslich
 zuleren vnd zubeschreiben / als getrewe
 diener vnd Apostel Christi / nicht ver-
 lassen / aber sie haben solches gar
 nicht gedacht. Damit ich aber den miß-
 brauch vom einsperren des heiligen Sa-
 craments (dauon ich geredt habe) offe-
 fentlich beweiße: neme ich das zu einem
 gewissen vñ vnleugbarē festen grundt/
 das Christus nicht bloß vnd stillschwei-
 gend seinen Jüngern das brot vnd den
 Kelch dargereicht hat: Sonder mit sol-
 chen worten: Nemet hin vnd esset/
 das ist mein leib der für euch gegeben
 wirdt. Nemet hin vñ trincket alle das
 rauf / das ist d̄ Kelch / zc. Welche wort
 sampt den Sacramentlichē zeichen des
 brots vñ weins / das recht warhafftig
 Sacrament sind / dardurch der mensch
 im glauben (nit an das brot vñ wein
 sonder

sonder des worts / welches des leibs vñ
 bluts Christi meldung thut) gespeiset/
 getrencket / vnd erneret wird an der seele
 zum ewigen leben. Der leiblich mund /
 entfahet vnd fasset brot vnd wein:
 Aber der geistlich mund / das ist / der
 glaube / entfahet vnd fasset das wort
 Gottes / von dem getödteten leib vnd ver
 gossen blut Christi zu verzeihung der
 sünden / damit die seele gespeiset vnd
 getrencket wird zum leben / Deut. 8.
 Matth. 4. Der mensch wird nicht
 von dem brot allein leben / sonder
 von einem iglichen wort / das durch
 den mund Gottes gehet. Johan. 6.
 Die wort die ich rede sind Geist vnd le
 ben / ec. Auch sagt Petrus dasselbig /
 Du hast wort des ewigen lebens. Vnd
 von im selbst sagt Christus / das ist das
 brot / das vom himel komen ist / wer
 dauon isset / dz ist / wer in mich glaubet
 (wie er den das essen in demselbigem
 Capitel auslegt) der wird leben in
 ewigkeit. Darzu stimbt auch das geist
 lich Recht / De Cöse. distin. 2. Cano. ut quid. etc.

Sprichs

Spricht der heilig Augustinus / Was be-
 reitestu die zeh'n vnd den Bauch / glaub
 so hastu gessen / den welcher an in glaub
 bes der ist in. Auß dem erzwingt sich
 one widersprechlich / daß in dem Rech-
 ten Christlichen Brauch dieses heiligen
 Sacraments / die Sacramentlichen
 zeichen / vnd das mündtlich essen / der-
 gleichen auch das wort Gottes / vnd der
 glaube beyeinander müssen sein / vnd
 Keins von dem andern kan abgesondert
 werden / Das brot ist eine Creatur / vn-
 kan die seel nicht speissen / Kompt auch
 nicht darzu : Sonder das geglaubte
 wort Gottes vom leib Christi mit wel-
 chem wort das brot gereicht wird /
 ist ire speise. Dergleichen das geglaubte
 wort Gottes vom vergossen blut Chri-
 sti für vnser sünden / mit welcher wort
 der tranck des Kelchs gereicht wird /
 ist ir tranck vnd erquickung / vnd ist
 nicht möglich daß eine andere Creatur
 auff erden dasselbig wort Gottes möge
 fassen denn allein die seel / vnd der glaub
 des hertzens / kein steinen heufflein oder
 guldene

guldene monstranzen / es ist viel zu hoch vnd zu Edel daß es von anderen Creaturen möge begriffen werden. Darumb auch in allen Gorts Worten / der glaub vñ die lieb des hertzens erfordert werden / die das wort fassen mögen / es laßt sich sonst in keinen weg gefangen nemen / oder inschliessen / allein ein gläubigs hertz vnd ein hungerige seel / die da hunger vnd durst hat nach der gerechtigkeit / ist sein rechte monstranzen vnd heußlein / wie ich dan geredt hab vnd der Artikel anzeiget. Das wird bewisen auß dem wort Gottes Johan. 6. sagt Christus: Welcher mein fleisch isset vnd mein blut drincket / das ist / welcher in mich glaubet / wie vor angezeiget / der bleibet in mir vnd ich in im vnd hat das ewig leben. Merck alhie mit vleiß / Christus sagt / er bleibet in mir vnd ich in im / nicht im heußlein oder monstranzen.

In der Andern Epistel zu den Corin. am / 13. Cap. sagt Paulus: Bewered euch selbst / ob ihr im glauben seiet / er-

E Kennet

Kennt ihr euch selbst nicht / daß Christus
 in euch ist. Merck abermals / Paulus
 sagt in Euch / nicht im heußlein.

In der Epistel zu den Ephesern / am
 3. Cap. sagt Paulus. Ich beuge meine
 Knie gegen dem Vater unsers HERRN
 Jesu Christi / daß er euch gebe nach dem
 Reichthumb seiner herligkeit / mit krafft
 starck zu werden durch seinen Geist an
 dem inwendigen menschen / vnd Chri-
 stum zu wonē durch den glaubē in ewe-
 rem hertzen. Er spricht deutlich in ewe-
 rem hertzen / vnd nicht im heußlein oder
 monstranzen. In den geschichten der
 Apostell haben wir ein vnuberwindlich-
 chen spruch am / 7. Cap. darüber auch
 die Juden / vff ein zeit / mit bitterem
 hertzen gegrieffgrammet / vnd den heil-
 ligen Steffanum erwürget haben da
 er ire falsche zuuersicht straffet / die sie
 vff irem Tempell zu Jerusalem bet-
 ten / saget ihnen wie Esaie am / 66.
 Geschrieben ist: Der allerhöhest wo-
 net nicht in Tempeln die mit henden
 gemacht sind / denn er sagt / der himmel
 ist

ist mein stul / vnd die erde ein schemel
 meiner füß / was wolt ihē mir den für
 ein hauß barren / spricht der **HERR** /
 oder welches ist die stadt meiner Ruhe?
 Hat nicht mein hād das alles gemacht?
 vff welche soll ich sehen den allein vff
 den armen eines zerbrochenen Geists /
 vnd der da fürchtet meine wort: zc.
Merck hie mit ganzem vleiß / was
 möcht doch klerers geredt werden / den
 wie der heilig prophet **Esaias** vnd
Steffanus sagen: Der aller höhest wo-
 net nit in steinen vnd hölzernen Tem-
 peln die mit henden gemacht sind / So
 wird er fürwar noch viel weniger wo-
 nen in steinen heußlein oder guldenen
 monstranzen / zc. Nun ist aber **Chri-**
stus der aller höhest vnd des allerhöch-
sten Gottes Sohn / Luc. 1. Ein warer
 Natürlicher Gott vnd mensch in ei-
 nigkeit der Person / welche zwo Na-
 tur / göttlich vñ menschlich / in die Per-
 son **Christi** also vereiniget sind / daß
 sie nun ewiglich von einander nicht
 zertrennet noch geteilet mögen werden.

E ij Vnd

Vnd dieweil nun Christus als ein wa-
 rer Gott/nicht in Tempeln wonen will
 die mit henden gemacht sind (wie der
 spruch oben Act. 7. anzeigt) so wird er
 auch nicht allein nach menschlicher na-
 tur darinnen wonen/vñ also noch viel
 weniger wird er in heußlein oder mon-
 stranzen wonen/sonder allein in eines
 glaubigen menschen hertzen / der da ist
 eines zerbrochenen Geists vnd der seine
 wort fürchtet/demselbigen mit hertzi-
 chem glauben anhangt / der ist ein wa-
 rer Tempell Gottes / 1. Cor. 3. darin er
 seine wohnung machen will / Johan. 14.
 Also wird entweder Christus nicht im
 heußlein sein müssen / oder die geschuffte
 muß erlogen sein. Ich lere mich an kein
 glosierens / der Text ist Clar gnug.

Auß dem wird nun der mißbrauch in
 der insperrung dieses heiligen Sacra-
 ments öffentlich erkant. Denn das göt-
 lich wort (welches des leibs vnd bluds
 Christi meldung thut/damit die glau-
 bigen hertzen warhafftiglich gespeisset
 vnd

vnd getrencket werden) leffet sich nicht
 inschliessen noch gefangen legen. Es
 leßt sich auch nicht in henden haben od
 tragen/ allein ein glaubiges hertz fasset
 es/ beschleuffet in sich warhafftig alles
 was es verheißt. Wan mā nun das brot
 insperret in die heußlein vnd monstran-
 gen/ vnd vermeinet Christum zugegen
 sein im heußlein/ das ist wider die helle
 öffentliche geschriffte vnd wort Gottes.
 Darumb wer es also anbettet / der kan
 sich der abgötterey nicht entschuldigen.
 Man soll je allein Gott vnd keine Crea-
 tur anbetten: nun ist aber brot ein Crea-
 tur/ dauon wir nicht lesen dafes auch
 die Aposteln je oder je angebettet haben.
 Spricht man aber: Die handlung des
 Nachtmals Christi in that vnd worten
 ist von den Euangelisten beschrieben/
 dauon keinem frommen Christen men-
 schen zimpt oder gebürt abzutretten
 vmb ein har breidt/ Da hat aber Chri-
 stus das brot in seine hende genommen/
 vnd alser seinem Vater gedancket hette/
 hat ers gebrochen vnd seinen Jüngern
 E ij dara

dartzereicht / vnd gesprochen: Nemet
 hin vnd esset / das ist mein leib der für
 euch gegeben wird / Das ist je teutsch
 gnung geredt von dem brot / daß es der
 leib Christi sey. Dieweil nun Christus
 diß Nachtmal seinen Jüngern sampt
 allen Christen bevolhen hat in seiner ge-
 dechtnuß zuhalten / vnd so aber solches
 Nachtmal gehaltē wird / da diese wort
 Christi vber das brot gesprochen wer-
 den (das ist mein leib) mage es nicht
 felen / das brot ist jetzundt der warhaff-
 tig leib Christi vnd bleibt auch derselbig
 leib / mā stell in gleich ins heußlein oder
 monstranzē / den je Gottes wort nicht
 liegen noch iriegen mögen / ꝛc.

Antwort.

SUm ersten / Christus hat seinē Jün-
 gern sampt den andern Christen
 befolhen / daß sie in seinem Nach-
 mal sollen essen vñ trincken von seinem
 brot vnd kelch / vnd dieselbigen gar
 nicht inschliessen od in heußlein behal-
 ten / Der Text ist klar / er spricht: Nemet
 hin

hin vnd esset / nemet hin vnd trincket
 alle darauß / 2c. vñ thut das zu meiner
 gedechtnuß / Sagt nicht / nemet hin vñ
 stellet's hin in ein heußlein oder mon-
 stranzen / es bedarff hie nicht viel wort /
 2c. Zum andern sage ich also / Es kan
 bey keinem Euangelisten / noch bey dem
 Heiligen Paulo bewisen werden / daß
 Christus diese wort (das ist mein leib)
 vber das brot gesprochen habe / oder
 sie auch seinen Jüngern darüber zuspre-
 chen befolhen hab (wie sie dan die
 Bapstler pfaffen darüber gleich als
 einen segen hauchen) Er hat sie auch
 nicht zu dem brot oder vmb des brots
 willen gesprochen / dieweil es ein vn-
 empfindliche Creatur war / wiewol
 er vff das brot Sacramentlicher weiß
 gedeutet hat : sonder hat sie geredt zu
 den Jüngern vnd vmb der Jüngern
 willen / damit die gedechtnuß seines
 leidens vnd sterbens bey inen vnd al-
 len nachfolgenden Christen vffzurich-
 ten / zu denen vnd vmb deren wil-
 len sie auch noch gesprochen werden /

¶ iij so offte

so offte man das Nachtmal Christi
 helt / vnd gar nicht vber das brot / auch
 nicht zu dem brot / oder vmb des brots
 willen / aber doch in gegenwertigkeit
 des brots. Vnd ist gewiß (dieweil Got
 tes wort nicht liegen kan) daß die heil
 gen Jünger Christi (wie es auch noch
 bey allen Christen geschicht / so offte diß
 Nachtmal gehalten wird biß zum ende
 der welt) durch den glaubē des worts /
 sampt der enepfahung brots vñ weins /
 den waren leib vnd blut Christi nach al
 ler krafft seines leidens vnd sterbens zu
 einer speiß vñ tranck der seelen warhaff
 tig in ire hertzen geschlossen haben. Vñ
 nicht allein durch das eusserlich mündt
 lich essen vnd trincken des brots vnd
 weins / welche allein gedenckzeichen
 seind des warhafftigen innerlichen vñ
 geistlichen essens vnd trinckens durch
 den glauben im hertzen / vmb welches
 geistlichen essens willen / das eusserlich
 vnd leiblich gebraucht wirt / als ein
 vbung von Christo selbst verordnet vñ
 eingesetzt / inhalts seiner wort / So offte
 ih:

ihu das thut / solt jr mein darbey gedens
 chen / das ist / wie Paulus sagt / 1. Cor.
 11. So offte ihu von diesem brot esset /
 vnd von diesem kelch trincket / solt ihu
 des **HERREN** tod verkünden / bis
 das er kompt / Dis Nachtmal soll aller
 Christen menschen vbung sein in der ge-
 dechnuß des leidens vnd sterbens Chri-
 sti / so lang als die welt steht / vnd bis
 an den jüngsten tag / da er sichebarlich
 widerkommen wirt zu richten die leben-
 digen vñ die todten. Alhie soll man auch
 woll mercken / daß der heilig Paulus
 in seiner einfaltigen vnd ganz Christ-
 lichē verclerung des Nachtmals Chri-
 sti / die eusserliche speiß vnd dranc /
 noch alwegen nennet des **HERREN**
 brot vnd kelch / vff daß wir im brauch
 des Nachtmals alles zweiffels entladē
 weren / vnd nicht gedencen solten / daß
 wir allein durch das leiblich essen vnd
 trincken des brots vnd des weins / den
 leib vnd blut Christi niessen : Sonder
 viel mehr durch das geistlich essen vnd
 trincken / das ist / durch den glauben der
 E v wort

wort Christi / so er bey Brot vnd wein
 von seinem leib vñ blut geredt hat / nief-
 sen / wie sie vff beiden seiten leiblich Brot
 vnd wein / geistlich aber den waren leib
 vñ blut Christi zum ewigen leben. Wan
 wir aber des **HERREN** Brot vñ wein
 leiblich essen vnd trincken / one das geis-
 tlich essen vnd trincken / das ist / one
 glauben der wort Christi (welches der
 heilig Paulus heist vnwürdig essen vñ
 trincken) so werden wir schuldig an
 dem leib vnd blut Christi / wir essen
 vnd trincken vns selbst das vrtheil / des
 tods vnd ewigen verdammuß / dar-
 rumb daß wir vns im Nachtmal Chri-
 sti fürstellen / anzeigen vnd bezengen
 als Christen menschen für den andern
 vnd doch im hertzen nicht Christen
 sind / weder Christum noch sein heili-
 ges Euangelion erkennen / glauben o-
 der annemen / vnd also mit verstock-
 tem vnglauben des **HERREN** wort
 werck vnd ordnung in diesem Nachtmal
 schmehen / verachten vñ verlestern.
 Das heist vnwürdig essen vnd trincken
 von

Von des **HERREN** Brot vnd Kelch/
welche vnwürdigkeit einen menschen
schuldig macht an dem leib vnd blut
Christi / Denn durch den vnglauben
bleibt er in seinen sünden stecken / vmb
welcher willen Christus seinen leib in
den tod gegeben / vnd sein blut vergos-
sen hat / vnd so viel an jm ist / Creu-
ziget er Christum nach stes für vnd für
mit seinen sünden / Das ist die schuldt
vnd das schuldig werden / welchen des
vrtail des ewigen tods nachfolget.

Zum dritten sage ich also / Das ist ge-
wiß vnd war / mag auch in keinen weg
felen / wan das wort Gottes / wie
sich gebürt / im Nachtmal Christi zu
dem brot kompt / so ist es wol nicht ein
schlechts blosses brot / wie ein ander ge-
mein brot / im ofen gebacken / das
man daheim vff dem disch für den
hunger des bauchs isset: Sonder es ist
ein herlichs vnd heiligs brot Gottes /
vnd wan es in seinem rechten branch
ist / nach der ordnung Christi / so wird
mit jm / als einem mittel werck-
zeug /

zeng / durchs göttlichs wort / der glau-
 big mensch warhafftig gespeisset in
 der gedechtnuß des leidens Christi mit
 seinem leib. Das felet nimmermehr /
 denn Gottes wort betreugt nicht / man
 streich im gleich für ein farb an woz man
 wöll. Ds aber die wort des Nachmals
 (sie werden gleich vber das brot ge-
 haucht oder sonst darbey gesprochen)
 an dem brot sollen bleiben hangen / wo-
 dan die in redt oben will fürgeben / vnd
 auch die weltweissen vermeinen / das
 brot verschwinne so die wort Christi
 von einem Priester darüber gesprochen
 werden / bleib es nicht mehr brot wie es
 vorwar / wie wol es die gestalt vnd ge-
 schmack des brots noch behelt / so werde
 es doch verwandelt in den natürlichen
 vnd wessentlichen leib Christi / also
 lang / groß vnd breidt / wie er am Creutz
 gehangen ist / den man darnach tra-
 gen / heben / vnd setzen möge ins heuff-
 lein monstrantzen vnd wo man sonst
 hin wöll : Das mag mit keiner heiligen
 schrifft bewisen werden. Der heilig Pau-
 lus

Ins hab den geirret / da er es öffentlich
 des **HERRN** Brot nennet / vnd
 spricht / 1. Cor. 11. Welcher unwürdig
 isset vnd trinckt von des **HERRN**
 Brot vnd kelch / der isset vnd trinckt / &c.
 Siehe da nennet es der heilig Paulus
 noch Brot / aber doch nicht ein schlecht
 Brot / sonder des **HERRN** Brot /
 wie wol er die wort des Nachtmals
 vorhin beschrieben hette. Wo aber das
 wort am Brot blieb hangē / vñ das Brot
 durch die wort Christi verschwünde
 vñ verwandelt würde in den natürliche
 leib Christi : kundt es der heilig Paulus
 eben als baldt auch den leib Christi ge-
 nent haben / als er es Brot genennet hat.
 Er het jm auch on zweifell solche ehe
 nit abgeschlagen. Darumb so neme
 nun ein frommer Christ die wort des
 Nachtmals also für die handt / daß sie
 einmal von Christo geredt / war gewe-
 sen sind / vnd werden auch in einfelti-
 gem Christlichem verstande im brauch
 des Nachtmals ewig war bleiben. Sie
 hangē aber allein am glaubigē hertzen /
 nicht

nicht am brot / vnd sind ein geistliche
 speiß der seelen / wie das brot ein speiß
 des leibs ist / Sie lassen das brot bleiben
 (wie es auch Paulus offentlich nen-
 net) sie bringen aber mit dem Sacra-
 mentlichen vnd heiligen brot Gottes /
 das in des **HERRN** Nachtmal ge-
 braucht wird / gewiß vnd fürwar /
 was sie dem glaubigen menschen ver-
 heißen. Dem brot wird nichts verheiß-
 en / allein wird darauff gedeutet / daß
 man es eusserlich bey dem wort soll brau-
 chen zu einem gedenckzeichen / vmb der
 menschlichen schwachheit willen: Sie
 gehören aber beide zusammen in einem
 brauch / wort / brot / vnd wein / gleich
 wie glauben / essen vnd trincken. Wo
 man sie nun voneinander scheidet (wie
 denn mit dem insperren des brots ge-
 schieht / im heußlein oder monstran-
 zē) da das brot allein ingesperret wird /
 auch one des **HERRN** befelch / vñ
 aber das wort nicht ingesperret mag
 werden: Da wird es mißbraucht wider
 die erste insatzung vñ ordnung Christi.
 Welche

Welche ordnung den fürnemlich in drey
 en puncten stehet: Der erst / daß man
 dem wort Christi von hertzen glaube/
 daß sein leib für vns in den tod gege-
 ben / vnd sein blut zu verzeihung vnser
 sünden vergossen sey. Der ander / daß
 man von seinem brot esse vnd von sei-
 nem kelch trincke / vnd nicht daß man
 sie in heußlein setze. Der drit punct /
 daß man des **SACRAMENT** tod darbey
 verkünde / des wercks vnser erlösung /
 nemlich seines bitteren leidens vnd ster-
 bens / gedechtnuß halte / im von hert-
 zen lob vnd danck darumb sage. Wo
 anderst damit gehandelt wird / so ge-
 schicht es one Gottes wort / vnd ist ein
 öffentlicher mißbrauch / den weder
 der pabst nach der gantz vermeint
 geistlich stant verantworten kan / denn
 allein mit iren eygenen Tantmeren. Also
 viel sey jetzundt genug geredt von

dem mißbrauch in der in-
 sperrung des heil-
 gen Sacra-
 ments.

Solget

Folget nun von dem Andern miß-
 brauch bey der insperrung des heiligen
 Sacraments / welcher viel gröber ist
 dem der erst / da nicht allein / wie im
 ersten / das brot vom wort abgesünderet
 wird: sonder auch die speiß vñ tranck /
 welchen Christus sampt dem brot oder
 speiß im Nachmal zugebrauchen be-
 folhen hat / vñ keines one das ander.
 Denn es ist je offentbar auß den dreyen
 Euangelisten / vñ dem heiligen Pau-
 lo / das Christus in seinem Nachmal
 zu dem brot / nicht allein die speiß des
 brots / sonder auch den tranck des
 kelchs eingesetzt hat / vñ befolhen ist
 beyde sampt vñ mit einander zu brau-
 chen in seiner gedechtnuß. Sürnemlich
 aber hat er zum kelch gesetzt mehr den
 zum brot / das wörtlin (alle) Trin-
 cket alle darauß / wie Matth. in seinem
 Euangelio bezeuget / denn Christus hat
 one zweiffel im Geist vorgesehen / daß
 nach seinem vñ seiner Apostel zeiten /
 solche vermessene bößgeistliche Pro-
 pheten kömen würdē / die inñ freuēlich

den tranck des Nachtmals selbst allein
 zueygnen würden / vnd das ander ge-
 mein Christen volck desselbigen berau-
 ben. Darum hat er gesagt zu seinen Jün-
 geren vnd zu allen Christen menschen/
 welche den auch alle Priester in Christo
 seind / 1. Pet. 2. Trincket alle darauß.
 2c. Ober das hat er auch hinzugesetzt
 das tröstlich wörtlein von verzeihung
 der sünden / also : Das ist der kelch des
 Newen Testaments in meinem Blut/
 das für euch vñ für viel vergossē wird/
 zur verzeyhung der sünden. Welche
 zwey wort vns billich bewegen solten
 (wan es ja je recht were / das halbig
 theil des Sacraments inzusperren vnd
 zubehaltē) daß wir viel mehr dē tranck
 des kelchs insperren vnd behielten / den
 die speiß des brots / dieweil vns Chri-
 stus heisset alle auß dem kelch trincken/
 darzu die verzeihung der sünden sonder-
 lich bey dē tranck des kelchs außstruckt.
 Ferrers in der Epistel die der heilig Pau-
 lus allen Christen menschen one vnder-
 scheidt / Fürstehenden / Altisten / vñ ge-
 S meinen

meinem volck / auch Männern vñ Wey
 bern zu Corinthe zuschreibt / knüpfset
 er die speiß vñ den tranck / das essen
 vñ das trincken alwegen zusamē nach
 des **HERRN** ordnung / vñ das
 kürzlich in vier sprüchen nach einand.
 Der Erst spruch: So offte ihr von dies
 sem brot esset / vñ von diesem kelch
 trincket: Solt ihr des **HERRN** tod
 verkündigen biß daß er kompt. Da
 stehts essen bey dem trincken. Der ander
 spruch: Welcher vnwürdig von diesem
 brot isset / vñ von dem kelch des **HERRN**
 trincket / der ist schuldig an dem
 leib vñ blut des **HERRN**. Sibe
 alhie stend essen vñ trincken abermals
 beyeinand. Der drit spruch: Der mensch
 (er sey priester / Ley / Man od weib / den
 sie seind alle menschen vñ wird hie nie
 mandts außgeschlossen) prüfe sich
 selbst / vñ also esse er von dem brot vñ
 trinck von dē kelch zc. Alhie seind zum
 dritten mal das brot vñ der kelch /
 das essen vñ das trincken zusamen ge
 knüpfset. Der vierdt spruch: Welcher
 vnwürdig

unwürdig isset vnd trincket / der isset
 vnd trincket im selber das gericht / ꝛc.
 In summa / der heilig Geist / so durch
 den munde Pauli redet vnd lehret / will
 die speiß vnd den tranck des Nachts-
 mals Christi / auch das essen vnd trin-
 cken vnzertrennet haben. Darumb die
 jenigen so sie bey dem gemeinen volck
 von einander getheilet haben: Die müß-
 sen von not wegen solches nicht gethan
 haben auß dem heiligen Geist (ob sie
 sichs schon berümen) denn sonst müß-
 ste der heilige Geist im selbst wider-
 wertig sein / dieweil er ein vngleiche
 lehr fürgebe in Paulo vnd in den Sa-
 cramentteilern / vnd je eine lehr mit
 der ander lügen straffet. Es muß ja
 ihz eins erlogen sein / entweder das
 Paulus lehret / daß alle Christen men-
 schen (so das Nachtmal Christi hal-
 ten wollen) sollen essen vnd trincken
 von dem brot vnd kelch des HERren:
 Oder aber das ander muß erlogen sein /
 das die Päßtler lehren / die Layen
 S ij sollen

sollen allein des **WERTH** Brot essen/
 vnd nicht von seinem kelch trincken/
 wie es auch ein lange zeit im brauch ist
 gewesen. Sie können beide nicht war/
 recht vnd Christlich sein. Ist diese lehr
 eine auß dem heiligen Geist: So muß
 gewiß die ander auß dem Teufel sein/
 welche den heiligē Geist lügen straffet.
 Darumb luge jederman darauff wel-
 cher lehr zu folgen sey/ Gottes oder des
 Teufels.

So folget nun auß der lehr vnd sprü-
 chen des heiligen Pauli (welche nichts
 anderst denn das war lauter Euange-
 lium sind) daß in dem Rechten Christ-
 lichen brauch dieses heiligen Sacra-
 ments/ die speiß vnd der tranck / alwe-
 gen zusammen gehören/ als ein ganz Sa-
 crament oder Nachtmal. Sollen auch
 allwegen im Nachtmal von allen Chri-
 sten menschen beide sampt miteinander
 gebraucht vnd in keinen weg zertrennet
 noch von einander getheilet werdē. Wel-
 cher mensch sie aber theilet oder stück-
 lecht prauchet: Der ist ein halber Sa-
 crament

cramenten / vnd vnchristlicher zerrei-
 ser der heilsamen ordnung Christi. Ja
 ein felscher vnd lesterer der fürnehmsten
 haubtstück von dem gnadenreichen
 Euangelio Jesu Christi / daß Christus
 seinen leib in den tod gegeben / vnd sein
 blut zur verzeyhung vnserer sünde ver-
 gossen hat. Darumb zu einer ewigen ge-
 dechnuß solcher grossen guttha: / lieb
 vnd gnade vns durch Christum bewei-
 sen (das wir im derselbigen danckbar
 weren) hat er dieß Nachtmal in eusserli-
 cher speiß vñ tranck des brots vñ weins
 eingesetzt. Bey welchen er vns auch
 innerlich speiset vnd trencket durch den
 glauben seines worts mit seinem war-
 hafftigen leib vnd blut zu dem ewigen
 leben. Das brot im Nachtmal / ist sei-
 nes getöden leibs Sacrament / vnd der
 wein / ist seines vnschuldigen vergosse-
 nen bluts Sacrament. Zu gleich aber
 wie der getödt leib Christi / vnd sein ver-
 gossen blut sampt miteinander ein ei-
 nigs volkommens vnd ganz werck sind
 vnser erlösung. Also sein auch des **HER**
 S iij **HER**

REIN brot vnd wein sampt mit ein-
 ander / ein einigs volkommens vnd ganz
 Sacrament / welches keinem fromen
 Chriſten menschen zimpt noch gebürt
 von einander zuscheiden. Da von auch
 zu einem vberflus / das geistlich Recht
 zeugnuß gibt / de Conse. dist. 2. Cano. Com-
 perimus: Am selbigen ort spricht 8 Pabst
 Gelastus / daß speiß vnd tranck des
 Nachtmals / das ganze Sacrament
 seien / vnd gebet darbey / daß sie ent-
 weder beide sampt entpfangen sollen
 werden; oder aber beide vnderlassen blei-
 ben. Darumb daß sie one grosse sünde
 nicht mögen zertrennet werden. Diesen
 Canon können auch die Pöpstler nicht
 leugnen / sie mögen in woll mit falscher
 gloß verblümen / nach anzeigung der
 Rubrica / so in kurzen jaren darüber er-
 dacht ist / vdn in allein den Pfaffen zu
 eygnen: Man weiß aber dennoch wol
 daß die ersten vnd alten Decretbücher
 solche titel vnd Rubrica nit haben / wel-
 che den Text an im selbst zum diefermal
 falschen vnd von seinem Rechten ver-
 stande

standt abfüren / 2c. Befindet sich also
 öffentlich / daßes wider göttlich vnd
 menschlich ordnung ist (wo anderst
 menschlich ordnung in diesem handel
 etwas gelten solt) So man das heilig
 Sacrament halbiret / das brot von
 dem tranck außsondert / theilet / insperret
 vnd behaltet / Darnach auch dasselbig
 halbig theil allein one den tranck des
HEILIGEN kelchs / de gemeinen volck
 gibt / vñ also die heilsamē göttliche ord
 nung Christi / ja dz einig tröstlich werck
 vnser erlösung des getöden leibs vñ ver
 gossenen bluts Christi verspottet vñ ver
 lestert. Welches fürwar eingantz gro
 ßer mißbrauch ist / stracks wiß das helle
 vñ klar Euāgelion Jesu Christi / ð auch
 mit keiner vernunfftigen ursach aller
 hochgelertē auff erdē (wan sie schō alle
 zusammen in ein Conciliū keme) entschul
 diget od verdetigt mag werdē. Den mā
 zeige an für ursach was man woll vnd
 brauch schō alle Argument vñ spitzfün
 digkeit Platonis / Aristotelis vñ anderer
 Philosophē: so steht doch alzeit Gottes
S iij wort

wort vnd ordnung darwider / danon
 man nichts ab oder zu thun soll. Was
 wollen sich den die thorechte lügenhaff
 tige menschen vnderstehn / also frelich
 wider Gott zu setzen / für dem sie doch
 gar nicht bestehen mögen. Sibe / Chris
 tus spricht im Nachmal / Esset vnd
 trincket alle / 2c. Aber die Widerchri
 sten sagen zu dem gemeinen hauffen /
 Esset vñ nicht trincket / den wir habens
 in Aristotelis Kunst funden (welcher
 bey vns viel geleter vnd weiser ist den
 Christus) daß der tranck des Nach
 mals im essen beschlossn ist / denn je
 kein lebendiger leib ist one blut. Darum
 welcher den leib isset / der neuisset darmit
 auch das blut. O grosse klugheit / wie
 solt doch Christus nicht ein großer War
 müssen sein / bey solchen hochgeleteren
 vnd weysen Philosophen / Dieweil er
 solchs nicht auch gewüßt hat / daß blut
 in einem lebendigen leib ist ? pfuch dich
 menschliche thorheit / Christus ist die
 ewige göttliche weißheit / Collo. 2. In
 im seind alle scherz der weißheit vnd
 erkanta

erkantnuß verborgen / Er ist der glantz
 des ewig'n lichts / Sap. 7. Hebre. 1.
 vnd ein spiegel one mackel der göttli-
 chen Maiestet / vnd ein bild seiner güt-
 tigkeit. Alle ding sein durch in gemacht /
 Johan. 1. Hebre. 1. vnd hat alle ding
 woll geordnet / Sap. 8. Was wollen
 die hochgelerten Widerchristen hierzu
 sagen? Er hat alle ding woll geordnet
 vnd Recht gemacht / darbey müssen sie
 es lassen bleiben vnd wan sie auch dar-
 über von einander brechen solten. Sie
 werden es mit irer thorechten vernunfft
 nimmer besser können machen / das ist
 gewiß war / sonst were je Christus nicht
 Gott / von dem alle weißheit kompt.
 Eccle. 1. Jacob. 1. Welcher mensch sich
 aber vndersteht die ordnung Christi zu
 endern vnd besser zumachen : der muß
 gewiß zu einem Narren darob werden /
 vnd als ein feind Christi / in den zorn
 Gottes fallen / Das sollen alle Widers-
 christen wissen. Will man aber ein in-
 red haben der Krancken menschen hal-
 ben / vnd sagen daß man das heilig

Sacrament vmb irent willen muß inschliessen vnd behalten / auff daß man es bey der handt habe / in der zeit d not / wie denn das Concilium Wormacense solches verordnet hat / De Consec. dist. 2. Cano. Presbyter.

Antwort.

Das heilig Sacrament bedarff keines insperrens vmb der krancken willen / denn man hat die wort des Nachtmals alle zeit bereit / die mag man brauchen bey den krancken nach insatzung des **HERREN** bey tag oder bey nacht vñ zu aller zeit / wie es die gelegenheit vnd notdurfft erfordert / in stuben in kamern / zc. Denn sie sind an keine bestimbte zeit / stadt / Person / Kleidung / zc. gebunden. Auch ist es bey den krancken mensche sonderlich not / daß man nicht allein die eusserliche zeichen brauche : sonder auch des **HERREN** wort vom Nachtmal / welche ein fürnemblich hauptstück des heiligen Euangelij seind / vnd die aller tröstlichsten

sten wort / damit die Krancken in ihrer
 Kranckheit getröst vnd im glauben ge-
 sterckt sollen werden (dieweil der glaub
 nicht im zeichen / sonder im wort Got-
 tes besteht / Rom. 10.) wider alle an-
 fechtung des bösen geists / welche denn
 one zweiffell am allerstercksten sind so
 der mensch auß dieser welt scheidē sol-
 mögen auch allein mit Gottes wort im
 glauben vertriben werden / 1. Pet. 5.
 Ewerem widersächer dem Teufel wid-
 stehet festiglich im glauben. Der glaub
 aber bestehet nicht im brot vnd wein:
 Sonder allein in Gott vñ seinem wort.
 Darumb auch des **S E R R E T** brot
 vnd wein im Nachmal / vnwirdig-
 lich one glauben des worts Gottes ge-
 nossen / nicht allein gar nichts helffen
 können wider den Teufel / sonder viel
 meh: dem mensche fürderlich sind zum
 Teufel zu kommen. Denn welcher vn-
 würdig isset vnd trincket / zc. der wird
 schuldig an dē leib vñ blut Christi / Er
 isset vnd trincket im selber das gerichte
 zum ewigen tod / 1. Corin. 11. Aber
 der

der glaub in Gottes wort / ist krefftig
 vnd mechtig den Teufel vnd die ganze
 welt zu überwinden *Ephe. 6. 1. Job.*
5. Vnd dem glaubigen sind alle ding
 möglich / *Marc. 9.* Ist deshalb fast
 nutz vnd gut / auch Christlich vñ recht
 daß man den Krancken nicht allein ein
 stumme partickel auß dem Sacrament
 heußlein zu hauß trage vnd gebe: Son
 der daß man inen das ganz Nachmal
 Christi / in zeichen vnd worten für irem
 bet halte / vñ alda sie mit ganzem vleiß
 mit den eignen worten Christi erinnere
 seines bitteren leidens vnd sterbens für
 vnser sünde / welches ein einiger trost
 ist eines sterbenden mensches / so er mit
 dem glauben daran hafft / vnd al sein
 vertrauen von ganzem hertzē darauff
 stellet / der Teufel vermoge als wenig
 gegen einem solchen menschen / als ge
 gen Christo dem **HEILIGEN** selbst /
 welcher des tods vnschuldig für die sün
 den aller glaubigen gestorben ist / vñ
 sein blut vergossen hat / sie mit dem
 himlischen Vater versönet / zu gnaden
 vnd

vnd Barmherzigkeit bracht / daß sie
 nun warhafftige Kinder Gottes vnd er-
 ben sindt des ewigen leben. Das wird
 vns tröstlich mit hertzlicher dancks-
 gung im Nachtmal Christi fürgebil-
 det. Darumb es den sterbenden Christen
 menschen nicht allein in zeichen soll vor-
 getragen werden: Sonder auch mit den
 Worten Christi daran der glaub / als an
 seinem grundt hafftet / Auch nicht stuck
 lechtig allein in speise / sonder auch in
 tranck / wie es der **HE** selbst ver-
 ordnet / vnd zu jnen beiden sein wort ge-
 setzt hat. Welcher nun allein die speise
 braucht / vnd nit auch den tranck : Der
 weichet ab von dem wort Christi / das
 er bey dem tranck geredt hat / welches
 im nicht so viel gildet als das / das er bey
 der speiß geredt hat. Damit stucklet er
 verachtlich die wort vnd werck Christi /
 ja er verletzet seinen glauben vnd macht
 ein stuck werck darauß / welches ein ge-
 wiß zeichen ist / das er erdicht vñ nicht
 von Gott ist. Den ein Rechter warhaff-
 tiger glaub / der von Gott ist / glaubet
 nicht

nicht stücklechtig einem wort Gottes
mehr den dem andern / hanget auch ein
nem nicht mehr an den dem andern:
sonder glaubet vñ hanget an gleich als
an Gottes worten / vnd ist gewiß daß
alles was Gott redet / ist die gerechtige
keit / die warheit vnd das leben. Dar
rumb welcher ein Rechter Christ ist /
gleich als wenig er von dem wort Chri
sti das er bey dem tranck des kelchs ge
redt hat / abweichet: Also wird er auch
den tranck der zu dem wort verordnet
ist / nit vnderlassen in leben vnd in ster
ben / darbey auch ein vnaußsprechlicher
trost gegeben wird. Es ist nichts tröste
licher einem jeglichen menschen / son
derlich dem der in tods nöten ist / den so
er höret vnd glaubet / daß das blut Chri
sti zu verzeihung seiner sünden vergos
sen ist. Denn er ist jezundt gewiß vnd
versichert durch den Geist Gottes im
glauben / der gnaden Gottes vnd der
ewigen seligkeit / &c. Also ist nun nicht
vonnöten / das halbig theil vñ Nachtr
mal Christi / Nämlich allein die speise
im

inzusperrren in heußlein vmb der Kran-
 ken willen. Denn die ordnung Chri-
 sti wird dardurch zerrissen vnd der
 glaub zerstücket / das ist greulich vnd
 erschrecklich zu hören. Es bedarff sich
 auch niemands beklagen / daß die ehe
 des heiligen Sacraments dardurch hin
 gelegt vnd abgethon werde / so schon
 das insperren des brots in monstran-
 zen oder heußlein nicht geschicht / so
 man schon nicht lichter / kerzen / Am-
 pelen darfür brennet / so man sich
 schon nicht darfür sucket vnd neiget /
 hüte vnd baret abzeugt / So man
 schon nicht darnor hoffeliret / mit
 pfeiffen singen vnd klingen / ꝛc. Denn
 zugleich wie Christus in der menscheit
 nit darumb kommen ist / daß er ins-
 gross ehe vnd dienst liesse. beweisen /
 sonder viel mehr daß er vns dienet
 vnd sein leben für vns gebe : Mat-
 thei 20. Also hat er auch diß heil-
 lig Sacrament eigentlich nicht dar-
 umb eingesetzt / daß wir jm darina-
 nen dienen / vnd gross ehe beweisen
 sollen:

sollen: Sonder viel mehr daß er vns
 diene/sich selbst vns zu eygen gebe/vns
 helffe vnd tröste in leben vnd sterben/in
 aller anfechtung vnd trübsall/ So wir
 im Nachtmal (welches er zur gedeck-
 nuß seines leidens vnd sterbens verord-
 net hat) seinen leib der für vns in den
 tod gegeben/ vnd sein blut/ das zur ver-
 zeyhung vnserer sünden vergossen ist/
 durch den glauben seiner worten essen
 vnd trincken. Darin alle rechte geschaff-
 ne vnd Christliche ehriebietung dieses
 heiligen Sacraments ganz miteinander
 begriffen ist/ nemlich in einer sum-
 ma/ daß wir es brauchen vnd hand-
 len/ wie es der **HEXX** selbst befolhet
 hat / daß wir von seinem brot essen vñ
 von seinem kelch trincken / in seiner ge-
 dechnuß / im von ganzem hertzen
 lob/ ehr vnd danck sagen vmb der gro-
 sen lieb vnd gutthat willen / die er vns
 bewisen hat one vnsern verdienst auß
 lauther gnad vn Barmhertzigkeit. Alle
 andere ehriebietung/die im geschichte im
 heuslein oder monstranzen/ hat keinen
 grunde

grunde im wort Gottes / ist von den
 menschen erdichtet / vnd kan Gott nicht
 wol gefallen. Denn er hats nicht geheis-
 sen. Alle Gottes dienst aber damit wir
 vermeinen in zu ehren / die allein auff
 vnserm gutduncken / vnd nicht in sei-
 nem wort bestehn : die sind eitel / vn-
 nutz vnd vergeblich / damit er viel mehr
 verlestert den geehret wird / Matth. 15.
 Des Alten Testaments figurē / darauß
 die vermeinte ehrerbietung des heiligen
 Sacraments gezogen ist / sind nichts an-
 derst denn buchstabliche figuren / vnd
 bleiben auch figuren / gehören dē Jüdi-
 schen volck zu vnder dem gesetz : Aber
 dem Christen volck / das nicht nach
 dem fleischlichen buchstaben / sondern
 nach dem Geist wandeln soll / Rom. 8.
 2. Cor. 3. dem gebürt vnd zimpt nicht
 mit figuren nach dem buchstaben / vñ
 mit eusserlichē gebreng Gott zu ehren:
 Sonder im Geist vnd warheit / mit
 hertzlichem glauben vnd liebe. Des gibe
 vns das ganz Testament zeugnuß.
 Darumb laß man sich die genödigten
 G figuren

figuren des Alten Testaments / Bey die-
 sem heiligen Sacrament nicht blenden/
 das man irem Exempell nach / auch
 ein eusserlichen jüdischen Gottes dienste
 darbey wölle anrichten. Wir sind Chri-
 sten vñ nicht Juden / wir haben die leib
 des Geists / der buchstab geht vns nicht
 an. Vnd wiewol Christus im fleisch
 bey vns gewesen ist / so können wir doch
 in (mit Paulo 2. Cor. 5.) nicht nach
 dem fleisch / das ist / wir suchen nichts
 fleischlichs oder eusserlichs vñ zeitlichs
 an in / sond allein geistlichs vnd ewigs.
 Deshalbens vns auch gebürt in geistlich
 zu ehren mit innerlichem glauben vnd
 liebe des hertzens. Welche rechtgeschaf-
 fene vnd Christliche ehrentbietung /
 durch das eusserlich gebreng für diesem
 Sacrament / hinderstellert wird. Denn
 da wird allein das eusserlich zeichen
 des brots geehret / vnd das wort Got-
 tes daran der glaub hafftet / vnd dar-
 ran alle macht leibet / bleibt ungeehret.
 Denn das wort nicht wird gehöret /
 die Päßstler lesen es heimlich / vnd in
 vnber

Unbekanter sprach in iren Messen (ble-
 weil sie das gemein volck derselbigen
 wort unwirdig achten) vff dass es nie-
 mandes höre / verstehe / glaube vnd se-
 lig werde. Das heist aber Gottes ehr
 nicht fordern / sonder hinderstellig ma-
 chen / ja viel mehr Gott verlestern.

Darumb welcher ein frommer Christ
 wil sein / vnd Christum recht ehren
 der höre sein wort des heiligen Euan-
 gelij mit vleiß / glaube jm von her-
 ben / vnd thu bey diesem heiligen
 Sacrament wie er selbst zuthun Befol-
 hen hat / darnach neme er sein ei-
 gen Creutz vff sich / mit verleuchnung
 sein selbst / vnd folge jm nach / zc.
 Das ist die recht Christlich erentbie-
 tung / so man jm thun mag. Welcher
 aber solches nicht thut / der sey gewiß /
 daß er kein Christ ist / vnd ehret auch
 Christum nicht recht / er thue was er
 wolle. Ja wen er auch alle tag ein ganz
 Be thunnen vol öls oder ein zentner
 wachs bey dem Sacramentheufflein
 G ij verbrenns

verbrennet / da möchte der Tempell wol
 schwertzer dauon werden / das hertz
 aber wird gar nicht lichter darvon im
 glauben / oder hitziger in der liebe. An
 welchen zweien stucken / nemlich dem
 glauben vnd der liebe / die ganze handt
 sach steht Gott wol zu gefallen / vnd
 in recht zu ehren. Wo es an denen
 zweien felet / da ist auch der rechten ehre
 Gottes gefelet / vnd wird kein Knappen-
 bucken / kappenrucken / oder ander hoff-
 lieren für dem Sacramētheuslein vnd
 monstranzen helffen / welche heuslein
 vnd monstranzen (als hoch zubesor-
 gen ist) viel mehr vffgericht sind zu
 einem schawspigell des Messkrams /
 denn vmb der ehre Gottes willen. Die
 öffentlich that vnd Krämerrey des Mess-
 kauffens vnd verkauffens / gibt ein bö-
 se zeugnuß / dem **SERRE** aber
 ist dis vrtheil vorbehalten.

Der Sechst Artikel.

Vff Sonntag für Pfaffen
 Fastnacht / hat Nicolaß Keney
 sen

sen geprediget / das kein werck
gut sey / denn das man den men-
schen thue / vnd verwirfft alle
gute werck.

Antwort.

Dum ersten ist dieser Artikel mit im
selbst vneins. Denn im anfang ge-
steht er von mir gepredigt sein / dass
diese werck gut seind / die dem nechste zu
nutz vñ dienst geschehen : An dem endt
aber sagt er gleich darauff / ich verwerff
alle gute werck. Das reumpft sich nicht
wol zu samen / Alle werck verwerffen /
vnd doch auch etliche gut rümen / Da-
bey gibt dieser Artikel sein eigen irthum
zuerkennen. Denn er weicht von im selbst
ab / vnd richtet sich allein dahin / dass
er etwas sage vff seine meinung / ge-
denckt aber nicht was er sage. Das laut
nicht woll in ernsthaftigen sachen /
also mit Worten hin vnd her schwen-
cken. Zum andern zeucht der Artikel
G in allein

allein die bloße werck an / geschweiget
 darbey ganz aller dingen / des glau-
 bens vnd der liebe / welche beide doch
 allezeit auch fleißlich von mir neben
 den wercken gepredigt sind worden /
 als ein grundt aller guten werck / vnd
 sind keine werck je oder je verworffen
 worden / denn die one Gottes wort
 vnd on glauben geschehen. Es sagt
 je der heilig Paulus Rom. 3. Gal. 2.
 Wir wissen daß der mensch durch die
 werck des gesatz nicht rechtfertig wird.
 Sonder durch den glauben an Jesum
 Christum / denn kein fleisch mag für
 im rechtfertig sein durch werck des ge-
 satz : viel weniger wird der mensch
 rechtfertig durch werck menschlicher
 gesatz. Was Gottes gesatz nicht auß-
 richtet / das wird durch menschen
 gesatz nimmermehr wol außgericht
 werden / Hebre. 11. Ohn den glau-
 ben mag kein mensch Gott wol gefal-
 len / er sey in dieser welt geacht wie
 hoch vnd würdig er wölle / darumb
 werden seine werck Gott noch viel we-
 niger

niger gefallen. Denn gute werck kome-
 men nicht auß dem menschen / son-
 der auß dem glauben. Welcher die re-
 chte wurzell vnd stamme ist / darauff
 die gute werck / als gute frucht auß
 einem guten baum wachsen. Ist der
 baum nicht gut / so wechsset nimmer
 kein gute frucht an im / Matthei 7.
 Vnd 12. Also auch ist der mensch nicht
 glaubig in Gottes wortten / so ist kein
 werck guter thue was er wolle / sonder
 ist alles sündlich vnd vermaledeyet /
 vnd gehöret in das hellisch feuer. Da
 hilfft nichts für / Christus leugt nich da
 er sagt: Ein ieglicher baum (keinen auß
 genommen) der nicht gute frucht tregt /
 das ist / frucht des glaubens / der sol
 außgerentet werden / vñ geworffen wer-
 den in das feuer. Denn Christus hat hie
 in gleichnuß geredt von den beumen vñ
 iren fruchten / dieselbigen gedeutet auff
 die bosshafftige falsche lehr / glaubē vnd
 werck d̄ gottlosen menschen wie die vor-
 gehenden wort anzeigen am selbigē ort.
 Dergleichē sagt Pau. Rom. 14. alles w̄
 G iij außser

aufferhalbem dem glauben geschicht/
 ist sünde. Damit vercleret er nun die
 gleichnuß jetzundt angezeigt. Seind
 aber alle werck sünde/ die aufferhalbem
 dem glauben geschehen: wie können sie
 den gut sein? Ja es wird sie kein mensch
 gut können heißen / er sey den von der
 vermaledeiten gottlosen schare / Esas.
 Die das böse gut nennen / vnd das gut
 böß schelten: die finsternuß für das
 licht achten / vnd das licht für finsternuß
 / dergleichen das bitter für süß / vñ
 das süß für bitter annemen. Auß diesen
 vnd viel anderen mehr sprüchen / der
 heiligen göttlichen geschriffte / mag
 man wol erkennen / daß aller menschen
 werck / auch des göttlichen gesetz / die
 da nicht grunde haben im rechten war-
 hafftigen glauben Jesu Christi / eitel
 sündliche vñ verdamliche werck sind/
 die vor Gott nicht mögen bestehn / vnd
 an denen er ganz kein wolgefallen hat.
 Viel weniger an den wercken mensche-
 licher gesetz / mit welchen man Gott
 vergeblich dienet / Matth. 15. Der euffer-
 lich

lich gut werckſchein für den menschen /
 macht niemants gut für Gott / der
 glaub im hertzen muß es thun / Matth.
 > Es werden nicht alle die zu mir ſa-
 gen **HERR** **HERR** in das himmels-
 reich kommen: ſonder die da thun den
 willen meines himliſchen Vaters / das
 iſt / die da glauben / Johan. 6. Folget /
 Matth. > Es werden viel zu mir ſagen
 an jenen tag / **HERR** haben wir nicht
 in deinem Namen geweiffaget: Haben
 wir nicht in deinem Namen Teufel auß
 getriben: Haben wir nicht in deinem
 Namen viel thattē gethan / das iſt / viel
 guter werck: Denn werde ich inen be-
 kennen / ich hab auch noch nie er-
 kant / weicht von mir ihr vbelthätter.
 Sihe da / Chriſtus erkennet die werck-
 ſromen nicht / die one den rechten glau-
 ben ſind / ob ſie ſchon auch groſſe wun-
 derwerck gethan haben in ſeinem Na-
 men / Er nennet ſie vbelthätter / vnd treibet
 ſie hinweg von jm / als die jenigen:
 ſo ſein nicht würdig ſind / auch kein theil
 mit jm haben am Reich der himmeln.
 G v Also

Also ist ein ieglicher falscher Christ mit
 seinen gleissenden wercken one den war-
 ren glauben / ein vbelthetter für Gott
 (gleich wie sonst ein treulosser meiney-
 diger / ein bößwicht für der welt geheis-
 sen ist) vermaledeiet vnd verdampft
 hab ein ansehens für der welt wie er
 wölle / Er thue auch was er wölle / so
 gehört er vnd seine werck dem Teufel
 zu / Gott wil nichts damit zu schaffen
 haben. Er ist ein böser Baum der nimm-
 ermehr gute frucht tregt darumb muß
 er von der gottseligen schar außgerent
 vnd in das ewig sewer geworffen wer-
 den / Er ist der thorechten Jungfrau-
 wen eine / mit einer hübschen wolge-
 zierten Ampeln / aber one öl / zu denen
 vom **HERREN** gesagt wird: War-
 lich ich sage euch / ich kenne ewer nicht /
Matth. 25. Welchen nun der **HERREN**
 nicht kennet / denn wird er auch / one
 allen zweiffel / nimmermehr zu gnas-
 den auffnehmen in seinem Reich: Sone-
 der wird die thür für im zuschliessen /
 als mit dem er nichts zuschaffen wil
 haben /

haben / wie die gleichnuß dasselbig /
 Matthei 25. Klarlich anzeigt. Bes
 findet sich also kürzlich / inhalts gött
 licher geschriffte vnd des heiligen E
 uangelij / daß kein werck gutt sey für
 Gott / es fliesse den auß dem waren
 glauben des wort Gottes. Wo dersel
 big glaub ist / der bringet gewiß mit
 im die rechte Christliche liebe / dauon
 Deute / 6. Matthei 22. Marc. 12. Du
 solt lieben deinen nechsten wie dich
 selbst / vnd Johan. 13. Spricht Chris
 tus / ich gebe euch ein Neues gebot /
 daß ihr einander liebet wie ich euch
 geliebet habe / darbey wird jederman
 erkennen / daß ihr meine Jünger sind /
 so ihr einander lieb habet. In summa /
 ein frommer Christ sein / heist den nech
 sten lieben. Wo die liebe nicht ist / da
 ist kein Christ / da ist auch kein gut
 werck / die gleißner dichten gleich was
 sie wöllen / allein die liebe thut one vnd
 laß gute werck / ja sie kan kein böß werck
 thun / sonder sie ist ein erfüllung des
 gesatz / Rom. 13. Sie helt Gottes gebote
 vnd

vnd thut alles guts / sie siehet mit gan-
 zem vleiß vff diese wort Christi / Mat-
 thei 7. Alles was ihr wollet das euch die
 menschen thun sollen : dasselbig thut
 ihr inen auch / das ist dz gesatz vñ die
 Propheten / Sie liebet gleich freunde
 vnd feindt / Matth. 5. Sie gebenedeyet
 ire vermaledeier / Sie thut guts denen
 die sie hassen / Sie bittet für ire verfol-
 ger / Sie richtet vñ vrtheilet niemant
 Matth. 7. Sie hat kein bitterkeit grim-
 noch zorn im hertzen / Sie verzeibet
 williglichen gern / was man jr leits
 thut / Ephe. 4. Sie ist langmütig vnd
 freundlich / Sie eiffert nicht / Sie schal-
 cket nicht / Sie blehet sich nicht vff /
 Sie stellet sich nicht hönisch / Sie
 sucht nicht das ire / Sie lasset sich nicht
 erbittern / Sie gedencft nichts arges /
 Sie frewet sich aber mit der warheit /
 Sie vertregt alles / Sie glaubt / hofft
 vnd duldet alles / 2c. 1. Cor. 13. Kürz-
 lich daruon zu reden. Die lieb ist also ge-
 sinnet / das sie nicht vff sich selbst acht-
 tet / oder iren eignen nutz suchet / 1. Cor.
 10. phia

10. Philip. 2. Sonder ires nechsten/wie ein Baum im selbst nicht frucht tregt/ sie vnderweiset/lehret/tröstet vnd strafset/sie ist mitleidig/ja armut vñ elendt/sie leihet/gibt/hisst/vnd redt/sie speiset/trencket/bekleidet/Behauset vnd herbrecht/thut den armen alles guts/vnd dienet gern mit vleiß jederman.

Das sind die rechtgeschaffene vnd Christliche gute werck/die auß dem wahren glauben des heiligen Euangelij wachsen/vnd in der liebe dem nechste zu guth geschehen. Sonst weiß dis Euangelium von keinen andern guten wercken zu sagen. Alle gute werck/die wir gut nennen/vñ bißher auß falscher lehr für ein grossen Gottes dienst geacht haben/als Kirchen barwen/viel pfrunden/Pfafferey/Müncherey/vñ Nonnerey stifften/Fasten/Seyeren/Opfern/Singen vnd Klingen/Messhalten/Jarzeit vffrichten/vnd die todten beghe/lichter vnd kertzen brennen/zo. Die sind alle von menschen erdicht/vñ ein grewel für Gott. Denn durch sie werden

werden die falschen armen vnd viel böser Buben in geistlichem schein reichlicher erneret vnd erhalten : aber die rechten armen / werden verseumt vnd verlassen / ja sie werden durch die falschen armen manchfaltig beschweret vnd jemerlich vndertrückt. Das ligt am tag vnd leset im keinen nebell für die augen machen / Gott besser es.

Wil man aber eigentlich wissen was gute werck sind / so lese man Esa. 1. Vnd / 58. Jere. 7. Mich. 6. Ose. 6. Matth. 9. Vnd 25. Da findet man klar was Gott für gutte werck von ons fordert vnd haben wil / welche auch Christus vnd seine heilige Apostell / in heiligen Euangelio gelehret haben / vnd noch von allen Christlichen Predigern gelehret werden. Darumb laß sich niemand bekümmern vnd ihr machen / ob schon der gross eigen nützig hauff feindlich scharret vnd schreiet: Ja die newen Ketzerische Prediger verbieten gute werck / vnd vnderstehen

Versten sich Gottes dienst ganz vmb
 zustürzen / das ist aller Widerchristen
 gemeine Rede: Aber sie wissen nicht
 was sie sagen / ire hertzen sind gar
 verblind vnd verfinstert / daß sie ins
 wort Gottes nicht sehen noch erken-
 nen was rechte vnd Christliche gute
 werck sind / haben auch nie verstan-
 den was der recht ware Gottesdienst
 seye. Wan sie lang von vielen guten
 wercken vnd grossen Gottesdienst sa-
 gen so ist es doch nicht mehr / denn
 alles vmb iren eigen bodenlosen sack
 vnd fressigen Bauch zuthun. Welcher
 mit vleiß acht darauff hat / der mercke
 den handell bald wol / wo inen das
 hertz stecket / es bedarffe nicht viel
 wort. Diweil aber dieser sechs Arti-
 ckel mich öffentlich beschuldiget / wie
 das ich alle gute werck verwerffe / das
 er one zweiffel von erdichten Päßtler
 wercken anzeuget (denn ich zu keiner zeit
 Christliche werck verworffen habe)

will

Wil ich vffs kürzest etliche von demselbigen Pabstler wercken anzeigen mit irem grund / vff daß jederman ver-
stehn möge / warumb / vnd wie ich sie
verworffen habe. Sage also :

Kirchen bawē von stein vñ holz mit
grossen kostē / vñ darbey die lebendige
Tēpel Gottes vnerbawet lassen bleibet
ist kein Gottes dienst / noch kein gut
werck / sonder es ist ein vnnutzer ver-
teiler kostē / damit viel billlicher vñ Christ-
licher den armen leuthen geholffen wür-
de. Lese Esa. 66. Acto. 7. von dem Tem-
pel / Lese / 1. Cor. 3. 2. Cor. 6. 1. Pet. 2.
Ephe. 2. Von den fasten / lese Esa. 58.
Was es für ein Gottes dienst vnd gut
werck sey / darbey merck vff die gebot-
ten fasten / zc. Von dem feyeren / lese
Esa. 1. Vnd von denen beiden / lese
Paulum Coll. 2. Matth. 15. vnd / 12.
Marc. 2. Von dem opffern / lese Oseam
6. Matth. 9. Ich hab ein wolgefallen
an der Barmhertzigkeit (sprichet der
HERR) vñ nicht am Opffer / Pfaff /
Münch

Münch oder Nonnen werden / ist kein
 Gottes dienst / noch gut werck / sonder
 ein irrige abtrettung vom rechten glau-
 ben nach der lehr des Teufels / denn bey
 ihnen wird der ehelich standt vnd speiß
 verboten / 1. Timo. 4. Singen vnd bet-
 ten die erdichten vnd geplezten sieben
 tagzeit oder anderst / on verstandt / geist
 vnd glauben / ist kein Gottes dienst /
 noch gut werck / sonder viel mehr ein
 sünde vnd Gottes lesterung / Rom. 14.
 Alles was nicht auß dem glauben ist /
 das ist sünde / Esa. 29. vnd Matth. 15.
 Dis volck (phariseer vnd ires gleichen
 Pfaffen / Münch / vnd Nonnen) ne-
 het sich zu mir mit dem mund / vnd
 ehret mich mit den leßzen / aber ir hertz
 ist fern von mir / Sie dienen mir vergeb-
 lich / mit menschen gebotten / vñ lehren.
 Sie da / Gott wil solches dienst nicht
 haben / Er ist jm ein grewel / vergeblich
 vnd lesterlich.

Nes halten ist kein gut werck / da-
 mit wir Gott dienen: Sonder viel mehr
 dienet vns Gott darin so wir anderst
 3 rechte

recht damit handeln. Denn wir empfahen darin gutthat von Got/ Nemlich seinen leib vnd blut im glauben zu vnserm heill: Aber Gott empfahet nichts von vns/ Er dienet vns/ wir im nicht. Darumb die Mess nicht ein gut werck ist/ damit wir Gott dienen: Sonder viel mehr ein dancksagung vmb der gutthat willen die wir vñ Gott empfangē. Darum auch die Pābstisch Mess/ darin man vermeint Christum zuopfferen/ vnd ein gut werck damit außzurichten/ im grundt nichts werd ist/ vnd ein lauter verspottung Gottes vnd seiner wercken gegen vns/ Davon in dem berichte so ich von der Mess geschrieben hab klicher gehandelt wird.

Jarzeit vnd seelmess stifften/ ist viel mehr ein pfaffendienst den ein Gottes dienst. Den ire Sathanische gesellschaftē werdē dardurch gefürdert im fressen/ Sauffen/ Raslen/ Spilen/ vnd vielen anderen leichtfertigkeiten/ die darneben geübet werden/ wie es leid am tag ligt. Je besser die Presens ist/ je vnritziger das
 Kartes

Kartenspiel vnd die weinkanten müssen
 sein etwan Vigiliē helffen singē die gan-
 ze nacht bis an den tag. O ein grosser
 seelentrost / Gott muß erbarmen daß
 wir also blind sind / vñ den Teufflischen
 greuel nicht erkennen wöllen. Die Stiffe
 vñ klöster haben nun ein lange zeit fast
 zugenommen vñ seind reich worden von
 dem erdichtē segfrewer / vñ seinem Libera-
 me Domine. Sie haben alle wol gezecht in
 allem lust vñ vberfluß / vñ dem Absolue.
 Aber der Adell vñ das gemein volck sind
 arm worden / das segfrewer hat inen die
 kisten vnd seckel dapffer gefeget / sie ha-
 ben sich selbst vnd ire kinder beraubet /
 von iren gütern pfrunden vnd Messen
 gestiftet / darbey erneret vnd erhalten ein
 starck / faul / fressig / leichtfertig / geil /
 vnnützig volck / von denen in Gote
 nichts Befolhen hat : vnd daneben ver-
 lassen die armen / Krancken / hungerich-
 en dürstigen / zc. die inen Gott zuerhal-
 ten manchfeltig Befolhen hat. Darumb
 solche stiftungen keine Christliche gute
 werck sein mögen / darin viel mehr
 S ij den

dem Teufel denn Gott gedienet wird.
 Wol dem der es verstehet/vom seggen
 wer folget ein besonderer bericht her
 nach.

Kerzen vnd lichter Brennen in den
 Tempeln bey tag wan man sonst wol
 gesihet / ist kein Gottes dienst / noch
 Christlich gut werck: Sonder ein jüdis
 sche Ceremonien/ welche vns Christen
 nichts angehet. Denn wir haben nun
 das war licht Jesum Christum / vnd
 sein heiliges Euangelion/ Johan. 1. Vñ
 Psal. 118. Die sollen durch den glauben
 leuchten in vnsern hertzen gegen Gott/
 vnd brennen in der liebe gegē dem nech
 sten. Wo das nicht geschicht/da ist das
 eusserlich licht vnd Ampelbrennen /
 sonderlich bey tag / ein thorechter vñ
 nützer kost bey vns Christen / damit
 weder Gott noch den menschen gedie
 net wird. Gott ist nicht blind / er sitzet
 auch nicht in der finsternuß / darumb
 bedarff er keines lights: die menschen
 so ire augen vnd gesicht haben / bedörff
 fen tags auch keins lights darbey zusehe.
 Wo

Wo man aber bey der nacht etwas auß
richten sol/ sind die lichter nicht zuver-
werffen/ es sey im Tempel oder sonst in
andern ortten/ wer bey dem licht wand-
elt der zerstößt die füß nicht.

Wallen zu den heiligen vnd sie an-
ruffen/ als vnser mitler vñ fürsprecher
für Gott/ ist kein gottes dienst noch gut
werck: Sonder ein öffentliche verleuch-
nung Christi des Sohns Gottes / 1.
Timo. 2. Es ist ein Gott vnd mitler
zwischen Gott vnd dem menschen/
nemlich der mensch Christus Jesus/ der
sich selbst geben hat zu erlösung für je-
derman. Item/ 1. Johan. 2. Ob jemandt
sündiget/ so haben wir ein fürsprechen
bey Gott Jesum Christum der gerechte
ist/ vnd derselbig ist die versünung für
vnser sünden. Nicht allein aber für die
vnser / sonder auch für der ganzen
welt. Darumb wil auch Christus ha-
ben/ daß wir anderst nirgent hinlauf-
fen sollen in aller vnser anligender not/
denn allein zu jm. Matth. 11. Sprichet
er: Kompt her zu mir alle die jr müßelig
S iij vnd

vnd beladen seid / ich wil euch erquick
 en / das ist / hilff vnd trost beweisen.
 Merck / er spricht: Kompt alle zu mir /
 vnd sagt nicht / laufft hin wallen zu
 sanct Jacob / zu sanct Nicolaß / &c.
 die werden euch helffen / Nein / nein /
 sie können niemants helffen / auch inen
 selbst nicht: sonder sind alle durch die
 hülff vñ gnade Jesu Christi selig wor
 den / zu dem allein (vnd keinem andern
 heiligen) sind sie selbst gangen / vñ im
 gefolge in dem glauben / daran haben
 sie ein guts werck gethan / wie Christus
 sagt Johan. 6. Das ist Gottes werck /
 daß ihr an den glaubet / den er gesandt
 hat. Die walfart des glaubens in Jesum
 Christum / ist ein gut Christlich werck /
 vnd füret vns zu Gott: alle andere wal
 farten sind aberglaubig vnd führen ab
 von Gott. Darumb können sie nimmer
 mehr gute werck sein / Johan. 14. Sagt
 Christus / Ich bin der weg / die war
 heit vnd das leben. Niemandt kompt
 zum Vater / den durch mich. Siehe da
 steht es klar / daß alle andere walfarten
 aber

abergläubig sind vnd von Gott abfä-
ren / darumb wirdt sich kein frommer
Christ damit bekümmern. Der Papisten
heiligen dienst / ist abgöttisch / Exod.
20. Deut. 6. Matth. 4.

Creutzfarten machen / vnd mit den
Creutzen gehn / wie bißher gewonheit /
vñ die menschēerdichttet haben / ist nicht
allein kein Christlich gut werck / sonder
ein lauter spot vnd gleißneriß narren
werck. Dieweil das heilig Euangelion
(welches ein wort des Creutz ist / 1.
Cor. 1.) veracht vnd verhasset wird /
auch das recht Christlich Creutz geslo-
hen wird / davon der HERR sage
Matth. 10. Luc. 14. Wer nicht sein
Creutz vff sich nimpt / vnd folget mir
nach / d̄ ist mein nicht werd / vñ k̄n nicht
mein Jünger sein. Vñ widerum / Matt.
16. Luc. 9. Marc. 8. Wil mir jemandts
nachfolgē / d̄ verleugne sich selbst / vñ ne-
me sein Creutz auff sich täglich / vñ folge
mir nach. Sibe / dz ist die rechte Christ-
liche Creutzfart / die Christus selbst vff-
gericht hat für sich vnd alle außers
H̄ iij welten.

welten. Welcher mensch darbey nicht
 gefunden wird / der ist auch kein rech-
 ter Christ oder Jünger Christi / wan
 er schon Rock vnd Mantel vol gemal-
 ter Kreuzen hengte (wie den etlich or-
 densleuth thun) vnd alle tag mit des
 Pabsts Gregorij / oder des Bischoffs
 Mammerti Creutzfarten ginge biß gen
 Rom / vnd biß gen Wien in Osterreich /
 daher sie auch am ersten jren vrsprung
 haben. / möchten sie doch keinen Chri-
 sten machen oder jemans helffen. Ich
 laß mich nichts bewegen / acht auch
 nicht groß was in etlichen Büchern bey
 diesen erdichten Creutzfarten geschriebe
 ist / Gehen tod zu Rom / von Wolffs
 beissen in Osterreich / was gehet das
 einen Christen menschen an / der sich
 vnder das recht Christlich Creutz Bege-
 ben hat / vnd anderst nicht begert / den
 daß er sterbe vnd bey Christo sey / der
 tod kom gelinge oder stelinge / da ligt
 jm nichts an / er wird kein wallfart dar
 für thun: Sond allein den **HERREN**
 bitten daß er zu der zeit des tods besten-
 dig

dig im glauben funden werde / darin er
 ewigs leben haben sol. Am gehen tod
 ist im nicht viel gelegen so es d **S** **L** **X** **X**
 also haben wil. Von dem wolffbeissen
 in Osterreich / haldt ein ieglicher was
 im gefeld / man hat etwan vil fabulen
 beschrieben / vnd ist wol zuerbarmen
 daß vmb der wölffen willen ein solchs
 wesen ist angericht worden in der gan-
 Ben Christenheit. Es ist ja ein wunder
 daß die wölff ihr zen behalten vnd die
 schaffennach allezeit zerrissen vnd fress-
 sen haben / so man doch alle Jar Creutz
 farten dafür gethan hat. Wo rechte
 Christen weren / die soltē sich solchs nar-
 renwercks schemē. Lese das *Rationale di-*
uinorum officiorum / von den Creutzfarten /
 vñ halte es gegen der heiligen geschriffte /
 so werden sie eben bey einander stehn
 wie Christus vnd Belial. Noch acht
 man es hoch vnd folget im nach / als
 sey es sehr ein köstlich ding vnd ein
 Christlich gut werck mit denselbigen
 Creutzfarten. Das machts aber / daß
 sie leichtlich zuthun sind / die Creutz
 S v trücken

trucken nicht vbell vnd lassen jederman
 bleiben wie er ist : Aber die Creutzfart
 Christi ist dem fleisch gantz schwer zu
 folbringen / das Creutz truckt sehr vbel /
 es treibt den schweiß auß mit angst vnd
 not / daß etwan haut vnd har mitein-
 ander dahin geht / es bringt armut vnd
 elend / hunger vnd kummer / es treibt
 von Vater vñ mütter / brüder vñ schwes-
 ter / es veriagt von hauß vñ hoff / von
 güter vñ haab / acker vñ wisen / es bringe
 neidt vñ haß von den weltkindern / es
 bringt verfolgung von den Tyrannen
 mit schwertern / strengē / wasser vñ fe-
 wer / vñ in summa / bringt das Christ-
 lich Creutz der gantzen welt vñ des Teu-
 fels vngenaden vñ grimmigē zorn. Dar-
 umb wil auch niemandt mit dieser
 Creutzfart zuschaffen haben / vnd in sol-
 chem engen weg wandelen. jederman
 sucht seinem fleiß raum / lust / freud vñ
 gut gemach / reichumb / gut / ehre /
 freundschaft vñ gnad dieser welt / in
 dem weiten vnd breiten weg zuwan-
 deln / das den alles wol bey den erdichtē
 Creutz

Creutzfarten mag bestehn / darinn werden sie auch angenommen vnd gehalten: die ander aber wird veracht vñ verworffen / vnd damit wird verworffen das Reich Gottes vñ ewigs leben. Den also stehet geschrieben / Act. 14. Durch viel trübsall müssen wir in das Reich Gottes gehn / gleich wie auch Christus hat müssen leiden / vnd also eingehn in seine herligkeit / Luc. 24. Wer nun nicht mit leidet / S wird auch nicht mit im Regiern / Rom. 8. In summa / welcher sein eigen Creutz nicht auff sich nimpt / mit verleugnuß sein selbst / vñ volget dem **SEKRE** täglich nach / der ist sein nicht werdt. Was solde er den im himel zuschaffen haben: Creutzlose / himellose: welchem eins nicht gefeld / der muß auch des andern mangeln / Christus leuget nicht.

Gnad vñ Ablass lösen oder kauffen ist kein gut werck / sonder ein gottlos / vermaledeit werck / schmezlich vñ lesterlich der gnaden Gottes / so vns one allen vnsern verdienst reichlich bewisen ist /
durch

durch den bitteren tod vnd Blut vergies-
 sen Jesu Christi. Daß es ein vermaledet
 werck sey / bezeuget der heilig Petrus
 Act. 8. Da in Simon der gnaden Kauff-
 man / als ein gnaden kremer ansprach /
 vnd in sampt den andern Aposteln
 gelt geben wold vmb des heilige Geistes
 gaben / Sprach Petrus zu im. Daß du
 verdampft werdest mit deinem gelt /
 daß du meinst Gottes gabē werd durch
 gelt erlangt / du wirst weder theil noch
 anfall haben an diesem wort / den dein
 hertz ist nicht vffrichtig für Gott.
 Darum thu Buß für diese deine Bosheit
 vnd bit Gott / ob dir vergeben werden
 möchte / der duck deines hertzen / denn
 ich sehe daß du bist vol bitter galle /
 vnd verknüpfft mit vngerechtigkeit.
 Sie da wie der heilig Petrus den Ab-
 laß verkündet. Fürwar hetten in die
 Pabst auch also verkündiget / sie het-
 ten nicht so viel gelts darauff gelöset /
 jederman hette sich für dem Kauffmans-
 scharz gefürcht als für dem Teufel. Itē
 daß Ablass Kauffen auch ein werck sey
 schmelich

schmelich dem tod vnd blutvergiessen
 Christi / haben wir widerumb / 1. Pet.
 1. Ihr seid nicht mit vergenglichem
 silber oder golt erlöset: Sonder mit dem
 tewren blut Christi. Darumb welcher
 ablaß vnd gnade / oder verzeihung
 seiner sünden vnderstehet mit gelt zuer-
 langen / der schmecht vnd lestert den ed-
 len tewren scharz vnser erlösung / nem-
 lich das vnschuldig blut Jesu Christi:
 Kan es mit gelt außgericht werden /
 was dörfte denn Christus sterben vnd
 sein blut vergiessen: Danon auch Esai.
 geweissaget hat / Esa. 52. Ihr seid
 vmb sonst verkaufft / vnd solt wider-
 umb erlöset werden one silber. Ferners
 spricht der heilig Paulus Ephe. 1. Gott
 hat vns durch seine gnad angenehm ge-
 macht in dem geliebten / an welchem
 wir haben die erlösung durch sein blut /
 nemlich die vergebung der sünden nach
 dem reichthumb seiner gnaden / welche
 er vberschüttet hat vff vns. Auch Rō.
 3. Alle glaubigen werden one verdienst
 gerechtfertiget auß der gnaden Gottes /
 durch

durch die erlösung / so durch Christum
 geschehen ist / welchen Gott hat fürge-
 stellt zu einem gnaden stul / durch den
 glauben in seinem blut / 2c. Sie steht es
 klar genug / wer es anderst sehen kan /
 daß Gottes gnad vnd verzeihung der
 sünden durch das leiden vñ sterben Chri-
 sti schon erlangt ist / vñ tewer erkauft
 mit seinem blut / für alle die an in glau-
 ben. Welcher ein Rechter Christglaub-
 ger mensch ist / der ist gewiß in der gna-
 den Gottes / vñ sind im alle seine sünde
 verziehen durch den glauben in Jesum
 Christum / Rom. 4. 5. 8. Bedarff die
 gnaden Gottes nicht allererst mit gelt er-
 kauften. Des Pabst gnade kan mā wol
 mit gelt erkauffen / wer ir anderst be-
 gert. So man im mehr gelts gibt / so er
 gnediger ist. Das hat man in Teuschen
 landen wol offte erfahren : Aber Gottes
 gnade wird mit keinem gelt erlangt / son-
 der allein durch den glauben in Jesum
 Christum. Welcher nicht glaubet / der
 darff sich Gottes gnaden nicht vertron-
 sten : Sonder d̄ zorn Gottes bleibt vber
 im

im Johan. 3. Wan er schon dem Pabst
 alle tag hundert taußendt ducaten vmb
 ablaß gebe / were er im doch für Gott
 nicht eines hosenstels wert. Des
 Pabsts ablaß hilff die vnglaubigen fal-
 schen Christen nicht / die rechtglaubigen
 bedörffen sein nicht: ist deshalben
 ein vergeblich ding / vnd ein vnnutzer
 kost so darauff gewendet wird / ich ge-
 schweige der gotslesterung. In summa /
 so wir glauben / Reiniget vns das blut
 Jesu Christi von allen sünden / 1 Joh. 1.
 Dñ gar nicht des Pabsts ablaßbrieff /
 von denen zubeforgen ist / sie seien vff
 fuchsene heut geschrieben / Sie absolvie-
 ren die seckell sauber vom gelt / Gott geb
 wo die seelen bleiben. Darumb sie auch
 von den altē Lehrern genant werdē / Pie-
 frudes, quibus populus officioso errore ducatur sententia
 ad pietatem &c. Zu gutem theusch / Ein antiquoris
 geistlich betrug / ein kluge lügen. Non Doctorum
 enim impias fraudes dicere ausi fuerunt (quam de indul-
 nis ueritate cognouerint) prohibiti autoritate Pa gentijs.
 pe, eiuq; triplicis Coronæ aspectu, cuius fulgore
 totum excæcatus est orbis, & uere ductus officioso
 errore.

errore, ad summam impietatem. Nam coeci haec
 stenus fuimus omnes, Coecorumq; ductu cecidimus
 in foueam. Matth. 15.

Beichten im Jar ein mal alle sünden
 mit iren vmbstenden nach des Pabsts
 gefatz vñ gebott/ darnach für dieselbige
 sünden Buß entpfangen in meinung für
 sie gnug zuthun/ ist kein Christlich gutes
 werck / sonder ein gleißnerischs / freu-
 lichts / vnd vermesslichs / darzu ein gots-
 lesterlichs werck / Es ist gleißnerichs.
 Denn es geschicht nicht auß reinem vñ
 willigem hertzen Gott zu ehren / auch
 nicht auß liebe der fromkeit vnd gerecht-
 tigkeit: sonder auß lauterem zwang vñ
 Tyrannischer forcht / darumb kan es
 nimmermehr gut sein / noch Gott wol
 gefallen / dieweil es one glauben vñ
 liebe geschicht. Gott wil je in allen vn-
 sern wercken / die gut für im sein sollen /
 ein Keines glaubigs vnd liebends herz
 haben. Wo aber das nicht ist / da ist
 auch viel gleißnerey / verspottung vñ
 verachtung Gottes. One glauben mag
 niemands Gott wol gefallen /

11. Auch sol man Gott lieben von ganzem hertzen / seel / gemüß / vnd von allen krefften / Deut. 6. Matthei 22. Marc. 12. Luc. 10. Darzu haben wir nicht ein knechtlichē Geist empfangen / zur forcht / sonder ein kindlichen Geist / durch welchen wir schreien / Abba / hertz lieber Vater. Solchs geschrey geschichte nicht von denen menschen die auß gebott gezwungen / vnd getrungen seicheten / büßten / zc. vnd from sind. Den zwang vñ getrang ist / da ist kein kindliche liebe / kein lust noch guter wille / sonder eitel knechtliche forcht / vnlust vnd vnwil / daran Gott kein wolgefallen hat. Darum auch alle solche werck / die in forcht der straffe vnd vnwillen geschehen : lauther gleißnerey vñ vnchristlich sind / mögen deshalbē nimmer gut sein / geb was alle welt sonst auß irem gurduncken darzu sage vnd liege. Mit gebotten zwingen vnd tringen / mach man nichts den eitel gleißner / vnd nimmer mehr keinen Christen. Denn es fehlet alwegen am hertzen / welches Gott allein fordert.

I Zum

Zum andern ist das beichten aller
 sünden / nach des pabsts gebot / ein
 freuelichs vnd vermesslichs werck / denn
 es kan kein mensch vff erden alle seine
 sünde erkennen vnd wissen / Psal. 18.
 Wer ist der mensch der alle seine misse-
 that erkenne? **HERR** mach mich rein
 von meinen heimlichen sünden. Jere.
 17. Des mensche hertz ist vol böser dück/
 wer kan es erforschen? Niemants den
 Gott allein / Es ist alles sünde was an
 dem natürlichē menschen ist / Psal. 50.
 Ich bin in sünden empfangen vnd ge-
 born auß mütter leib. So stehn alle sin-
 vnd gedancken des menschlichen her-
 zens alle zeit zum allerbösesten / Gen. 6.
 vnd 8. Wie ist es denn möglich das nach
 des pabsts gebot / ein mensch alle seine
 sünde in 8 oren beicht künde erzelen / ich
 geschweige der vmbstende / &c. Darumb
 ist dieser bericht / ein ganz freuelichs
 vnd vermesslichs werck / wie denn auch
 der mensch ein freueler ist wider Gott /
 der solches gebot vff das arm volck
 treibt.

Zum dritten ist die Buß so in 8 Beichs
 vffgelegt vnd angenommen wird / in
 meinung damit für die sünde gnugzu
 thun / ein gotslesterlichs werck / schme
 lich dem Bittern leiden vnd sterben Jesu
 Christi. Denn so wir durch vnser werck
 für die sünde künden genugthun vnd
 die gerechtigkeit erfüllen: So were Chri
 stus vergeblich gestorben / vnd het sein
 blut vmb sunst vergossen / Gal. 2. So
 durchs gesatz gerechtigkeit kompt: so ist
 Christus vergeblich gestorben. Haben
 des gesatz werck / die doch Gott selbst
 gebotten hat / die Juden nicht mögen
 from vnd von iren sünden ledig mache:
 viel weniger werden vnser erdichs
 te werck menschlicher gesatz solchs
 aufrichten / sonder Christus hats alles
 volkornlich außgericht / durch seinen
 tod vnd blutvergießen / Er hat vnser
 sünde ganz gebüßet am Creutz / vnd
 dieselbige Buß zu einem geschenck / ala
 len denen die an in glauben bis zum
 ende der welt / Esa. 53. Vnser straff
 ist ganz all vber in kommen / vnd in
 J ij seinen

seinen wundenstreymen sind vnserē
 wunden heil worden. Merck da / er
 spricht vnser straff / das ist / die straff
 (welche wir Buß nennen) die wir von
 vnser sünden wegen solten leiden / ist
 ganz all vber in Komē/das ist/er hat sie
 ganz miteinander für alle glaubigen ge-
 tragen vnd gelitten / wie der nachfol-
 gendt Text sagt: Vnser aller sünde ist
 vff in gefallen/er hat kein sünden straff
 noch buße (wie die Päßtler danon
 handlen) lassen vberbleiben für die glau-
 bigen in nachfolgender zeit zu tragen.
 Denn welche in Christo Jesu sind: die
 haben kein verdammuß/Kom. 8. Noch
 viel weniger werdē sie andere straff für
 die sünden müssen leiden / dardurch für
 sie gnug geschehe. Er hats ganz vnd
 all außgericht/wo er noch etwas vber-
 entzigs da hette lassen bleiben/ vñ nicht
 ganz alles volkōmlich außgericht het-
 te: wie möchten den seine wort bestehn
 die er im Nachtmal geredt hat: Nemet
 hin vnd trincket alle darauff / das ist der
 Kelch des Newen Testamēts in meinem
 Blut

Blut das für euch vnd für viel vergossen
 wird / zu uerzeihung der sünden. Siehe
 da / die sünden sind schon verziehen al-
 len glaubigen mensche durch das blut
 vergiessen Christi / vnd werden nicht
 allererst / durch menschliche Bußwerck
 verziehen. Solches trüct auch Esaias
 auß in seinem obenangezogenē spruch /
 also : In seinen wundenstreimen sind
 vnser wunden / das ist / sünden / heil
 worden. Er spricht in seinen wunden-
 streimen / nicht in vnsern Bußwercken.
 Summa Summarum : Das blut Jesu
 Christi reiniget vns von allen sünden /
 1. Joh. 1. Vnd kein Pabstliche Bußbul-
 len noch brieffe. Lese Paulum Ephe. 1.
 Rom. 3. Coll. 1. et 2. 1. Pet. 2. Heb. 9.
 2c. Befindet sich also / daß die Papi-
 stische Bußwerck / damit man vermei-
 net genug für die sünden zuthun / gottes-
 lesterlich / vnd dem leiden Christi nach-
 theilig sind. Hiemit wil ich nicht ver-
 werffen die rechtschaffene Christliche
 Buß / welche S. Johannes der Tenffer /
 vnd nach im Christus sampt seinen
 J in Apo

Aposteln geleret vnd geprediget habent
 der in nit fürgeben werck / damit für
 die sünde gnug zu thun / sonder allein
 Besserung des lebens im glauben Jesu
 Christi. Welcher mensch solche buß
 annimpe / dem hat Christus seine sünde
 warlich gebüßet / bedarff keines büßens
 mehr. Welcher aber nicht glaubt / den
 wird kein Papistisch buß helffen / er thu
 was er wolle / wan er schon aller Kar-
 tenzer Kutten vff einen hauffen anzo-
 ge / vnd nichts mehr den eitel steinfrey-
 Auch wil ich hie nit verwerffen / die
 Rechte Christlich beicht / so in der heil-
 gen geschriffte gegründet / vnd ein ieg-
 licher mensch zu thun schuldig ist / der
 anderst selig werden wil / nemlich die
 Beicht des glaubens gegen Gott / vnd
 die beicht der liebe gegen dem nechsten.
 Von der ersten sagt der heilig Johan-
 nes in seiner ersten Epistel am ersten
 Capitel: So wir Gott vnser sünden
 bekennen / so ist er trewe vnd gerecht /
 daß er vns die sünde verzeihe / vnd vns
 reinige von aller vngerechtigkeit. Also
 hat

hat gebeicht der Prophet David / Psal.
 31. **HERR** ich mach meine sünd offen-
 bar / vñ verhele meine missethat nicht /
 Ich sprach / ich wil dem **HERRN**
 meine sünd bekenen wider mich / da ver-
 gabest du mir die missethat meiner sün-
 den. Dergleichē findet man viel bey dem
 Propheten David / von bekantnuß der
 sünden / Nemlich im 50. psal. Sagt er:
HERR ich erkenne daß ich vngerechte
 bin / vnd mein sünde ist mir allezeit vor
 meinen augen / ich bin dir allein ein sünd
 vñ vbelthätter. Also haben gebeicht die
 Juden / so von Jerusalem kamen zu der
 Predig vñ Tauffe Johānis an dē Jor-
 dan / Matt. 3. Also hat gebeicht d̄ heilig
 Paulus / da im d̄ **HERR** ruffet / Act. 9.
 Vñ widerumb / 1. Timo. 1. Sagt er / Ich
 bin d̄ grōß vñ sūrnembst̄ sünd: aber ich
 hab barmhertzigkeit erlanget / ꝛc. Also
 hat gebeicht d̄ heilig Paulus / Aber nicht
 mit worten / sond̄ mit trenen der angē /
 in bitterkeit seines hertzen / Matth. 26.
 Also auch die sūnderin / die da saß zu
 des **HERRN** fūßen in dem hauss
 Simonis / Luc. 7. Also hat gebeicht der

Item latro
in cruce.

zolner / Luc. 18. **HERR** sey mir armert
 sündler gnedig. Also hat gebeicht der ver
 lorn sohn (welchē der **HERR** in gleich
 nuß anzeigt) Vater ich hab gestündi
 get in den himmel vnd für dir. Diese
 Beicht ist allen menschen vonnöten / vñ
 one sie mag niemandts selig werden.
 Es bedarff aber nicht viel erzelens mit
 stückweiß nacheinander sampt iren
 umbstenden / wie die Pāpistische kirch
 erfordert : Sonder allein daß sich der
 mensch mit demütigem hertzen / alle zeit
 für Gott erkenne vnd bekenne / als einen
 armen vermaledeiten sündler / der Götts
 licher gnaden vnd barmherzigkeit not
 türfftig sey zu der seligkeit / Auch festig
 lich glaube / Gōtt wölle im solche gna
 de nach seiner zusage gewißlich mitthei
 len durch Christum seinen liebē Sohn
 welcher alle vnser sünde auff seinem
 Ruck getragen hat / Esai. 53. Vnd teil
 wer bezalet. Von der ander Beicht der
 liebe / durch welche sich ein mensch mit
 seinem nechsten versonet / dem er etwan
 leidts gethan hat / sagt der **HERR**
 Matth. 5.

Matth. 5. Wan du deine gabe zu deines
 Altar tregst / vnd daselbst ingedenck
 wirst / daß dein Bruder etwas wider
 dich hat / so laß deine gabe daselbst lie-
 gen / gehe hin vnd versöhne dich vor mit
 deinem Bruder / 7c. Luc. 6. Vergebenet /
 so wird euch vergeben / Matth. 18. Mein
 himlischer Vater wird euch auch also
 thun / das ist / er wird euch auch nicht
 verzeihen / so ihr nicht vergebet von her-
 zen ein ieglicher seinem Bruder seine sele.
 Vnd widerumb / Sündiget dein Bruder
 wider dich / straffe in allein / 7c. Von
 dieser Beicht sagt auch der heilig Jaco-
 bus / Jac. 5. Bekennet einander ewere
 sünde / vnd bittet Gott einer für den an-
 deren / vff daß ihr selig werdet. Ohne
 diese Beicht kan auch niemadt selig wer-
 den / An welche vns ermanet das gebet
 das vns Christus geleret hat / als offte
 wir sagen / Vergebe vns vnser schuld /
 wie wir vnseren schuldigern vergeben.
 Siehe da steht die Beicht / vñ also lauts
 bey einander / wer sie recht verstehn kan.
 Davon Hieronymus / Augustinus /
 I v Ambros

Ambrosius / vnd andere lehrer auch re-
 den / so offt sie des beichtens gedencken.
 Darumb sol man irer schrifftten recht
 acht nemen / denn sie reden nichts von
 des Pabsts erdichten vñ erzwoungenen
 orenbeicht / welche nichts anderst ist /
 denn des Teufels merzelschragen / dara-
 auff die armen gewissen gemartert vnd
 gepeiniget werden / vnd etwan getrie-
 ben in verzweiffelung zu irer ewiger ver-
 damnuß / welche viel billicher durch
 heilig Euangelion getröstet vnd be-
 festiget solten werden in der gnaden
 Gottes zu seliger hoffnung des ewigen
 lebens. Der merzelschrage ist vielen nutz
 gewesen / darumb hat die schimmer-
 oberhand genomen / gar beynach in
 allen winckeln / Gott wolle es bessern.
 Die orenbeicht / wiewol sie nicht grunde
 hat in der heiligen geschriffte / verwir-
 fe ich sie doch auch nicht ganz aller
 gezwungen vnd getrungen / nicht durch
 gebot / straff oder Pein : Sonder
 ganz freywilliglich vnd auß hertze-
 licher

licher Begirde / eines gerüigen stillen
 vnd freidsamen gewissens. Da ein
 mensch erwan sonderliche irthumb in
 sachen des glaubens hat / oder sonst
 eigene anfechtunge erwan heimlich in
 seinem hertze leidet: da ist es nicht böse
 sonder fast nutz vnd gut das ein sol-
 cher mensch / nicht allein einmal im
 Jar / vnd eben vff die Osterlichzeit:
 Sonder so offft vnd dick men sein ge-
 wissen treibt / zu seinem pfarherr vnd
 hirten gange / der ime das Euangelium
 Prediget / oder sonst einen frommen ge-
 lerten Christen suche / dem er klage vnd
 sage sein anligens vnd brauch diese
 heimliche beicht / Nicht das er ein gut
 werck damit aufrichten wolle / oder
 sich von sünden weiß wäschen / son-
 der das er rath vnd trost seines irri-
 gen vnd vnriügen gewissens hole
 auß dem gnadenreichen wort des
 heiligen Euangelij / durch welches
 worts glauben / im seine sünde zu-
 vor verziehen sind / in Krafft des totis
 Christi /

Christi / vnd nicht der Beicht. Solche
 frey willige Beicht / darin rath vnd
 trost der armen angefochtenē gewissen
 gesucht wird: hab ich nie verworffen/
 sonder alwegē gerümpft vnd gelobt/
 als ein guts Christlichs werck / dar
 durch auch Gottes ehre gesucht wird im
 namen Jesu Christi / welcher den ver
 heißen hat / daß er selbst mit vnd gegen
 wertig sein wolle / so offft zwen oder
 drey in seinem Namen versamlet sind /
 Matth. 18. Aber des Teufels verzweif
 felten martzelschragen sampt seiner mör
 derey vnd schinderey / habe ich offft ver
 worffen / vleiße michs auch noch inen
 umbzustossen wo ich kan / vnd so viel
 mir Gott seine gnade darzu verleihet.

Zum heiligen vnd halben Sacra
 ment geht im Jar ein mal / auß ges
 bott vnd ordnung des Pabsts: ist ein
 gleiches lesterwerck / wie auch das
 Beichten. Denn der heilig Paulus sagt 1.
 Cor. 11. Ein mensch d̄ des **HEILIGEN**
 Nachmal empfangen wil / der prüfe
 vnd bewere zuvor sich selbst / Nämlich
 wie

wie sein hertz stehe im glauben gegen
 Gott/ vnd in der liebe gegen dem nech-
 sten/ als den esseer von dem brot / &c.
 Vnd sage nicht/ Ein mensch hab acht
 darauff/ wan es im der Pabst gebeut/
 so kömme er herzu. Darumb ist die ent-
 pfahung des heiligen Sacraments /
 vmb des menschlichen gebots willen/
 gleisnerisch vnd gotslesterlich/ wie die
 gebotten beicht one glauben vnd liebe.
 Ober das so hangt dieser Päbstische
 entpfangnuß des heiligen Sacraments
 an/ die ewige verdammnuß/ wo sie nach
 erlanter warheit freuenlich gehandelt
 wird. Denn je Gottes wort vnd werck/
 da öffentlich zerrissen / veracht vnd
 verspot werden in halbierung des heili-
 gen Nachmals Christi/ welche halbier-
 rung ein gewisses zeichē ist des verzweif-
 felten vnglaubens/ da der mensch mit al-
 len worten Christi ganz von hertzen
 glaubet. Nemlich denen: Trincket alle
 darauff/ daß ist 8 kelch/ &c. Da glaube
 er dem Pabst mehr den Christo / denn
 er trincket des ~~HERREN~~ kelch nicht/
 sonder

sonder isset allein vom brot / wie in der
 Pabst heist / deshalb er vermalediet
 ist. Jere. 17. Vermalediet ist / der
 sein vertrauen vff einen menschen setzt.
 Welcher aber nicht glaubt vnd verma-
 lediet ist / der kompt auch nimmer
 würdig zu des **SACRAMENT** tisch / er
 wird schuldig an dem leib vnd blut
 Christi / er isset vnd trinck in selber
 das gericht zum ewigen tod / wie
 Paulus sagt / 1. Corin. 11. Darumb
 das halb Sacrament empfangen / nach
 päpstlicher ordnung vnd gebot (welche
 der ordnung vnd befelch Christi
 widerwertig vnd schmechlich sind) ein
 vnchristlich / vermaledets werck ist /
 vnd mag auch nichts bessers darauß
 werden / so lang als Christus der war-
 hafftig Sohn Gottes bleibt sitzende zu
 der rechten des Vaters / vnd allen ge-
 wald hat im himmel vnd vff erde /
 Matth. 28. Auch keinen gewalt geben
 hat weder dem Keiser nach dem Pabst
 oder den Concilijs / sein wort zu endern
 noch zu zerreißen / denn es muß ewig
 bleiben /

Bleiben / Matth. 24. Die weltweiffheit
 rümen sich gleich wie sie wollen / 2c.
 Vom Sacrament / leß mehr / oben im
 fünfften Artikel / alhie ist es iezunde
 gung.

Nicht fleisch essen an freytagen vnd
 Sampstagen / oder Milch / Keff / Ayer /
 Butter an etlichen verbanten tagen /
 nach Päßtlichem gebot / ist kein gut
 Christlich werck od Gottesdienst: son-
 der es ist ein Aberglaubiger irthumb / ge-
 flossen auß des Teufels lehren / 1. Timo.
 4. Der geist sagt / daß in den letzten zeite
 werden etliche von dem glauben abtre-
 ten / vñ anhangē den irrigen geistern vñ
 lehrend Teufel / vñ verbieten ehelich zu
 werden / vñ zu meidē die speisse die Gott
 geschaffen hat zu nemen mit dancksa-
 gung den glaubigen so die warheit er-
 kant haben. Denn alle creatur Gottes
 ist gut / vñ nichts verwörfflichs dz mit
 danckfagung entpfangen wird / denn es
 wird geheiligt durch das wort Gottes
 vnd das gebet. Es ist zum andern
 ein gleißnerisch werck / Col. 2. So jr seie
 gestorben

gestorben mit Christo von den weltlichen satzungen / was lasset ihr euch den fahen mit satzungen / als weret ihr lebendig: Die da sagen / Du solt das nicht anrüren / Du solt das nicht essen noch trincken / Du solt das nicht anlegen / welches sich doch alles vnder handen versert / vnd ist nach gebotten vñ lehren d menschen / welche haben wol ein schein der weißheit (da merck die gleisnerey) durch selbst erwelte geistligkeit vnd demut / zc. Im selbigen Text gleich für diesem / sagt der heilig Paulus: Lasset euch niemants gewissen mache vber speiß oder tranck / zc. Solget hernach / Lasset euch niemants das ziel verrucken der nach eigener wahl einher geht in demut vnd geistligkeit der Engel / des er nie keins gesehen hat / vnd ist one sache vñ geblasen (merck die hoffertig gleisnerey) vnd helt sich nicht an dem haupt das ist / an Christo. Es ist zum dritten ein dorechtig vnd vnnutz werck / Zebred 13. Lasset euch nicht mit mancherley vnd frembden lehren vmbfüren / dem es ist

es ist gut durch gnade das hertz befestigen / nicht mit speisen / durch welche kein nutz haben empfangen die darinnen gewandelt haben. Es ist zum vierden ein Jüdisch / lügenhafftigis fabelwerck / das von der warheit abwendet / Tit. 1. Straff die Creter hart / vff dass sie gesundt seyen im glauben / vnd nicht achten vff die Jüdische fabeln vnd menschen gebot / welche die warheit abwenden. Den reinen / das ist / den glaubigern ist alles rein / den vnglaubigen aber vnd vnreine / ist nichts rein / sonder vnrein ist beide ihr sin vñ gewissen / zc. Sie her gehört jertzundt der spruch Christi zu einem beschluß / Matth. 15. Marc. 7. ob vileicht jemandes an dem frommen Paulo keinen gnügen haben wolt. Also sagt aber Christus : Was zum mund ingehet / das verunreiniget den menschen nicht : Sonder was zum mund außgeht / das verunreiniget den menschen. Folget hernach was zum mund ingehet / dz gehet nicht ins hertz / sonder in den Bauch / vnd wird durch

Z den

den Natürlichen gang außgeworffen
 (darumb sind die speißheiligen eitel
 winckelheiligen / die ire heiligkeit vff ein
 treck / mit züchten / Bawen) aber was
 zum munde herauß geht / das kompt
 auß dem hertzen / vnd das unreiniget
 den menschen. Denn auß dem hertzen
 kommen böse gedanken / Mordt / Ehe
 bruch / Hurerey / Diberey / Falsche Ge
 zeugnuß / Lestering / Geitz / Schalck
 heit / List / Onzucht Schalcksaugen /
 Hoffart / thorheit: alle diese böse stuck
 gehn von inen herauß / vnd machen
 den menschen unrein. Von freyheit der
 speiß / lese / Rom. 14. 1. Cor. 6. 8. 10.
 Gal. 4. Luc. 10. Act. 10. 11. Denn alle
 speise sind one vnderschiedlich alle tage
 einem Christen frey zu niessen / vnd hat
 kein mensch gewalt dem Christē volck
 sonderliche tage vnd zeit / weder zu fast
 sten noch zu feyren / bey einer todsünde
 vffzusetzen / oder zu gebieten bey dem
 Bann. Welcher mensch sich aber sol
 ches zu thun vndersteht / der branche
 seinen eigen mutwillen wider Gottes
 wort

wort / vnd sol im kein Christen mensch
gehorsam sein / er wölle denn Gottes
wort verleugnen / vnd des Teufels lehr
anhangen.

Bruderschafften vnd Münchsor-
den stiftten / oder vffrichten / ist kein
gotsdienst / sonder ein götzendienst.
Den viel mehr den Creaturen darin ge-
horsamt vñ gedienet wird / den Gott.
Sie haben je allesamt ire sonderliche
vnd eigene Patron / vff welche sie ir ver-
trawen vnd zuuersicht stellen / Sancti
Dominicum / Franciscum / Leonhardi
Sebastianum / &c. Darumb sich
in solche Bruderschafften oder orden
mit gelöbten vnd Aytten verpflichten /
auch kein gut Christlich werck ist / noch
sein mag / sond es ist ein trewolß werck /
dardurch ein mensch / mit verachtung
seiner taußgelöb / abtrinnig wird von
Gott / vñ von d einigkeit der gemeinē
Bruderschafft aller Christglaubigē men-
schen / die sie habē in dem einigē Patron
vñ miebrud Christo Jesu. Den bey dem
Tauß / werdē alle getaußten Gott dem

R ij S R R

SECRET verlobt vnd zu eigen erge-
 ben / vnder sein Reich / als sein eigen
 außerswelttes volck / welches Reich be-
 griffen ist in dem gnadenreichen Euan-
 gelio Jesu Christi (nit in Sanct Fran-
 ciscus oder Dominicus Regelen) Dar-
 zu werden sie durch die gaben des heil-
 gen Geists im glauben / ware Kinder
 vnd erben Gottes / auch alle sampe
 Brüder vnd miterben Christi / Rom. 8.
 Gal. 3. Die alle güter / gaben vnd gnas-
 den Gottes ires himlischen Vaters /
 gleich miteinander one absönderung ge-
 mein besitzen / haben vnd gebrauchen
 als glieder eines leibs / Rom. 12. 1. Cor.
 12. Diese gemeine bruderschaft aller
 glaubigen / wird außgetruckt mit einem
 sonderlichen Artickel des glaubens / da
 wir sagen: Ich glaub ein heilige Christ-
 liche Kirch / gemeinschafft der heil-
 gen / das ist / der frommen Christen
 allesampt / die von anbegin der welt
 her gewesen sind / vnd noch sein wer-
 den bis an das end. Es sagt auch Christ-
 tus da von / Matth. 23. Einer ist ewer
 Vater

Vater der im Himmel ist (mit Dominicus / Franciscus / Pater Prior, Pater Guardian) ihr aber seid alle Brüder / nicht ihr die sich von allen menschen absündern / in die Clöster lauffen / einerley farben Kleidung tragen / sich rottiren vnd zusamen verpflichten vnder menschliche Satzungen / Regeln vnd Statuten / vnd nach irem eigenen fürwitz leben / in erdichtem gehorsam / falscher armut / vñ in gleiffender herzhürischer Keuschheit: Sonder ire meine Apostell vnd alle menschen die in mich glauben / mein Euangelische lehr hören vnd nach derselbigem leben / jr alle seid Brüder vnd habt Gott zu einem Vater / des Kinder ihr seid. Wie auch der heilig Paulus sagt / Gall. 3. Ir seid alle Gottes Kinder durch den glauben an Christum Jesum / denn wie viele wer getaufft sind / die haben Christum angezogen. Siehe da / alle die da glauben dem Euangelio / getaufft werden / vnd also Christum anzihen: Die sind rechtgeschaffene Brüder Christi vñ Kinder Gottes / vñ nicht die menschē die

K ij in die

in die klöster lauffen / mensche satzung
 vnd Regeln halten / vnd schwarzer
 weisse / oder grawe kutten anziehen. Die
 heilige geschriffte weiß nichts von inen
 zusagen / noch von iren obseruantzern.
 Vnd wan sie schon noch so grosse heil-
 ligkeit fürgeben / so ist sie doch nichts
 anderst / den ein Pharisaischer heffel od-
 sawerteig / darfür vns d̄ **SERR** war-
 net / **Matth. 16.** Ferrers sagt auch der heil-
 lig Paulus / von der algemeinen Christ-
 lichen bruderschaft / **Ephe. 4.** Ich er-
 mane euch in dem **SERR** / daß ih̄
 wandelt wie sichs gebürt ewer̄ beruff /
 darin ih̄ auch beruffen sind / vff einerley
 hoffnung ewers beruffs. Ein **SERR** /
 ein glaub / ein tauff / ein Gott vñ Vater
 vnser aller / d̄ da ist vber vns alle / vnd
 durch vns alle / vñ in vns allen. Sie steht
 aller Christen bruderschaft klarer denn
 der helle tage / darwider die falschen Brü-
 der nicht muffzen können / welcher
 ding nichts den̄ eitel betrügliche verfüh-
 rung ist / ich geschweige daß es ein gut
 werck sein solt. Sage hieruff alle men-
 schen /

fchen / sie seyen was standts sie wöllen /
 die inen neben Gott erwelen vñ vffwerf
 fen / es sey in od aufferhalb den klo-
 stern / andere newe Väter od Patronē /
 vñ denen sie sich vō anderē gemeinen
 Christen absondern / vñ in eigenē newē
 Bruderschafftē / auch mit eygenen selbst
 erdichten werckē / Regeln vñ Statuten
 verloben vñ zusammen verpflichten / vñ
 damit ein eigenen weg suchen zu dem
 himel / den sonst niemāds wissen noch
 gehn sol / den welcher irer secten ist. Alle
 diese menschē verachten vñ verleugnen
 ire erste tauffgelöbd / mit welcher sie
 Gott dē himlischē **HERREN** vñ Va-
 ter ergeben sind vñ verzeichnet allein vñ
 der seines Regiments gehorsam. Sie
 lestern das heilig Euangelion Jesu
 Christi (welches gleich als ein gemein
 regel aller Christen ist) durch ire selbst
 erdichte menschenatzungen vñ Bea-
 geln / die wider das Euangelion sind /
Matthei 15. Sie stellen die offent-
 liche bekantnuß des heiligen Christ-
 lichen glaubens in einen vergeß /
Z iij **N**emlich

Nemlich diesen Artikel: Ich glaub eine
 Christliche kirch/gemeinschaft der heil
 ligen/denn ihre sonderliche brüderschafft
 ten sind darwider. Sie trennen sich ab
 von der gemeinen brüderschafft aller
 Christglaubigen menschen / vnd ne
 men inen für eigene werck / form vnd
 weiß selig zu werden/wider die klar lehe
 Pauli / 1. Cor. 1. Ich ermane euch/
 liebe Brüder / durch den Namen vn
 sers **HERRN** Jesu Christi/dass ihr
 alzumal einerley gesinnet seid / vnd
 lasset nicht zwitteracht vnder euch sein:
 Sonder dass ihr vollkommen seid in einē
 sin/vnd in einerley meinung. Denn mir
 ist vorkommen dass zancf vnder euch
 sey. Ich sage aber dauon dass einer vnd
 euch sagt / ich bin Paulisch / der ander
 ich bin Apollisch / der drit ich bin Ce
 phisch / der vird ich bin Christisch.
 Wie: Ist Christus nun in stück geteilet:
 Ist dan Paulus für euch gecreuziget:
 od sind ihr in Paulus Namē getaufft:
 Sihe da / wie wöllen sich hie verant
 worten bey diesem spruch die ordens
 Brüder

Brüder vnd schwestern: Vileicht wer-
 den sie sagen: Ja wir nennen vns nicht
 Paulisch/ Apollisch/ Cephisch: Son-
 der Augustinisch/ Francischisch/ Bene-
 dictisch / 2c. Darumb geht vns dieser
 spruch Pauli nicht an. Darauff gebe
 ich inen gleiche Antwort mit Paulo/
 vnd sage: daß sie gleich als wenig in
 Sanct Augustinus oder Benedictus na-
 men getaufft sind/ Als wenig auch die
 Corinther in Paulus Namen getaufft
 waren. Augustinus oder Franciscus
 sind auch gleich als wenig für sie gecreuz-
 tiget / als Paulus für die Corinther.
 Darumb mögen sie sich mit keiner ent-
 schuldigung/ solcher sonderlicher Pa-
 tronon Christlich rümen. Wo sie es
 aber freßlich mit wissen thun / vñ sich
 öffentlich wider die warheit des heili-
 gen Euangelij stellen: so verlaugnen sie
 den gecreuzigten Jesum Christum / in
 des Namen sie getaufft sind / vnd sein
 heilige gemeine Christliche Kirch. Wer-
 den also mit der ersten tauffgelöbte ver-
 schung vnd zu lez mit der offentlichen
 B v verlaug.

verlaugnung Christi / sampt seiner all-
 gemeinen Kirchen / herliche / geistliche
 Gotsböswicht / Treuloß an Gott dem
 Vater vñ seinem Sohn Jesu Christo /
 deß sich doch allein alle Christen rü-
 men mögen vnd sollen. Denn er allein
 für vns gecreuziget ist / so sind wir
 auch allein in seinem Namen getaufft /
 der ein Göttlichs wesen hat mit dem
 Vater vnd heiligen Geist / ist auch
 sonst kein Nam vnder dem Himmel
 darin wir selig werden / denn in dem
 Namen Jesu Christi / Act. 4. Was
 Bedarffs denn solchs prechtigen rü-
 mens von Sanct Augustino / Domi-
 nico / Benedicto / ꝛc. welche die ora-
 dens leuth / mit sonderlichen Regeln /
 Statuten vnd heiligscheinendem leben
 fährgeben : So wir doch allein durch
 Christum vñ sein geglaubtes Euange-
 lium selig werden. Ja was sind alle
 orden vnd sonderliche erwelte Brüder-
 schafften nutz : Furwar nichts / Ein-
 pful sind sie alles vbel. Denn Gott
 vnd sein wort werden durch sie veracht
 vnd

vnd vndergetruckt. Da sihet man nun
 was Bruderschafft vnd Mönchs or-
 den stifften für ein guts werck ist / wel-
 ches freylich keinen frommen Christen
 gelustē wird / d̄ Euangelischer warheit
 berichte ist. Er wird sich auch hüten
 daß er seine Kinder vnd andere Befreun-
 te in solchen wüsten kloster grewell
 mit stecke: Vnd wo sie darin stecken/
 wird er inen mit allem vleiß heraus
 helfen / vnd kein zeitlich gut noch
 hab ansehen/auff daß die armen see-
 len erret werden / die sonst in solchen
 Teufelspfulen jemerlich verderben müs-
 sen. Es ist nit zu sagen noch zu schreiben
 was grossen grewels in den klöstern
 vñ kuttē steckt. Gott wöl sich erbar-
 men/vñ bessern. Daß aber also viel hoch
 gelerten Doctores vnd dapffere leuth
 (nach der welt ansehen) darinnen
 stecken/die sich auch in keinē weg wölle
 vberreden lassen (den ire grosse kunst
 vnd dapfferkeit mag es nicht leiden)
 daß sie heraussē kōmen / vñ ein gemein
 Christa

Christlichs leben an sich nemen : das
 sol keinen frommen Christen bewegen/
 das er darumb die Clöster / die Teuffels
 mordgruben sampt irem wesen / für
 gut vnd recht achten wölle. Klein/
 nein / grosse kunst / weißheit vnd da-
 pfferkeit dieser welt / thut nichts zu den
 sachen / das vmb irent willen etwas gut
 vnd recht für Gott sey : Sonder allein
 vmb des einfeltigen vnd warhafftigen
 glaubens willen des wort Gottes / wel-
 cher durch die liebe dem nechsten dienen
 werden alle ding recht vñ gut für Gott.
 On diesen glauben ist alle kunst / weiß-
 heit vnd dapfferkeit aller meister vnd
 Doctorn / sampt irem wesen / sünde vnd
 vermaledeit vnd verdampft. Denn der
 spruch Pauli stehet fest / Rom. 14. Al-
 les was aussert halben dem glauben ist /
 das ist sünde. So sagt der HERR
 Esa. 29. Vnd wird angezogen vom he-
 ligen paulo / 1. Cor. 1. Ich wil vmbri-
 gen die weißheit der weisen (das ist /
 ich wil der hohen Phariseischen Docter
 kunst vnd weißheit / zu einer thorheit
 machen)

machen) vnd den verstand der verstandigen wil ich verwerffen (das ist / ire kunst vnd weißheit muß sie nichts helfen) Wo sind die weisen? Wo sind die schriffgelerten? Wo sind die erforscher dieser welt / die den weg zum himmel lernen / auß des Aristotelis philosophi. Sat nit Gott die weißheit dieser welt zur thorheit gemacht? Denn dieweil die welt durch ire weißheit / Gott in seiner weißheit nit erkent: gefil es Got wol / durch thorechte Predig selig zu machen / die daran glauben. Die thorechte Predig durch welche die glaubigen selig werden / ist das heilig Euangelion / welches Paulus / gleich darvor / ein wort vom Creutz heist. Das nennet er nun ein thorechte Predig / nit daß es an im selbst ein narheit oder thorheit sey / den es ist ein krafft Gottes zu der seligkeit aller glaubigen / Rom. 1. Vnd auch gleich hie vorn / 1. Cor. 1. Sonder darumb nennet er es ein thorechte Predig / daß es die hohen weltkünstler / weisen vnd dapffere Selden verachten vnd für
 ein

ein Narrheit halten / zu irer ewiger ver-
 damnuß. Von dieser hohen menschen
 zaal / sind auch die Kunstreichen dapffe-
 re Doctores vnd Ketzermeister / die wi-
 der die lehr Christi vnd der heiligen Apo-
 steln / in den Klöstern vnd Kutten stecken /
 besondere secten vnd Kotten machen
 neben den anderē gemeinē Christen / ꝛc.
 Verachten das heilig Euangelion
 öffentlich mit der that / vnd halten es
 für ein narrheit mit iren eigenen orden /
 Regelen vnd statuten / welche bey ihnen
 mehr gelten / denn alles was Christus
 vnd die Aposteln gelert haben. Das
 können sie nicht leugnen / Es ligt am
 tag / wollen dennoch vnder allen an-
 dern menschen / die redtlichsten / fromb-
 sten vnd geistlichsten gesehen sein. Aber
 des **W**ORTS wort steht steiff / die
 weil sie das heilig Euangelion verach-
 ten / ob sie schon die weld für sehr gelert /
 weise / fromme vnd dapffere leuth held.
 So sind sie doch für Gott nichts an-
 derst / denn elende gleisner / vnwissend /
 blind vnd grosse Narren / vast ähnlich
 den

den hochgelerten vnd weisen / von
 welchen der heilig Paulus / Rom. 1.
 schreibt / Also: Die weil sie erkantten
 daß ein Gott ist / vñ haben in nicht ge-
 preiset als ein Gott / noch gedäcket / sond
 sind in ire dichten eytell worden / vñ ihr
 vnuerstendigs hertz ist verfinstert: da sie
 sich für weiß hielten / sind sie zu narren
 worden. Dergleichen geschicht den ho-
 hen Doctorn vñ ordensleuten / Sie er-
 keñen Gott auch in d geschiffte / sie lesen
 vnd singen nacht vñ tag von im / Sie
 Predigen von im / vñ lehren dz volck:
 Aber sie ehren in nicht als ein Gott / denn
 sie glauben dem Euangelio Jesu Christe
 mit von hertzen / daß er ein vollkomener
 seligmacher sey / der vns durch seinen
 tod den himmel erworben / vnd auß
 lauter gnaden selig mache / sonst wur-
 den sie in kein stützen machen mit
 iren erdichten guten wercken vnd ver-
 diensten. Sie werden eitell in irem
 dichten / ire erdichten orden / Regeln
 vnd Statuten sind nichts wert / die-
 weil man Gott vergeblich dienet / mit
 menschen

menschen satzungen / vnd alle pflanzung die d̄ himlisch Vater nit gepflanzet hat / außgerent sol werden. *Mat.*
 15. Sie werden in ir̄ hohem verstand / vernunfft / kunst / vnd weißheit dieser welt ganz zu narren für Gott / *1. Cor. 3.*
 Darumb sol es keinen frommen Christen bewegen / so er schon solche hochgelerten Doctores / vnd weise Gotsnarren / sihet in den Klöstern vnd Kutten stecken / daß er vmb ires grossen ansehens wille / das Mönchisch wesen gut acht. Wan ein standt darumb gut solt sein / daß er kluge / weise vnd gelerte Personen bey ihm hat : So were der hellisch standt der verdampften auch gut (daß für vns Gott behüt) Den die verdampften haben den Teufel bey ihnen / der ist ja wol als kluge / weiß / vnd gelert / als alle Doctores auff einem hauffen in der ganzen welt. Diweil er aber Gottes feind ist / muß er in der Hellen verdampft sein / vnd ist aber darumb / der verdampften standt nit gut / daß sie ein klugen weisen / vnd gelerten Teufel bey ihnen haben : Also auch ist

ist der Mönchisch Klosterstandt darumb nit gut vnd Christlich / daß er viel hochgelerten Doctores bey im hat / die verstockt / halstarrig / vñ feind des heiligen Euangelij Jesu Christi sind / Ja er ist darumb desto böser / daß er mit solchen leuten besetzt ist / die klug vnd weiß in der Bosheit sind / von denen Hiere. 4. Sie sind klug vnd weiß böß zu thun : aber guts zu thun / wissen sie nit / zc. Also viel jezunden von den vñ christliche Bruderschaftē vñ Mönchsorden / die vnder einen guten schein im grundt nichts werdt sind. Es halt sie für gut wer da wil / so mögen sie neben dem heiligen Euangelio nicht bestehn.

Seelvesper / vigilien / Mess singen vnd lesen / oder auch andere gestifften werck thun für die todten vñ abgestorbene Christen / im namen inen zu helfen auß grosser quall / pein vnd marter / die sie leiden sollen im seggenwer / ist kein gut werck : Sonder ein Antichristisch schmechwerck / mit welchem das heilig Euangelion Jesu Christi lugē gestrafft

2 darzu

Darzu sein leiden vnd sterben verspott/
 geschmecht vnd gelestert wird. Daß
 zum ersten das heilig Euāgelion durch
 solche Antichristische werck lügenger
 strafft werde/ haben wir klärlich auß
 dem Euangelio Joh. 5. Da der **HERRE** al
 so sagt: Warlich warlich sage ich euch/
 wer meine wort höret/ vñ glaubt dem
 mich gesand hat/ der hat das ewig lebē/
 vnd kompt nicht in das gericht/ sonder
 er ist vom tod zum leben hindurch ge
 drungen. Das sind so helle/ klare wort/
 daß sie auch für den groben vnuerstan
 digen kaum klärlicher geredt möchten
 werden. Vnd ist wol zuuerrundern
 wie doch die hochgelerten ein segfeuer
 (darin die glaubigen seelen nach dieser
 zeit gemarttert vnd gepeiniget werden)
 darneben haben können ansehen. Was
 möchte doch klärlicher geredt werden/
 den da Christus sagt/ Wer meine wort
 höret/ vnd glaubt/ der hat das ewig le
 ben. Er hats schon gewiß vnd on alle
 hindernuß/ man darffs jm nit allererst
 erlangen mit Vigilien/ Messen/ oder
 anderen wercken. Er ist schon vom tod

zum lebē hindurch getrunge vñ kompt
 nit in das gericht. Sihe da abermals/
 kompt er nicht in das gericht: So wird
 er auch nicht geurtheilt: Wird er nicht
 geurtheilt? So wird er auch kein zorn
 trage noch keine straffe/pein oder mar-
 ter leiden. Die wort Christi sind ganz
 schlecht vnd gerecht/geb was alle men-
 schen liegen / die inen zum behülff irer
 irthums / die heilige geschriffte an viel
 orten nötigen vñ zwingē von irē rechtē
 natürliche verstand: Darzu auch viel er-
 tlicher nerrischer Exempel / Vision / vñ
 Teuffelischer Berrügigkeit sich vnuer-
 schampt gebrauchē zu schendlicher ver-
 fürung d̄ Christglaubigē mensche. Ein
 gleichen spruch habē wir Joh. 6. War-
 lich warlich ich sage euch / werdet ihz
 nicht essen vom fleisch des menschen
 Sohns / vñ trinckē v̄s seinē blut / dz ist /
 werdet ihz nicht an mich glaubē / zc. So
 habē ihz kein lebē in euch (den wer nicht
 glaubē / der ist verdampft / Matth. 16.)
 Wer v̄s meinem fleisch isset / vñ trinckē
 von meinem blut / das ist / wer an mich
 L ij glaubt

glaubt / der hat das ewig leben / vnd ich
 werd in am Jüngsten tag aufferwe-
 cken. Sibe da sagt Christus noch ein
 mal / daß alle glaubige menschen haben
 schon das ewig leben. Wer kan nun dies
 sen klaren worten widersprechen / oder
 anderst reden / denn wie der **HER**
 selbst redet : Haben die glaubigen das
 ewig leben / wer kans inen denn nemen?
 Ja wer wil sie darvon verhindernen: Vñ
 für ein weil ins heiß badt furen in der an-
 dern welt / darin sie müssen gefeget vnd
 gereiniget werden / ehe den sie zum leben
 kommen: Niemants. Es ist wol war
 daß nichts vnsaubers vñ beflechts zum
 leben in das reich Gottes kompt / Psal.
 14. Apoc. 21. Aber alle glaubigen sind
 schon geheiliget durch das leiden Chri-
 sti / sie sind gantz sauber geburt / gefeget
 vnd gereiniget durch den heiligen Geist
 im glauben des worts Gottes / vnd ha-
 ben nichts beflechts oder vnsaubers an
 inen / das sie vom ingang des ewigen
 lebens möge verhindern / Ephe. 5. Chri-
 stus hat sich selbst für die gemein gebē /
 auff

auff daß er sie heiliget / vnd hat sie ge-
 reiniget durch das wasserbad im wort /
 auff daß er im darstellte ein heilige ge-
 mein / die nit hab ein flecken oder run-
 zel / oder des etwas: Sonder daß sie
 sey heilig vnd vnsträfflich. Merck mit
 fleiß auff S. Paulus wort / Er spricht
 deutlich: Christus hat seine gemein ge-
 reiniget / 2c. Er hat sie schon gereini-
 get / vnd wil irs nit allererst sparen zum
 segfeuer / in der andern welt / Er hats
 auch gethan im glauben des worts / vñ
 wil es nit allererst außrichtē mit feuwer /
 wasser / hitz / kelt vnd was des erdichten
 dings in den segfeuerischen Exemplan
 gelesen wird. Also haben wir auch /
 Heb. 1. Der Sohn Gottes hat gemacht
 die reinigung d̄ sünden durch sich selbst.
 Siehe da abermals / Er hats gethan / vñ
 nicht vff ein ander zeit zu thun gespart /
 Auch durch sich selbst / wil es nicht auß-
 richten mit dem segfeuer vñ durch der
 psaffen Vigiliē vñ Messen. Widerum /
 Act. 15. sagt der heilig Apostel Petrus:
 Gott reiniget die hertzen durch den glau-
 b̄

ben / nicht durchs segfeuer in 8 andern
 welt. Sprichstu aber / **E**y sind wir doch
 sündler vñ sündigē noch alle außblick:
 Wie können wir den rein sein? Antwort:
Ja es ist war / in vns selbst sind wir sün-
 der / ganz vnrein / besleckt mit aller vn-
 gerechtigkeit / vermaledait vnd ver-
 dampt / wir können auch von vns selbst
 nicht besser werden / wir thun gleich
 was wir wollen : Aber in Christo dem
 Sohn Gottes vnserm. **HERR**
 vnd im glauben seines worts / sind wir
 ganz heilig / Rein / From vnd gerecht:
 seine heiligkeit / fromkeit vnd gerecht-
 keit / sind durch den glauben vnser er-
 gen / die beschönen vnd bedecken vns /
 das vnser sünde (die noch in vnserem
 fleisch stecken vnd onedie wir diß zeita-
 lich leben nicht hinbringen können) kein
 anschens für dem himlischen Vater ha-
 ben / auch vns nicht zugerechnet wer-
 den : Sonder durch Christum gnedig-
 lich nachgelassen vnd verziehen werden.
 Vff diese weiß redet der heilig Pro-
 phet Dauid / Psal. 31. Vnd nach im
 Paulus /

Paulus / Rom. 4. Von allen außewel
 ten: Woldem / dem die vbertrettig ver-
 geben sind / dessen sünd bedeckt ist / wold
 dem mensc / dem der HERR die mis-
 sethat nicht zurechnet. Solches wider-
 feret allen waren Christglaubigen men-
 schen / vmb Christi willen / ob sie schon
 sündler sind / will es doch der Vater
 nicht ansehen: Sonder alle ire sünde
 zudecken / vnd sie als lieb haben als
 Christum selbst. Vnd gleich als we-
 nig er Christum in ein segfeuer gesetzt
 hat nach seinem tod: Also wenig setz er
 auch die Christglaubigē nach irem tod
 in ein segfeuer / darin sie geplagt vnd
 gemartert werden / ꝛc. Davon hernach
 folgen wird. Nun ferrers vff die inrea-
 de / daß wir nit rein solten sein / darumb
 daß wir sündler sein: Sage ich also:
 in der nacht da Christus mit seinen Jün-
 ger das Abentessen gehalten hatte / vnd
 jertzunde zū tod wolt gehn: da warē die
 Jünger auch sünd / das bewisen sie her-
 nach öffentlich / da sie vō HERRen flo-
 hē: vñ in verleugnetē: nit desto weniger
 2 üij sagt

sagt Christus zu jnen / Johan. 15. Ihr
 seid jetzundt rein vmb des worts wil-
 len das ich zu euch gered hab. Christus
 nennet sie rein / nit vmb iret willen / denn
 sie waren sündler / vnd auch nicht heim-
 liche schlechte sündler / sonder öffentliche
 grosse sündler / die fast hart gestrauchlet
 haben : Er nennet sie aber rein vmb sei-
 nes worts willen / das sie von im gehört
 hatten / welches in nachfolgender zeit
 nach seiner aufferstehung vnd sendung
 des heiligen Geists / die reinigkeit durch
 den glauben würcken würd in iren her-
 zen. Also ist es auch mit vns / in vns
 selbst sind wir grosse sündler / können auch
 nichts (wan es am aller besten mit vns
 ist) denn sündigen / gehören des halben
 dem Teufel zu: Aber durch den glauben
 des heiligen Euangelij / sind wir rein /
 heilig / from / vnd außersweltliche liebe Kin-
 der Gottes durch Christum. Vñ gleich
 wie Christus in seinem sterbē am Creutz
 one alles mittel seinen Geist dem Vater
 befolhen hat / darzu auch dem Schecher
 on alles mittel das Paradeiß verheissen
 hat:

hat: Also auch komet alle Christglan-
 bigen nach irem tod one alles mittel zu
 Christo irem leben/ wie Paulus begert/
 Philip. 1. Man bedarff keiner vigilien
 oder Seelmessen darzu / Christus hat
 die vigilien selbst gehalten im anfang
 seines leidens am Olberg vnd in Cay-
 phas hauß / die ganze nacht: Die seel
 mess hat er gehalten am Creutz/ da er
 sich selbst ein vollkommens vnd ewig-
 werends opffer vffgeopffert hat seinem
 himlischen Vater / damit er ein ewige
 erlösung gefunden hat/ allen glaubigen
 seelen/ Hebre. 10. Vnd ein gute Presents
 verdienet / nit im selbst / sonder vns/
 nemlich den heiligen Geist mit seinen
 gaben/ on welches Geists gegenwertig
 keit/ keinem menschen heil oder seligkeit
 widerfaren mag. Den welche den Geist
 Christi nicht haben/ die seind nicht sein/
 vnd gehören in nicht an / Rom. 8. Wel-
 che aber Christum nicht angehören: die
 mögen auch nicht selig werden / We-
 weil niemants vffsteigt gen himmel/
 denn der herrab gestigen ist / der Sohn

des menschen der im himmel ist / Joh. 3.
 Auch zeyget die heilige geschriffte kein
 mittel an zwüschen der seligkeit vnd
 der verdammuß. Christus sagt / Marc.
 16. Welcher glaubt / &c. Der wird selig /
 welcher aber nicht glaubt der wird ver-
 dampft. Sihe / da ist kein mittel zwü-
 schen himmel vnd der helle in der andern
 welt. Der heilig Johan. sagt Johan. 3.
 Welcher dem Sohn glaubt / der hat
 das ewig leben : Welcher aber de Sohn
 nicht glaubt / der wird das leben nicht
 sehen / sond der zorn Gottes bleibt ober
 jm. Er ist verdampft on alles mittel.
 Matt. 7. sagt Christus nit mehr dem
 von zweyen wegen / Nemblich / von ein-
 engen weg / der gen himmel füret : vñ von
 ein breiten weg / der zu der Hellen füret
 one alles mittel. Luc. 16. wird der reich
 man in die Hell begraben / vñ Lazarus
 wird von den Engeln gefüret in den
 schoß Abrahe on alles mittel. Rom. 9.
 Beschreibet Paulus zweyerley gefest-
 nemlich des zorns vnd der Barmhertzig-
 keit one alles mittel. Die sprüch der heil-
 ligen

ligen geschiffe/so vff das seggenwer als
 ein mittel stadt zwischen himmel vnd
 Sellen gezogen werden / dasselbig zube-
 weren / sind allesamt von irem rechten
 verstand gezwungen vñ genötiget / wel-
 ches ein iglicher wol verstehn wird / so
 er dieselbige ört sampt dem anhangen-
 den Text / für vnd nachbeschrieben mit
 fleiß ansihet / ꝛc. Vff das man aber
 noch klärlicher sehe / wie das erdicht
 seggenwer dem heiligen Euangelio zu-
 wider sey: Sagt Christus Johan. 6.
 Wer von meinem fleisch isset / vnd von
 meinem blut trincket / das ist / wer in
 mich glaubt / der bleibt in mir / vñ ich in
 jm / vñ wird lebē vmb meinet willē / ꝛc.

Item / 1. Johan. 4. Welcher bekenet
 das Jesus Gottes Sohn ist / in dē bleibt
 Gott / vñ er in Gott / ꝛc. Item / 2. Cor.
 13. Erkennet ihr euch selbst nicht / daß
 Jesus Christus in euch ist: Es sey denn
 das ihr verworffen sind. Item Gall.
 2. Ich lebe doch nit ich / sonder Christus
 lebt in mir. Auß diesen vnd ires glei-
 chen sprüchen der heiligen geschriff / er-
 zwingt

zwingt sich mechtiglich / one alle widerrede / daß die pein des fegefeuers nach diesem leben / ein erdicht ding ist.

Rom. 9. Derhalben da Gott wolt zorn erzeihen vnd kundthun sein vermögen: hat er mit grosser geduldt herfürbracht die gefess des zorns / die da zur gericht sein zur verdammuß / auff daß er kundthet den reichthumb seiner herligkeit / vber die gefess der Barmhertzigkeit die er bereitet hat zur heiligkeit.

Augustinus ad Hieronymum.

S Jeber Bruder / ich halt nicht daß du deine Bücher woltest gleich der Apostel vnd Propheten Bücher gehalten haben / denn ich außser der heiligen geschribt Bücher / die andern alle also lese / daß ich nicht darumb alles glaub / das sie sagen / sie seyen wie gelet vnd heilig sie sein mögen

gen: Es sey denn daß sie mirs
mit der geschrifft/oder mit hel-
ler vernunfft beweisen: Eben
so wil ich auch leser haben vber
meine Bücher wie ich bin vber
die andern Bücher / Dist. 9. c.
Noli. Daß man keinen Vättern
glauben sol/ sie beweisen es den
mit der schrifft. *Idem ego soleo.*
Quis nesciat? Daß allein den
Biblischen geschrifftten/ als de-
nen / in welchen kein lügen vnd
vnwarheit ist / vor aller ander-
ren lehrer vnd Bischoffeschriff-
ten / wie heilig oder gelert sie
gewesen sein / sol geglaubt wer-
den. Denn die andern leser alle
mögen irren: die heilig schrifft
aber nimmermehr.

Item

Item Dist. 11. c. Consuetudinem, Augustinus / das ein gewonheit zuloben sey die dem Christlichen glaubē kein abbruch thue.

Item Leo Papa, c. Hoc nostrae. Das sich keins wegs gezime / das es auch nicht vngestraft bleibe / von der Apostel ein / sagungen zu weichen vnd die zuuber / treten.



Mißbreüch der Papistischen Meß.

GS zweifeln viel vñ frage darbey /
Was böß in der pfaffen Meß sey.
Solichs gibet diß büchlin zu lesen /
Daß sie für Gotswort nit mäg gnesen.

1. Corinth. 11.

Welcher unwürdig von des **S E R**
R E T Brot isset / vnd von seinem kelch
trincket / der ist vnd trincket im selbs daß
gericht (ob er schon die Meß für ander
leut liest) vñ würt schuldig an dem leib
vnd blut des **S E R R E T** / darumb
prüff sich der mensch selbs / ꝛc.

Meßlesen / auß stiftung-forcht-gäst-preser-
nat fürwar ganz ein strengen sentenz /
Darüb sich selbs ein Pfaff vor wol bewer-
Daß im Gotsgericht nit werde zu schwer.
Von

Von vnuerstendiger sprach der Mess.

Der erst Mißbrauch der Papisstis-
 schen Mess ist / daß sie bey dem
 gemeinen Christen volck / in vn-
 uerstendiger sprach / darzu auch heim-
 lich gelesen werden / daß niemants
 hört / noch versteh / was da geredt ob
 gehandelt wird / wider die lehr des heil-
 ligen Pauli / 1. Cor. 14. Da er sagt:
 Wan du mit dem Geiße Benedeyest /
 wie sol der / so an stat des Leyen stet /
 Amen sagen / auff deine danck sagung /
 Dieweil er nit weiß / was du sagest: Du
 sagest wol fein danck / Aber der ander
 wird nit danon gebessert. Ich wil in der
 gemein lieber fünff wort reden / durch
 meinen sin / das ist / mit verstandt / vff
 daß ich andere vnderweise / denn sonst
 zehen tausent wort mit der zungen / das
 ist / mit vnuerstandt. Nun weiß jeder
 man / daß die Pfaffen in iren Messen /
 mit zungen reden / daß es niemants
 vom gemeinen volck verstehet / was da
 geredt

Geredt würd. Zu dem verkünden sie des
SERREN tod nit/ so offte sie Mess
 lesen/ nach dem befehl Pauli/ 1. Cor.
 ii. So offte jr von diesem Brot esset / ꝛc.
 solt jr des **SERREN** tod verkündi
 gen/ biß daß er kompt. Also mißhand
 len die Pfaffen / zweifaltiger weis mit
 iren Messen. Zum ersten / daß sie das
 Christen volck blenden / vnd gleich zu
 narren machen / mit vnuerstendiger
 sprach. Zum andern / daß sie das volck
 berauben der speiß des worts Gottes /
 durch welches worts glauben / vnd nit
 durch ansehen des Sacraments / das
 ein ig leben von Gott verheissen ist. Wie
 kan man aber glauben einem wort/
 das weder gehört noch verstandē wird?
 Rom. 10. Darumb ist es fürwar ein Rom. 10
 blinder handel / mit der Papistischen Quomodo
 Mess / dz volck wird damit verderblich credent de
 in der finsternuß gefürt / denn das liecht quo non autē
 wird vnder das Sünern verborgen: dierent
 wer aber in der finsternuß wandelt / der ꝛc.
 wandelt vngewiß / vn̄ kan sich vor dem
 fall nit wol hüten. Darumb vns auch
 In Christus

Matth. 15. Christus Matth. 15. Getrewlich war-
net vor den blinden fürern / auff daß
wir inen nit nachfolgen / vnd mit inen
in die gruben fallen.

Von opfferung brots vnd weins in der Mess.

Der ander mißbranch ist / daß in
der Mess pur brot vnd wein für-
gestellt / vnd geopffert werden für
das heil der ganzen Christenheit / wie
Klein vnd groß Canon in der Mess selbs
offentlich bezeugen. Welches aber ein
warhafftige Abgötterei / vnd Teuffli-
sche Gotslesterung ist / da durch eine pu-
re Creatur / der seelen heil gesucht wird /
welches doch Gott allein geben kan /
Esaie 33. 43. Vnd Christus warer Gott
vnd mensch vmb dasselbig heil zu erlan-
gen / sich selbs hat müssen opffern / sein
unschuldigen leib in den tod geben / vnd
sein blut vergossen. Siche da was möche
doch für grösser Abgötterei getribē wer-
den / denn daß man pur brot vñ wein /
für ein Gott haltet: Seist das nicht auf
heidnische

Bildnische weiß Cererem vnd Bacchum
 verehret: Was möchte auch dem lei-
 den vnd sterben Christi/ schwächlicher
 vnd lesterlicher sein/ denn daß man Brot
 vñ wein opffert/ für der seelen heil/ vmb
 welches heils willen/ Christus sich selbs
 einmal geopffert/ am creutz gestorbē/ vñ
 sein Blut vergossen hat: Geltē Brot vñ
 wein als vil / als Christus sampt seinē
 leiden vñ sterben: Psuch d̄ Gotsleste-
 rüg. Wie kan doch ein fromer Christen
 mensch mit gutē gewissen darbei bleibē?
 Wollen aber die Pfaffen solcher ab-
 götterey vñ Gotslesterung in irer Mess/
 nit gestehn: So lege man inen ire eigne
 messbücher für / vnd besēhe den kleinen
 vnd grossen Canon fornen her / biß
 vff die wort des Nachmals Christi/ so
 wird der Gotslesterlich handel so klar
 für augen sein / daß in alle Pfaffen vff
 erden nit leügnen können / mögen sich
 auch mit keiner gloss behelffen. Denn
 da wird öffentlich mit grossen breiten
 Creuzen/ auff Brot vnd wein gedeutet/
 welche auch mit den hendē vffgehabē vñ
 M ij geopffert

dit seipsum

pro pecca-

tis nostris.

ut eriperet

nos ex hoc

seculo ma-

lo. &c.

Ephes. 5.

Exposuit

semetipsū

pro eccle-

sia ut illam

sanctifica-

ret, mun-

datam laua-

cro aque

per uerbū.

&c.

Tit. 2. De

dit semet

pro nobis

ut redime-

ret nos ab

omni ini-

quitate, &c.

geopffert werden / für die gemein Christlich Kirch / für der seelen heil / für den frieden / vnd vmb die erlösung der seelen von der ewigen verdammuß / Ehe den die wort des Nachtmals Christi dartzu komen / von denen sie glauben / daß dar durch brot vnd wein verwardelt werden / in den natürlichen leib vnd blut Christi / vnd ire eigen substantz verlieren. Es wil sich mit keiner glossen lassen verglumpffen / denn es ist ye gewiß / daß / nach dem die Pfaffen / das pur brot vnd wein geopffert haben : so bitten sie denn im grossen Canon / wie sie vorhin auch im kleinen Canon gebeten haben / daß es allererst der leib vnd blut Christi werden sol / in dem gebet das also anfahet / *Quam oblationem tu Deus in omnibus benedictam. &c.*

Hiemit sicht der Priester vñ / vnd spricht weiter. Welches opffer / O Got wir bitten dich / wöllest machen gebenedeyt ✠ zugeschrieben / ✠ fest / vernünfftig vnd angensem / daß vns werde / der leib vñ das blut / deines geliebten Sohns

Sohns vnseres **HERREN** Jesu Christi / 2c.

Vonder opfferung Christi in der Mess.

Der drit mißbrauch in der Mess ist/ daß mā sich da vnderstehet/ nach der Abgötischen opfferung des puren Brots vnd weins/ auch Christum selbs zu opfferen / durch die hand eines armen elenden sünders: Ja eines verstockten offentlichen Surers / der sol da ein mittler sein / zwischen Gott vnd dem mensche, welches doch Christo allein zustehet / 1. Timoth. 2. Vnd sol Christum den Sohn Gottes / alle tag opffern / für die sünd der lebendigen vñ todten / wider daß hell vnd klar wort Gottes / Hebre. 9. Wan Christus hette sollen offtmals geopffert werdē / so hette er offtmal müssen leiden / von anfang der welt her: Nun aber am end der welt / ist er einmal erschienen durch sein eigen opffer / die sünde vstzuheben / 2c. Rö. 6. Christus von todten erweckt / stirbt hin

Pfuch
des Mits
tlers.

M ij für nit /

Crucifige
Crucifige

furt nit / der tod wird nit mehr vber ih
herrschen. Aber opffern (von Christo
geredt) heist tödten / wie oben / Heb. 9.
angezeigt. Darumb wo Christus solge
opffert werden / da muß er getödet wer
den / leiden vnd sterben / vnd mögen
sich die Pfaffen in diesem fall / wan sie
Christum in der Mess wollen opffern /
hencers ampt nit endeschuldigen / sonit
an jnen ist. Das sacrificium laudis (das
von der Canon auch sagt) kan jnen den
handel nit glosieren / denn es ist ein an
der ding / Danckopffer opffern / vnd
Christum opffern. Sie mögen sich
auch nit außreden / mit der memoria sacri-
ficij / das ist / mit der gedechtnus / des ein
mal gethanen opffers Christi. Denn die
wort des Canon sein zu ganz klar / von
dem opffer Christi / das ja Christus / da
warhafftig geopffert werde / so offte vn
dick als man Mess list. Das kan se nit
allein ein memoria sein / darumb gilt die
ausred nichts / vnd ist ein nebel die sach
zuuerblümen. Das aber die Pfaffen vn
recht handeln / das sie sich vnderstehen
Christum

Christum in iren Messen offemals zu
 opffern / für die sünd der lebendigen vñ
 todten : soliches wird klar auß der Epi-
 stel Hebre. 9. Christus ist durch sein eigē
 Blut / einmal in das Heilig eingangen /
 vñd hat ein ewige erlösung funden. Si-
 he da / hat Christus selbs durch sein ei-
 gen opffer / ein ewige erlösung funden:
 was treiben denn die Pfaffen? Ent-
 weder die heilige schrifft leigt / oder
 aber die Pfaffen liegen / mit irer Mess-
 Den Knopff werden sie nicht auffbeis-
 sen / den er wird noch herter zugestrickt /
 in den nachfolgenden sprüchen. Widea-
 rumb / Hebre. 9. Christus ist einmal er-
 schienen / durch sein eigen opffer (nit
 durch der Pfaffen Messopffer) die sünd
 vffzuheben. Darumb die Pfaffen vnbil-
 lich gelt für ir Messopffer nemen / als
 solte die sünde allererst durch sie vff-
 gehaben werden. Item Christus ist ein Hebre. 9.
 mal geopffert hinweg zunemen viler
 sünde. Widerumb Hebre. 10. Wir Hebre. 10.
 seind geheiligt auff einmal / durch das
 opffer des leibs Christi. Solget her-
 III iij nach

nach: da Christus hat ein opffer für die sünd geopffert / das ewig gilt / ist er gefessen zu der gerechten Gottes / denn mit einem opffer hat er in ewigkeit vollendet die geheiligten. Sibe da abermals / hat Christus selbs ein solichs opffer gethon / das da ewig gilt: so muß von notwegen der Pfaffen opffer falsch / vnd fantasten werck sein: Gilt daß erst opffer Christi noch: Was bedarff man den der Pfaffen Messopffer / wan es schon auch gut vnd recht were / ja möglich / daß sie Christum noch mehr opffern könten. Folget hernach Hebre. 10. Wo vergebung der sünden ist / da ist kein opffer mehr für die sünd / Nun ist aber vergebung der sünden schon da / bey allen Christglaubigen / wie das Euangelion an viel orten klar anzeigt / darumb bedurffen sie keines opffers mehr für die sünd / die sünd sein schon dahin / durch das einig opffer Christi / vnd iren glauben. Der leib Christi ist in den tod gegeben vnd sein blut ist vergossen zur verzeihung der sünden /

den/wie Hieremie 31. Hebre. 8. Darumb
 welcher mensch kein gnügen hat / an
 dem einmal gethanen opffer / das da
 ewig gilt / vnd das Christus selbs auß
 gericht / damit er ein ewige erlösung
 funden hat / sonder wil noch meh: opf-
 feren: der verleugnet frey offensichtlich die
 verzeihung der sünden / durch das einig
 opffer Christi (auff einmal gnugsam
 vnd volkornlich geschchen) erlangt.
 Sibe zu/was möchte doch gewolichers/
 vnd verzweifelters bey den Christen ge-
 handelt werden / denn daß man das hei-
 lig leiden vnd sterben Christi also krafft
 loß helt / vnd allererst verzeihung der
 sünden durch andere newe opffer erlan-
 gen wil: Seist das nit Christum sampt
 seinem leiden vnd sterben schmehen
 vnd lestern: Seist das nit den heiligen
 Geist lügen straffen: Vnd die gschuffte /
 ja den heiligen Christlichen glauben ver-
 leügnen: Ist das ein vergeblichs wort /
 vñ ein nichtigkeit / daß die schrift sagt/
 Christus habe durch sein selbs eigens
 opffer / ein ewige erlösung funden / vnd

N v daß

daß es auch ewig gelte: Was heist/
 durch sein selbs einigs opffer: Was
 heist ein einige erlösung: Was heisse
 das ewig gilt: Entweders die Pfaf-
 fen verstehen die wort gar nit/oder aber
 treibē frefel vñ mutwille mit irer Meß/
 daß sie sich ohne allen Götlichen Bei-
 felch/ ja wider die helle geschrieffte / vn-
 derstehen Christum widerumb noch
 offft vnd dick / alle tag zuopffern vñ die
 seelen durch jr opffer zuerlösen/das doch
 Christus selbs / durch sein einigs opffer/
 vff ein mal geschehen / volkomenlich
 außgericht hat / für alle glaubige men-
 schen bis zum end der welt. vnd bedarff
 keins opffers mehr. Warum wolt sonst
 die geschriefft sagen (durch sein selbs opf-
 fer / durch sein einigs vff ein mal gethā
 opffer / das ewig gilt / eine ewige er-
 lösung) Es seind je klare wort (eigen
 opffer / ewig / einmal / ewig) sie
 lassen sich mit menschen Worten nit glo-
 sieren/ Gebe was alle Vätter hie zu sa-
 gen/die da from vñ gelert gewesen seind
 aber doch menschen gewesen / vñ haben
 mögen

mögen irren / wie der heilig Augustinus
 von jm selbst bekennet / in der vorred des
 dritten buchs von der heiligen dreysfal-
 tigkeit / vñ in geistlichen rechten / Dist. 9.
 c. noli meis. Der gleichen bekennet er in ei-
 ner schrifft zum Vincentio Victore / vnd in
 geistlichen rechten Dist. 9. c. negare non
 possum / Darumb vff keine menschliche
 glosß zuuertrawen ist / ohn das hell vnd
 klar wort Gottes.

Die Pfaffen wöllen die sacht mit einer
 solchē glosßen verglimpfen / vñ sagē:
 die Mess sey kein ander new opffer / son-
 der ebe dasselbig einig opffer / das Chri-
 stus vff ein mal für sich selbst außgericht
 habe: vnd aber den Aposteln vnd Prie-
 stern / mit diesem Sacrament in ewi-
 ger gedechtnuß / solches also außzurich-
 ten vnd zu opffern befolhen habe / da er
 sagt: So offte jr solches thüt / solt
 jr mein darbey gedencen. Antwort:
 man besehe das Nachtmal Christi mit
 seinen Jüngern gehalten vñ beschriebē /
 von den dreyen Euangelisten Mat-
 theo / Marco / Luca / vnd dem heiligen
 Paulo /

Paulo / da findet man klar / daß Christus
 im Nachtmal / mit geopffert / son-
 der gespeiset vnd getrenckt hat / vnd
 die Apostel geheissen essen vnd trincken
 von seinem brot vnd kelch / vnd inen
 befolhen / so offt sie solches thun / sol-
 len sie sein darbey gedencken. Nun essen
 vnd trincken / heist nit opffern / *Edere / Bi-
 bere / vnd sacrificare* / seind nit ein ding.
 Item (gedencken) heist auch nit opf-
 fern / *memoriam agere* / vnd *sacrificare* /
 seind auch nit ein ding / wie die schuler
 in der schulen wyssen. Es wil sich nie-
 gents zusamē reimen. Aber am Creutz/
 da hat Christus sich selbs geopffert.
 Am selbigen ort liest man aber nit / daß
 er seinen Jüngern befolhen hab / daß sie
 in widerumb Creutzigen sollen / vnd
 so offt sie solches thun / daß sie sein dar-
 bey gedencken sollen.

Das Nachtmal vnd das opffer Chri-
 sti / sein nicht ein ding / vnd ein werck /
 seind auch nicht an einem ort / vnd zu
 einer zeit geschehen. Darumb muß man
 sie nit mit menschen fabeln / vermischē /
 vnd

vnd zusamen werffen / als seyen sie ein
 ding oder ein werck. Sonder man muß
 sie recht vnderscheiden nach anzeigung
 des heiligen Euangelij. Das Nacht-
 mal ist gehalten worden in der stat Jeru-
 susalem / vnd vff den Grünen Don-
 nerstag zu Abent / am Tisch / da hat
 Christus mit seinen Jüngern gessen
 vnd getruncken / vnd seine gedechtnus
 eingesetzt ewiglich zu halten / so offte
 von seinem brot vnd kelch gessen vnd
 getruncken wird. Aber das opffer ist ge-
 schehen / ausserthalben der Stat Jeru-
 salem / am ort Caluaria / vnd vff den
 Karfreitag / am Creutz / da hat Chri-
 stus mit seinen Jüngern (die schon von
 im flüchtig waren) nie gessen noch ge-
 truncken / sonder hat da den bitteren tod /
 für die Jünger / vnd für vns alle gelit-
 ten / vff ein mal / zu bezalung der sün-
 den aller glaubigen bis zum ende der
 welt / vnd hat dazumal nie gestiffet /
 daß man in nachmals widerumb
 opffern sol / zu seiner gedechtnuß / denn
 er ist nun zu einem vnsterblichen leben
 vffers

offerstanden vnd kan nit mehr getödtet
 werde / *Rö. 6.* darinn kan er auch nit ge
 opffert werden : Aber sein Brot vñ kelch
 können alle zeit wol zur gedechtnus seins
 leidēs vñ sterbens gessen vñ getruncken
 werden. Das heist aber nit opffern / vñ
 ist auch kein opffer in d̄ warheit. Das es
 aber die Vätter ein opffer nennen / das
 müst allein (*Quid nominis*) sein / das ist /
 des namēs vñ d̄ gedechtnuß halbē. Das
 darinn die gedechtnus des tods Christi
 vñ opffers gehalten wird / vñ nit dz Chri
 stus da warhafftig geopffert werde /
 welches offētlich wiß die geschriefft ist /
 auch wiß den heiligen Christliche glan
 ben / den Christus ist auferstanden vñ
 den todte / eingangē in seine herligkeit /
Luce 24. nun fürter vnleidlich vnd vnsterblich.
 Dieser glaub mag das opffern nit lei
 den. In summa / es ist weder den Apo
 steln / noch den andern Christen befol
 hen / das sie Christum opffern sollen /
 den das ampt vnd werck ist allein Chri
 sti des Sohns Gottes / das er sich selbs
 opffere für die sünde / *Matth. 20.* Nie
 manns kan sonst solches opffer thun /

*Sacrificiū
 quid nomi
 nis.*

alle menschen seind zu gering darzu/
 denn sie seind alle sündler / Christus ist
 allein gerecht / darumb must er solches Rom. 3.
 opffer auch allein außrichten / das ewig
 gnug were / vnd nit mehr noth zu opf-
 fern / für die sünd der glaubigen / Joan.
 1. Tim war / das ist das Lamb Gottes /
 das da hinweck nimpt der welt sünde.
 Die Pfaffen können es nit thun / darumb
 solten sie auch nit so groß gelt vnd gut
 dafür genomē haben / od noch heut bey
 tag nemen / den sie mögē es mit keinē gu-
 ten gewissen thun. Es ist aber den Apo-
 steln / vñ allen Christen befolhen / das sie
 sich selbs auch opffern sollen / Matt. 6.
 Marci. 8. Luc. 9. Spricht Christus:
 Wil mir yemants nachfolgē / d̄ verleug-
 ne sich selbs / vnd neme sein Creutz auff
 sich teglich / vñ folge mir nach. Jte Rö.
 12. Ich erman euch liebē Brüder / durch
 die Barmhertzigkeit Gottes / das jr ewe-
 re leib begebet zum opffer / das da leben-
 dig / heilig vñ Gott wolgefellig ist. Jte
 1. Petr. 2. Bawet euch (euch selbs) zum
 geistlichē hauss vñ zu heiligen Priester-
 thumb

thumb / zu opffern geistliche opffet
 (mit Christum sonder euch selbs / wie
 Rom. 12.) die Gott angenehm seind/
 durch Jesum Christum. Den sollen vn-
 sere opfer angenehm sein durch Jesum
 Christum: So müssen je vō not wege/
 die opffer etwas anders sein / denn Je-
 sus Christus / Es würde sich je sonst nie
 wol reümen / daß man Christum durch
 Christum / vnd in durch sich selbs
 solte opffern.

Ist nun den Pfaffen also wol mit
 opffern / so greiffen sie es da an / wie
 sie das Euangelion lehret / vnd opffern
 sich selbs / wie auch Christus sich selbs
 geopffert hat. Denn Christum können
 sie nit opffern / das bleibt als sted vnd
 fest / als fest daß wort Gottes in ewig-
 keit bleibt. Christus ist ein mal gestor-
 ben / er wird nit mehr sterben / geb was
 die Pfaffen opffern / Es kan nichts an-
 ders sein / denn ein erdichter schein / da-
 mit das gemein volck betrogen wird.

Befindet sich also / bey dem ersten
 opffer des brots vnd weins / darnach
 auch

auch bey dem opffer Christi da man
 sich vndersteht Christum zu opffern/
 daß die papistische Mess / ein abgöt-
 scher/vnchristlicher mißbrauch ist/wi-
 der Gott/ vnd sein heiligs wort/wider
 Christum vnd sein einigs volkomens
 leiden vnd sterben / vnd nachfolgens
 wider den heiligen Christlichen glau-
 ben. Darumb kein fromer Christ/ mit
 gutem gewissen darbey sein / noch plei-
 ben mag.

Vom vffheben des Sacraments.

Der viert mißbrauch ist / daß
 man des volcksglauben vff das
 gesicht des Sacramentlichen ze-
 chens richtet / so es vffgehoben wird
 vber den kopff vnd gezeit: vnd aber
 die wort Christi/so zum warhafftigen
 Sacrament gehören / an denen allein
 der glaub hafftet / vor dem gemeinen
 volck verschwiegen/oder aber heimlich
 gehalten werde/so doch Christus wort
 vnd

vnd zeichen mit einander gegen seinen
 Jüngern gebraucht hat. Er hat brot
 vnd wein nit allein gezeigt / vnd dassel-
 big darnach bey im behalten / selbs gesa-
 sen vnd getruncken von seiner Jünger
 wegen / wie es vnser Messleser dē volck
 allein zeigen / vñ darnach auch selbs al-
 lein essen vnd trincken für die andern: Er
 hat auch nit gesagt / jr meine Jünger /
 sehet an / daß ist mein leib / vñ sehet an /
 daß ist mein blut : Sonder hat es außge-
 teilt zu essen vñ zu trincken / also sprechē
 de : Nement hin / nement hin / esset / vñ
 trincket alle / vñ gedenckt mein darbey.
 Also solt in dem Exempel Christi auch
 von vns gehandelt werden mit diesem
 heiligen Sacrament / wo man anderst
 Christlich handeln wolt. Man solt es
 nit allein zeigen / sonder auch allwegen
 etlichen Christē mittheilen / vñ die wort
 Christi nit heimlich vber das brot vnd
 den kelch hauchen (wie sie auch Christ⁹
 nit darüber gehaucht hat) sond̄ offenta-
 lich aussprechē / welche den allein der see-
 len speiß sein / durch den glaubē. Serners
 sage

sagt der heilig Paulus Rom. 10. Der
 glaub kompt auß dem gehöri des worts
 Gottes: vñ sagt nicht/der glaub kompt
 auß dem gesicht. Darumb so das zeichē
 allein gezeigt/vñ daß wort zum zeichen
 gehörig/ für dem volck verschwiegē vñ
 verborgen wird/ so ist es ein vnchristli-
 cher mißbrauch/ den die seel wird irer
 speiß beraubt/ welche ire nahrung vñ lebē
 hat allein im glaubē des worts Gottes/ Matth. 4.
 vñ nit im gesicht des Sacramēts. Auch
 ist es wid die Art vñ natur des glaubē/
 so er vff das gesicht d̄ eüsserlichē dinger
 gerichtet wird. Den der glaub/ ist ein ge-
 wisse zuuersicht/ des das zuhoffeist/vñ Hebr. 11.
 richtet sich nach denen dingē/ die da nit
 scheinen/ das ist/ der glaub thut auß den
 augen/ vnd synnen/ alles was in der
 ganzen welt scheinēt/ vnd richtet sich
 allein nach dē bloßen wort Gottes: aber
 in d̄ Papistischē Mess wird das wort
 vor dē volck verschwiegē/ vñ die bloßen
 zeichē für augen gestellet/ vber den kopff
 gezeigt/ daran die menschē gewisen wer-
 den zu glaubē. vñ wird also d̄ glaub/ vñ
 N ij seinem

seinem rechten grundt / des worts Gottes
 (daruff er allein bestehet) vmbge-
 sturzt / vnd vff einem frembden grundt
 des gesichts gestellet / wider sein arth /
 daruff er nit bestehen mag / das ist ja
 ein vnchristlicher mißbrauch / des heil-
 gen Sacraments vnd des glaubens.

Vom gebet vber das Sa- crament / in der Pa- pistischen Mess.

*In Canone
 minore cõ
 fitetur Sa-
 cerdos, se-
 esse pecca-
 torem, &
 rogat pro
 se precari:
 hic autem
 precatur
 ipse Patrẽ
 pro filio.*

Der fünffte mißbrauch ist / daß
 sich der Messlesend Pfaff / zum
 andern mal zu einem Mittler für
 stellet / zwischen Gott vnserem himel-
 schen Vater / vnd seinen geliebten Sohn
 Jesu Christo / Bittet den Vater für den
 Sohn / daß er in gnediglich annemen
 wolle / als die opffer Abels / Abrahams /
 vnd Melchisedechs / wiewol Melchise-
 dedech auch nit brot vnd wein geopffert
 hat. Denn es / Genes. 14. nit (offerens)
 geschrieben stehet / sonder (proferens) &c.
 Ist aber das nit ein vngehörter gewel /
 vnd

vñ mißbrauch/ daß ein elender mensch/
 vnd ein verstockter stinckender sündler/
 Gott den Vater für seinen Sohn bitten
 sol: Gleich als wen Christus in Gottes
 vngnaden were/ vnd müste aber durch
 einen Pfaffen / der da frömer were den
 Christus / allererst zu gnaden des Va-
 ters bracht werden. Den es wird je von
 den Papisten (auß Thomas lehr) ge-
 glaubt/ daß in iren Messen / Brot vnd
 wein verschwinden / mit mehr Brot vnd
 wein bleiben / sonder da in iren henden
 verwandelt werden / in den waren na-
 türlichen leib Christi / darüber betten sie/
 wie jez angezeigt / mit einem gebet in
 irem Messbuch vnd Canon begriffen/
 daß also anfahet : *Super qua propitio ac fere-*
no uultu. &c.

Matth. 3.
 & 7. *Hic
 est filius
 meus dilectus
 in quo
 mihi com-
 placui.*

Wie auch
 oben im
 andern
 miß-
 brauch
 angezeigt
 ist.

Serners bitten sie Gott vnsern Va-
 ter/ daß er seinem heiligē Engel gebiete/
 vff daß er diesen Christū seinen Sohn/
 in gestalt Brots vnd weins/ mit seinen
 henden trage vff den hohen Altar/
 (vñ vielleicht ist auch ein hoher thumb-
 stift im himmel) für das angesicht
 N iij seiner

seiner Göttlichen Maieſtat / vnd nach
 dem / wen ſie lang gebetten haben / ſo
 eſſen vnd trincken ſie es doch zu letzt /
 alles gar / Gebe der Engel hab zu tra-
 gen / oder zu führen / was er wölle. Ey es
 hat ein hübschen ſchein / aber dardurch
 Gott / vnd ſeine Engel verſpottet wer-
 den. Man ſehe aber hie zu / ob das nit
 ſey ein vnchriſtlichs / verzweiffelts ge-
 bet / darin öffentlich verleugnet wird /
 der warhafftig Artickel vnſers heiligen
 Chriſtlichen glaubens / Nämlich / Er iſt
 vffgeſtigen zum himmel / ſitz zu der
 gerechten / ꝛc. Denn die Pfaſſen ſittten
 daß der Engel kome / vnd in allererſt
 hinuff trage / gleich als ob er in menſch-
 licher natur noch hie vff erden were /
 vnd aber ein ſolcher ſchwacher kranck-
 loſer Gott / daß er one hilff der Engel
 nit hinuff kome komen. O ein verker-
 tſtes Gottleſterliches gebet / ein verleügnung
 des Chriſtlichen glaubens / vñ verzweif-
 felter mißbrauch des heiligen Sacra-
 ments. Das gebet ſtet im Meßbuch im
 Canon / vnd ſahet also an / *ſupplices te ro-
 gamus*

gamus. Diese gebet können die Pfaffen nit verleugnen / noch weniger verantworten / denn es lesen jr vil Mess / die nit verstehen was sie lesen / ich geschweig des verantwortens. Also Kompt / finsternuß / Blindheit / mißbrauch / greuel / je eins auß dem andern / darob man dan mit gewalt haltet / vnd läßt den Teufel mit aller Gottslesterung Meister sein / Gott wölle es mit seiner gnaden bessern.

Von empfahung des Sacraments.

Der sechste mißbrauch ist / daß die Messlesende Pfaffen / daß heilige Sacramēt empfahen vñ nies- sen / für andere / lebendigen vnd todten / (denn warumb solten sie sonst Presentz nemen) Daß ist vber den mißbrauch auch ein grosse vermessenheit / denn je kein mensch für den andern glauben kan zu der seligkeit / sonder ein jeglicher wird leben in seinem eignen glauben / wie kan denn ein mensch / das

Abac. 2.

Rom. 14

N. iij. Sacra

Sacrament für ein andern empfaben
 Nemlich dieweil Christus diß Sacra-
 ment zur gedechtnus seines tods gestiff-
 tet hat / an welcher gedechtnus die Chri-
 sten menschen iren glauben vben sollen.
 Also daß ein jeglicher mensch für sich
 selbs festiglichen glaube / daß der leib
 Christi für in in den tod gegeben / vñ sein
 blut / zu verzeihung seiner sünden / ver-
 gossen sey / im darumb lob vnd danck
 von hertzen sage. So nun solche ge-
 dechtnus im glauben von allen Christen
 menschen ohne vnderschiedlich erfor-
 dert wird / wie es auch klärlich in den
 Artickeln des Christlichen glaubens ver-
 fasset ist / Also : Der gelitten hat vnder
 Pontio Pilato / gecretiziget / gestor-
 ben / vnd begraben / ꝛc. vnd diß heilig
 Sacrament / vmb solcher gedächtnuß
 willen gestiffet ist : So folget / daß es ein
 jeglicher Christen mensch für sich selbs
 nach seiner gelegenheit empfaben sol /
 wie er für sich selbs auch glauben muß /
 wil er anderst seelig werden : vnd mag
 es keiner für den andern empfaben als
 wenig /

wenig / als auch einer für den andern
 glauben kan zu der seligkeit. Darumb
 auch der heilig Paulus / mit vergeblich
 schreibt / 1. Cor. 11. Der mensch prüfe
 sich selbs / ꝛc. Er spricht (sich selbs)
 denn die sache berüret einen jeglichen für
 sich selbs / vnd wil durch keinen andern
 außgericht sein. Als da einer einē Pfaf-
 fen wolt ein barzen geben / daß er vor im
 oder von seinet wegen / solt das Sacra-
 ment empfangen : daß tregt ein gleiche
 meinung auff im / als wan einer selbs
 wolt ein Gottloser mensch sein / Gott mit
 selbs erkennen / noch sein worthören /
 oder im glauben : wolt aber einem an-
 dern ein lohn gebē / daß er solt von seinet
 wegen from sein. O ein schöne gleissen-
 de fromkeit / mit welcher die Pfaffen
 vñ lohn from sein / mit allein für die ein-
 faltigen menschen / welche sie mit irer
 falschen lehr verführen : sonder auch für
 alle Boshaftige / geizigen / Rauber /
 Dieb / vnd schelcke / ꝛc. die inen von
 irem raub / wucher / vnd diebstall theil
 geben / denselbigen theilē sie auch mit /

ire fromkeit / schreibē sie in ire seelbücher
 (doch sampt dem Järlichen zins) sie
 verkünden sie vff der Cantzel / sie bege-
 hen jnen jr jarzeit / sie lesen Mess für sie /
 Sie glauben vnd empfaben das Sac-
 rament für sie / Sie erlösen sie auß dem
 fegfeuer / vñ setzen sie mit Pöpstlichem
 gewalt in den himmel / als lang die Pre-
 senz weret : Wen aber die Prezenz ein-
 endehat / so fragen die Pfaffen nit vil
 darnach / Es sitze einer im himmel oder
 darneben / Den es auch am tag ligt / das
 sie ire fromkeit mit Messlesen vnd Sac-
 rament empfaben / nit vil vben gegen
 den armen gemeinen menschen / die men
 nichts geben / oder zu geben haben / als
 sie thun / gegen den reichen. Aber Gott
 wöll vns vor solcher frembden gleiffen-
 den / vnd erkauffte fromkeit durch seine
 gnade behütten / denn sie hat warlich
 kein stat für Gott. Welcher selbs nit
 glaubt / vnd von hertzen from ist / der
 wird nit selig / Marc. 16. Rom. 10.
 Sonder muß verdampft sein / da hilfft
 aller Pfaffen fromkeit nit für vff erden /
 Es

Es hilfft kein Ablass / noch kein Mess
 lesen / ob schon alle Pfaffen / alle Sac
 ramenta von seinet wegen empfangen /
 die vffer erden weren / Gottes wort steht
 fest vnd vn beweglich. Welcher mensch
 aber selbs glaubt vnd von hertzen fromt
 ist / der wird selig / vnd bedarff keins
 frembden erkauften Sacraments es
 sers / zu seiner seligkeit / er wirds wol
 selbs empfangen / wen in sein eigen ge
 wissen treibt.

In summa die lebendigen können
 das Sacrament keiner für den andern
 empfangen (wie angezeigt) noch viel
 weniger für die todte / ja was gehet
 das Sacrament die todten an / so es
 doch allein den glaubigen gestift vnd
 gegeben / aber die todten außserhalbten
 dem standt des glaubens sein / vnd
 können die gedächtnus des leidens vnd
 sterbens Christi nit mehr halten / noch
 seines tods verkündung nicht mehr hö
 ren. Darumb der Pfaffen Mess für
 die todten ganz nit dienet. Denn ein
 jeglicher

jeglicher mensch / nach dem wie er / eint
 weders selbs geglaubt / od mit geglaubt
 hat in seinē leben : Also wird er auch see-
 lig oder verdampt / vnd hilfft nach sel-
 nem tod kein Sacrament oder Messhal-
 tens für in. Was vom segfwer der
 glaubigen in der andern welt / geredt
 vnd gelert wird / ist erdicht ding / ohne
 Gottes wort / ja wider Gottes wort /
 wie leichtlich zubeweisen. Darumb die
 Mess am selbigen ort auch nit stat hat.
 So bekennen auch die Pfaffen selbs in
 iren Mess Canon / in der gedechtnuß / die
 sie für die todten halten / daß di abge-
 storbenen glaubigen / ruwen im schlaff
 des friedens / das ist war nach außwei-
 sung des heiligē Euāgelij. Dieweil dem
 nun also ist / was geprenge machen die
 Pfaffen denn mit dem segfwer / vnd
 warumb nemen sie Presentz vnd lohn /
 mit iren Messen die seelen auß dem seg-
 fwer zuerlösen. So der gläubigen see-
 len doch (wie sie selbs one iren danck
 bekennen) im frieden schlaffen / daß
 Requiescant in pace muß je irrent halbē ein
 vergebē

vergeblich wort sein / es gleisse gleich
 wie hübsches wölle. Der gleichen ist es
 ein ding / mit der Pfäffischen Vigilien
 für die todten. Die heiligen Psalmen
 vnd andere gschriffte werden da miß-
 braucht zu einem grossen geschrey / aber
 mit lüzgel wollen / sonil es die todten be-
 trifft: Aber den Pfaffen ist solches ge-
 schrey nit vnütz wie die öffentlich er-
 farnus zu erkennen gibt / da steht der miß-
 brauch.

Vom verdienstlichen werck der Mess.

Der siebend mißbrauch ist / daß
 die Pfaffen ein verdienstlich
 werck auß der Mess machen /
 damit sie allen menschen / die jnen lohn
 darumb geben / das ewig leben verdie-
 nen mögen. Darumb auch die reichen
 also vil Mess stifften vnd lesen lassen
 nach irem tod. In dem aber verlestern
 die Pfaffen / den kostbarlichen ver-
 dienst / des leidens vnd sterbens Chri-
 sti /

ſti / welchen er auß lauter gnaden vnd
 Barmhertzigkeit / ohn alles gold vñ ſil
 ber / vmb ſonſt geſchenckt hat / allē glan
 bigen menſchē / Eſaie 52. 1. Petr. 1. Sich
 deſſelbigen zugebrauchen zū ewigen le
 ben / als hettē ſie es ſchon ſelbs verdient /
 Den durch ſolchē verdienſt / ſeind ſchon
 alle gläubige ſelig / in der hoffnung /
 Rom. 8. Vnd haben das ewig leben /
 Joan. 3. Dörffen ſich auch nach irem
 tod / für keinem ſegfrewer fürchten / denn
 Chriſtus ſpricht / Joan. 5. Warlich
 warlich ſage ich euch / wer mein wort
 hōret / vnd glaubt dem / der mich ge
 ſandt hat / der hat das ewig leben / vnd
 kompt nit in das gericht (wo bleibt
 den das ſegfrewer) Sondern er iſt vom
 tod zum leben hindurch gedrungen.
 Item / Joan. 6. Wer von meinē fleiſch
 iſſet / vñ trinckt von meinem blut / der
 bleibt in mir / vñ ich in im (also müſſt
 Chriſtus mit einem gläubigen ins ſegfrewer
 ſaren) vnd hat das ewig leben /
 vnd ich werde in am Jüngſten tag of
 ferwecken / ꝛc.

Sihe da / im klarē wort Gottes / wird
 den glaubigen zugesagt / daß sie schon
 das ewig leben haben / darumb dörfens
 inen die Pfaffen nit allererst mit irem
 Messlesen verdienen / Goldt / Sylber /
 gelt / oder ander gütter dafür zu lohn
 nemen. Christus hat daß heilig Sa-
 crament zu keinem solchen Jarmarck
 ingesetzt / auch den Aposteln mit Befol-
 hen solche Krämerey darmit zu treiben /
 noch auch mit keinen andern gaben des
 gradē Gottes. den er spricht Matt. 10.
 Umb sonst habt irs empfangen / umb
 sonst solt irs auch geben. Hieruff Pe-
 trus zum Simon sprach / d̄ im gelt wolt
 geben / umb die gaben des heiligē Geist /
 Acto. 8. Verdampft seistu mit deinens
 gelt / ꝛc.

Dieweil nun vnser Pfaffen / ein Kauf
 mans handel auß der Mess machen /
 vñ ein Suckerey / oder wechselbanck dar
 neben vffrichten / Leihen / Kauffen / Ver
 kauffen / Vnderpfandt annemen / Brieff
 vnd siegel darüber vffrichten / zu ge-
 richt gehen / mit den schuldnern zanken
 vnd

vnd hadern / die vnderpfandt vffhollen / zu iren handen nemen / die schuldenner zu kosten vnd schaden treiben / 2c. Das alles öffentlich am tag ligt / daß solches getrieben wird mit dem gelt / damit die Messen gestiftet seind. Wie kan denn der Papisten Messhandel / nicht für einen Gottlosen mißbrauch erkandt werden bey allen fromen Christen? Den jederman sihet daß das heilig Sacrament / der Pfaffen Wucher / Geitz / Eigennutz / 2c. (Ich geschweig anderer stück) dienen muß / vñ also / was Gott zu seiner ehr / vñ zu der menschē heil verordnet hat / das muß dem Teuffel dienen. Darumb sehen sich wol für alle die solchen dienst handthaben vnd beschirmen / sie müssen warlich rechenschafft darumb geben.

Die Mess mag wol bey den Papisten ein verdienstlich werck heißen / sie verdient ja den Pfaffen vnd Mönchen / daß sie allegnug darvon haben / soll / vnd sat sein / vnd gute saule tag darbey haben: Aber warlich das vrtail ligt ihnen vff

vff dem halß / 1. Cor. 11. Welcher vns
 würdig isset / 2c. Der ist vnd trinckt im
 selbs das gericht / Er wird schuldig ans
 leib vnd blut des **HERREN**. Werden
 sie es für ein schimpff halten vnd vber-
 sehen / so ist es schon vmb jr heil gesche-
 hen.

Vom gedechtnus der hei- ligen in der Mess.

Der Acht mißbrauch ist / daß vie-
 ler heiligen gedechtnus in der
 Mess gehalten wird / Nemlich
 der heiligen Juncfrawen Marie / Pe-
 tri / Pauli / Andree / Jacobi / Joannis /
 Philippi / 2c. Vnd das geschicht zwei-
 mal im grossen Canon / der gleichen
 auch in kleinen Canon / im gebet das da
 anfahet / *suscipe sancta trinitas, &c.* Aber
 Christus hat diß heilig Sacrament zu
 keines heiligen gedechtnus eingesetzt:
 Sonder allein bloß zu seiner gedech-
 nus / da er sagt: So offt jr solches thut
 solt jr mein darbey gedēcken. Er spricht
 O Mein /

Mein/ Mein solt jr gedencken : vñ sage
 aber nit / daß man auch sanct Peters
 oder S. Pauli darbey gedencken sol. Dar
 bey wer es billich blieben / wo die ver
 nunfft nit besser meister het wöllen sein/
 denn Christus selbs. Man veracht dar
 umb die lieben außewölte heiligen nit/
 daß man aber Gottes werck vnd ord
 nung also für vnuolkomen haltet / daß
 man sie mit den heiligen vnderstutzen
 vnd pfezen wil / das ist vnrecht. Setze
 Christus der heiligen gedechtnus auch
 in seinem Nachtmal wöllen gehalten
 haben / er hette es wol können verord
 nen. Er hatte doch seine Apostel bey im
 am tisch sitzende / darumb er wol hette
 können sagen / So offft jr solches thut/
 solt jr mein darbey gedencken / vnd alle
 die es nach euch thun werden / die sollen
 ewer vnd ewers gleichen / auch darbey
 gedencken: Aber Christus wil seine ord
 nung / in diesem Nachtmal vnuerfetzt /
 auch vnzertrennet haben / welche als
 kein zur gedechtnus seines tods / vnd des
 gnadenreichen wercks vnserer erlösung /
 vffge

vffgericht ist / vnd keines heiligen gedechtnus. Er wil auch seine eher in die *Esais 42.*
 ser gedechtnus / der gleichen in andern
 stücken vnsers heils / keinem andern ge-
 ben. Darumb S. Peters vnd S. Pau-
 lus namen / 7c. niches dabey zu schaf-
 fen haben. Sie seind aber dahin ko- *vt testam*
 men / ohn allen zweiffel / auß der vrsach / *tur Canon*
 daß man Christo nit allein vertrawet / *minor.*
 vnd die heiligen auch für mitler vnd
 fürsprechen für Gott / gehalten hat /
 welches doch wider die geschriffte vnd
 Gottes wort ist. Sie seind ja nit vn- *1. Timo. 2.*
 sere mitler / Sie haben auch nit für vns *1. Joh. 4. 2.*
 den tod gelitten / noch jr blut zuuerzei-
 hung vnsrer sünden vergossen / als aber
 Christus gethan hat. Darumb gehört
 ire gedechtnus nit in dieses Nachtmal /
 da allein nach der ordnung Christi ge-
 handelt sol werden die gedechtnus vn-
 serrer erlösung / durch sein einigs leiden /
 sterben / vnd blutvergiessung geschehen.
 Die menschlich ordnung / zusatz / vn̄ ver-
 mischung mit der heiligen gedechtnus /
 ist zuuil / vn̄ ein gewisser mißbrauch in d̄
 O ij Messz

Mess / denn die heiligen haben zu dem
 werck vnserer erlösung nichts geholfen.
 Christus der Sohn Gottes hat es allein
 müssen aufrichten / vnd auch die heiliga
 gen selbs müssen erlösen. Darumb men
 die ehr solcher gedechtnus / die Christus
 im allein für sich selbs gestiftet hat /
 mit zustehet noch gebüret.

Aber sonst mag man wol / vnd sol
 auch der lieben heiligen / Christlicher
 weiß gedenccken / wie in der Epistel zum /
 Hebr. 13. Cap. angezeigt wird / Also:
 Gedenccket an ewere Fürgenger / die euch
 das wort Gottes gesagt haben / welcher
 anßgang schawet an / vnd volget irem
 glauben. Also sol man nun S. Peters
 vnd Pauli / gedenccken / daß man ire Pre
 dig vnd lehr des heiligen Euangelij hö
 re / demselbigen glaube / wie sie geglaubt
 haben / vnd inen im steiffen glauben
 Jesu Christi nachfolge bis in den tod /
 so werden wir mit inen selig. Sölche
 gedechtnus von inen zu halten / ist vns
 befolhen. Daß man aber ire gedechtn
 us im Nachtmal haben sol / gleich als
 thetten

eheten sie auch etwas zu vnserem heil
vnd seligkeit: (wie es denn der Mess Ca
non für gibt) das ist vns nit befolhen /
haben auch kein gezeügnus in der heili
gen geschriffte darvon / Menschen thea
ding gelten in disem handel nichts.

Von der Mess Kleidung/ Bilden / vnd ge berden.

Der neünt mißbrauch ist / daß die
Pfaffen eigene Kleider / vnd selbs
me Geberden / zu der Mess / in
handlung des heiligen Sacraments
brauchen. Vnd wiewol / an der eüsser
lichen Kleidung des gewissens halben /
nichts gelegen ist / wie / oder womit /
ein mensch (er sey Pfaff oder Laye)
gekleidet sey / der das Nachtmal Chri
sti halten / vnd das heilig Sacrament
empfangen wil / So er allein innerlich
recht bekleidet / vñ Christum durch den
glauben angezogen hat / darumb wir
O iij auch

auch mit lesen von Christo vnd seines
 Aposteln / daß sie eigne vnd sonderliche
 Kleider zum Nachtmal selbs gebraucht/
 oder hernach verordnet haben / Auch
 noch heut Bey tag / kein gemeiner Christ/
 zu sonderlicher Kleidung im Nachtmal
 zu brauchen gezwungen wird.
 Daß aber nun die Pfaffen / eigne Messen
 Kleider erdichtet vnd verordnet haben /
 (daran auch nichts sonderlichs geles-
 gen were / wen man im sonst rechts
 gethan hette / vnd dieselbigen Kleider
 freygebraucht / oder vnderlassen / wann
 man gewolt hette) vnd ohne Gottes
 wort / auch ohne alle exempel Christi
 vnd seiner Jünger / ein notzwang
 darauff machen / vnd die gewissen
 daran binden / Also daß keiner kein
 Mess lesen / vnd das heilig Sacra-
 ment handeln sol / Bey einer todtsün-
 den / er habe denn solche Kleider an.
 Daß ist ein mißbrauch / vnd heist wie
 der Christliche freyheitsünde machen /
 da kein sünde ist. Dem je vnferm
 S R R R E N Gott gleich als wenig
 an

an der kleidung gelegen ist / als an speiß
 vnd tranck / oder andern eüsserlichen Matth. 15.
 dingen / so allein das hertz innerlich
 im glauben recht gefasset ist. Darumb
 auch der heilig Paulus sagt / Coll. 2.
 Lasset euch niemands gewissen machē
 vber speiß vnd tranck / ꝛc. Folgt in
 selbigem Text: Was lasset jr euch sa-
 hen / mit satzungen deren die euch sa-
 gen / Du solt das nit essen noch trinka-
 cken / Du solt das nit anrühren / Du solt
 das nit anlegen / welches sich doch
 alles vnder handen verzeret / vnd ist Gewissen
 machen
 vber kleid-
 ung ist
 gleiches
 rey.
 nach gebotten vnd lehren der menschen
 welche haben allein ein schein der weis-
 heit / durch selbs erwölte geistligkeit vñ
 demut. Aber sihe zu / mā hat dē pfaffen
 gewissen gemacht / vber den Messklei-
 dern / inen dieselbigen gebottē / Die habē
 auch ein schein der heiligkeit vñ geistlig-
 keit / den sie bedeüten nach menschlicher
 dichtung / heilige / vnd geistliche ding /
 ja grosse Christliche tugent / welche die
 Messlesendē pfaffen an inen habē sollē /
 wie nach der leng zu sehen ist / in einem
 O iij Buch

Buch von inen selbs gemacht / daß heist
 Psal. (Rationale diuinorum officiorū. lib. 3.) Was
 Sacerdotes hilfft aber der schein / vnd die Bedeu-
 tui Domus tung / ohn die warheit? Man spüret je
 ne induan- die Bedeuten tugentē mit vil an den Pfaß
 tur iusti sen. Wo zu ist's gut / daß ein gottloser
 lia. mensch / ein hürer / vnd lesterer / in einē
 heilig scheinenden kleidt stecket / darin er
 sich für geistlich vnd from dar stellet /
 vnd ist's aber nit? Verkaufft auch vnder
 solchem schein andern menschen gute
 werck / die er doch selbs nit hat / lestert
 Gott vnd betretigt die menschen. Das
 ist ja ohn alle widerrede / ein schedlicher
 mißbrauch der Messkleider / welche mit
 irem heiligen schein / vil büberey bedeu-
 ten / daß man sie mit sehenden augen
 nit sihet. Spricht man aber: Bedecken
 doch andere kleider auch schelck vnd
 buben? Antwort / Es ist war / sie haben
 aber nit ein solchen heiligen schein / dar-
 umb sie auch nit also betrüglich sein /
 wie die Messkleider. Ist sonst einer ein
 schalck od bub / so wird er in seinem eig-
 nen kleidt ein solcher bub erkandt: Ist
 aber

Die
 Münchs
 Kutten
 stheem
 auch wol
 darbey

aber ein Pfaff schon ein Sub (ein öffentlicher hurer / ein rasler vnd spiler / ein weinsaußer / vnd trunckenbolz / oder sonst ein leichtfertiger mensch / so heilt man in dennoch für from / wan er am Altar / mit vffgestreckten Armen Creutzweiß / in den Messkleidern steht. Daher das gemein sprichwort kompt / daß man von den Messlessenden Pfaffen sagt: Der Pfaff ist heit from gewesen / oder er wil vff den heißen stein / vnd from sein / ob er schon ein Sub in der Haut ist.

Über die deutungen der geistlichen tugenten / so die Messlessenden Pfaffen an jnen haben sollen / seind noch andere deutungen erdicht / vnd beschrieben / in irem buch genandt (Rationale diuinorum officiorum, lib. 3.) Nemlich sol das humerale Humerale / das ist / daß haupt tuch / bedeuten / das tuch / damit die Juden dem HERRN seine Augen verbunden haben in Cayphas hauß / da sie in schlugen / vnd hießen weissagen. Item das lang weiß kleid / genant die Alba / sol bedeu- Alba.

O v ten

ten das Kleid / darin Herodes Christum
verspottet hat.

Cingulum. Item der gürtel / sol bedeüten die geißel / damit Christus im gerichtshaus ge-
stola. geißelt ist worden. Item die Stola sol bedeüten das seil / damit er ist an die seil gebunden worden.

Manipulus. Item das Manipel / sol bedeüten den strang damit die Judē Christi gebundē haben / da sie in im gartē gefangen habē.

Casula. Item die Casel / oder das Messgewand / sol bedeüten das Purpur Kleid / das pilat⁹ dē S^{EX}ren ließ anlegē / &c.

Der gleichen auch / haben alle andere bildung / vnd geberden / ire sonderliche erdichte bedeütungen in der Mess / als nemlich / das bucken vnd neigen / das austrecken der Armen in creutzweiß / vnd das Creutz machē mit den fingern. Item des Messbuchs legen von einem ort des Altars vff das ander ort. Item das küssen / das d^e Pfaff das Messbuch küisset. Item das umbwenden / das sich der Pfaff etwan gegen dem volck umbwendet / vnd mit im redet / das doch nie wands

mands vom gemeinen volck versteht
was er sagt/ vnd vil andere geberden die
da in der Mess geübet werden bedeußli-
cher weiß/ zc.

Wiewol im nun also ist in der war-
heit / daß das Nachtmal / vnd brauch
des heiligen Sacraments / zur gedech-
nis des leidens vnd sterbens Christi / ge-
stiftet ist: was dienet aber diese bedeußli-
che Kleidung / eüsserliche Bildung / vñ ge-
berden darzu? Welche doch Christus /
od auch seine Jünger im Nachtmal nit
gebraucht habē / auch seind sie vñ keine
Apostel / also zu brauchē gelehrt wordē /
Paulus hetz sonst auch den Corinthern
kunt gethon / da er inen vñ brauch des
Nachtmals schreibt / 1. Cor. 11. Wer sagt
dem gemeinē Christen volck / was diese
ding alle / so in d Mess geübet / vñ gehan-
delt werden / bedeußen? So es doch vil
pfaffen / ja das grösser theil / selbs nit
wissen / auch die Lateinische Sprach /
mit d sie Messlesen / gātz wenig / od aber
gar nichts verstehē / wandlē also blinz-
lingen / in Worten / vñ werckē. Ob man
aber

aber schon dem gemeinen volck sagt /
 vnd lehret es / was diese obbeschriebne
 ding alle bedeuten / nach menschlicher
 dichtung : Was gehen sie das Christen
 volck an : Das nit mit solchen erdichten
 deuttelleyen / vnd eusserlichen bildern /
 allein vff den augenschein gericht / sol
 gelert werden zu betrachten das leiden
 Christi : Sonder vil mehr mit der steif-
 fen warheit des worts Gottes / Neme-
 lich also / das man dem volck / bey der
 ordnung des Nachtmals / wie es Chri-
 stus selbs gestiftet vnd angericht hat /
 mit seinem Göttlichen wort / Dasselbig
 wort / herlich Predigen vnd verkündi-
 gen sol / wie das Christus seinen leib für
 vns in den tod gegeben / vnd sein blut /
 zuuerzeihung der sünden / vergossen ha-
 be. Das man also nit durch deuttelwerck
 vnd augenschein / sondern durch die
 mündliche Predig / des heiligen Euang-
 gelij das Christen volck lehre / des **HEILIGEN**
ABENDMALS leiden mit hertzlichem glauben
 zu betrachten / welches durch blosser
 dichte deuttelei / vnd bildung nit gesche-
 hen

hen mag / dieweil der glaub nit vff sol-
chen eusserlichen dingen hafftet / sonder
allein am wort Gottes.

Das nun diß die rechte ordnung sey /
zubetrachten das leiden Christi / bezeit-
get vns der heilig Paulus / 1. Cor. 11. Da
er sagt : So offte jr von diesem brot des
HERRN esset / vnd von seinem
kelch trincket / solt jr des **HERRN**
tod verkündigen / bis / ꝛc. Er spricht
nit / So offte jr Messhalten / solt jr ein
Alben / Stolen / Manipel vnd ein Mess
gewand mit einem grossen Creutz an-
thun / jr solt die Arm creutzweiß von
euch ausstrecken / euch tieff bücken / vñ
neigen / vnd vil lufft Creutz mit fingern
vber brot vnd wein / vornen / hinden /
vnd vff die seiten machen / daran das **Sehen** /
volck sehen / vñ wissen möge / wie man **macht nit**
mit Christo sey vmbgangen : Sonder **selig**.
also sagt der heilig Paulus / So offte
jr von des **HERRN** brot esset / ꝛc.
Solt jr seinen tod verkündigen / das **Glauben**
Euangelion öffentlich predigen / das **macht**
das volck hören vnd glauben möge / **selig**.
wie

wie Christus für vnser sünde gestorben
sey / vns von dē ewigen tod erlöset habe.
zc. Also steht die warhafftige betrach-
tūg des leides Christi / mit in bedeutliche
Kleidung / bildung / vñ zeichen / die man
für augen sihet : Sonder in der munde-
lichen Predig des worts Gottes / das
man höret vnd im glauben faffet.

Nun geschehen aber der Winckel
Messen vil / hin vnd her / vnd die be-
deütlichen zeichen / geberden / vnd klei-
dung (an denen doch nichts gelegen ist /
darnon wir auch keinen Götlichen be-
felch haben) werden von allen Pfaffen
vleißig gebraucht / in Stifften / Clö-
stern / Clausen / pfarkirchen vnd Cap-
pellen. Ursach / das deutewerck ist gut
zu treiben / es lernetz einer in acht tagen /
daß ers darnach allwegen treiben kan /
so oft er wil / oder wenn man es von
im begeret / bedarff keins studierens /
vnd tregt grossen nutz / von pfrün-
den / die daruff gestiftet sein : Aber das
heilig Euangelion / vnd des HERRN
tod / werden gar von wenig Pfaffen
geprediget

geprediget vñ verkündiget/ daran doch
 alles heil gelegen ist / vnd darnon wie
 ein Götlichen befehl haben / zu war-
 hafter betrachtung des leidens Chri-
 sti. Ursach das Predigen nimpt vil
 mühe vnd arbeit / mit schreiben / lesen /
 studieren / bricht den kopff / vñ mache
 vnlust / darzu bringet es vil vngunst ge-
 gen der welt / welche die warheit nit lei-
 den mag / verfolgung / leiden / ansehn-
 ung / vnd etwan den tod / das ist den
 Messpaffen zu schwer / vñ schwacht in
 nit. Diweil nun dem also ist / daß die be-
 deutliche Messkleider / zeichen vñ geber-
 den (welche allein ein gleissenden schein
 fürgeben / zur betrachtung des leidens
 Christi) vberhand genomē haben / vñ
 getreten sind an die statt d̄ mündliche
 Predig Gottes worts vñ verkündigung
 des tods Christi / Also daß d̄ Messdeutler
 mehr worden sind / den d̄ Prediger des
 Euangelij / vñ die deutley auch höher
 geacht ist / den die Predig des worts Got-
 tes : So folget daß die Messkleidung /
 sampt allem zugehörigen deutlerwerck
 ein

ein schädlicher mißbrauch seind bey den Christen/sollen auch billich abgethan werden/vnd das Euangelion an jr stat widerumb vffgericht werden: Sie mögen sich auch nit bey einandern dulden. Denn das warhafftige Euangelion Jesu Christi/vnd das kindische deütelwerck / reümet sich nit zusammen. Ein Christ sol stracks vnd dapffer im licht der warheit Göttlichs worts wandlen / vnd nit mit deütelwerck in der finsternus menschlicher dichtung vnd gutdunckel tappen/als ein blinder. Die Christen sein kinder des lichts/vnd nit der finsternuß/1. Tessal. 5.

Von ergenlichen Meßsen.

Der zehende vñ letzte mißbrauch ist / daß die Pfaffen zum größten teil/die da teglich Meßhalten/vnd die heiligen Sacrament handlen/den heiligen Ehestandt von Gott verordnet/vñ jederman vmb der hurerey willen zuuermeiden (sonderlich den Bischoffen

Bischoffen vnd Priestern / *Leui. 21. 1.*

Timoth. 3. Tit. 1.) erlaubt / als ein Befle- *Gene. 20.*
 cken unreinen standt / verachten vnd *Matth. 19.*
 schewen : fürchten sich aber nit sonst *1. Cor. 7.*
 vnehrlich vnd vnchristlich / mit Rebs *Dist. 31. c.*
 weibern zu beflecken / wider Gott vnd *Nicena sy*
 sein heiligs wort / vnd ein offentlicher er *nodus. 8*
 gerlichs leben / ohne alle scham zu sit- *c. Quoni-*
 ren vor aller welt / zu irem eigē / auch an *am. Dist.*
 derer menschen verderbnus / welche sie *81. c. Vom*
 vilfelig durch jr leben ergern. Darumb *lumus.*
 sie das verdamlich Wehe / vff iren halß *Dist. 23. c.*
 laden / *Matth. 18.* Wehe der welt der *his igitur.*
 ergernus halbē. Welcher der geringsten
 einen ergert / die an mich glaubē (spricht
 Christus) dem were es besser / daß ein
 Mühlstein an seinen hals gehenck't wür-
 de / vnd ertrenck't würd im Meer / da es
 am diefften ist / *zc.*

Sie seind in Gottes Bann / *1. Cor. 5.*
 Welcher sich ein Bruder / das ist / ein
 Christen last nennen / vnd ist aber ein
 Hurer / Geiziger / Abgötterer / Lesterer /
zc. mit dem solt jr nichts zu schaffen
 haben / solt auch nit mit jm essen / *zc.*

P Sie

Miss
brauch
des Sa-
craments

Sie sind in solchem stand vermaledeyt / vnd verdampft / durch Gottes wort / 1. Cor. 6. Ephes. 5. Kein Zurer / oder Ebrecher / Geiziger / oder Abgötischer / ꝛc. wird ererben das Reich Christi vnd Gottes / Hebr. 13. Zerlich ist die Hochzeit / aber die Zurer vnd Ebrecher wird Gott reichten. Darumb ist vnmöglich das sie in solchem stand / die Sacrament Christlich handlen / brauchen / oder niessen mögen / vnd fallen alle mal / so offte sie Messhalten / in Gottes gericht / das der heilig Paulus ausspricht / 1. Cor. 11. Welcher vnwürdig von diesem Brot isset / ꝛc. Der isst / vnd trinckt im selbs das gericht / er wird schuldig am leib vnd blut Christi.

Darumb verbeüts auch das geistlich Recht / das kein Zurer Messhalten sol / Dist. 32. c. Præter. Sage Pabst Alexander der ander: Auß dem gewalt Gottes / vnd der heiligen Aposteln Petri vnd Pauli / gebieten wir / das kein priester der ein Zebsweiß hat / od sey im duldet /
Mess

Mess sol haben / vnd weder das Euang
 gelion / oder die Epistel singen / sol auch
 nit geduldet werden / in der gemein der
 andern priestern. Widerumb verbeut
 das geistlich recht / das niemandts sol
 hören das Ampt eines Surenpfaffen /
 Dist. 81. c. si qui presbyteri / Sagt Pabst
 Gregorius / Welche priester Euange
 lier / vnd Episteler / in dem laster der
 Surerey ligen / denen verbieten wir / von
 wegen Gott des Almechtigen Vaters /
 vnd auß dem gewalt S. Peters / den
 eingang der Kirchen biß das sie Buß
 würcken / vnd sich besseren. Istts aber
 sach / das sie in iren sünden verharren :
 So sol sich niemandts vnderstehen / ir
 Ampt zu hören / Den ir benedeyung wird
 verwandelt in ein vermaledeyung / vnd
 ir gebet wird verwandelt in sünde. Wie
 der **SEXX** durch den Propheten Psalm. 108
 Malach, 2. bezeüget. Auch verbeüt das
 geistlich recht / das keiner sol hören oder
 sehen / eines Surers Mess / bey dem Bañ /
 Dist. 32. Ca. Nullus. Sagt Pabst Nico
 laus: Niemandts höre Mess des pfaffen
 P ij dem

den man weiß verleumbt mit einem
 Ketzweib / denn solches verbeut das
 heilige Concilium bey dem Bann.

Mess
 brauch
 der Mess

Also folget / auß göttlicher geschriffte
 vnd dem geistlichen Rechten / welche
 in dieser sachen zu samen stimmen / das
 der Surenpfaffen Messen ergerlich
 seind / vnd das auch jr keiner Christlich
 Messhalten / oder (wie das geistlich
 Recht selbs bekennet) das heilig Sacra-
 ment machen kan. Den kein böser Baum
 macht gute frucht / Matth 3. Wo nun
 die Pfaffen also vermessen seind / vnd
 nach erkantter warheit / freuentlich / vnd
 mit verstockten hertzen / sich vnderste-
 hen / im Suren vnd Buben stande Mess
 zuhalten / damit vnchristlich wider
 Gottes wort / offentlich zu handeln /
 auch mit verachtung jres eigen geistli-
 chen rechtens : Da sollen alle Christen
 menschen darvon weichen / vnd eylendts
 fliehen / vff das sie solcher grewlicher
 sünden vnd Gottslesterung nit theilhaf-
 tig werden. Welcher aber darbey bleibt /
 der sol wissen / das er gezeügnus vber
 sich

sich selbs gibt / daß er in solche sünde
 vnd Gottslesterung verwilliget. Dar-
 umb felt er gewiß mit den lesterern vnd
 den hurenpfaffen in gleichen Bann/
 vnd Gottesgericht / darfür Gott
 alle frome Christen / durch
 seine gnad wölle be-
 waren / Amen.



Ende der gemeinen
 mißbrench in der
 Papistischen
 Mes.

p iij Von

Von dem Priestertumb
Christi auß dem syebendten ca-
pittel der Epistel zu
den Hebreern.

Joan. 5.

Erforschent die heilige geschriffte.

Siere. 23. Matth. 15. Collos. 2.

Menschen leer ist der seelen gifte.

Psal. 11.

Das wort Gottes ist ganz lauter vnd
rein.

Deut. 4. et 12.

Es kann menschen wort nit leyden ge-
mein.

Matth. 15.

Was an Gottes wortten nicht ist ge-
grund.

Rom. 14. Ecclesiast. 17.

Das ist eittel gewel vñ stinckende sünd.
zu

Zu dienst J. Alexandern von Helmstatten.

Das wort Gottes ewig bleibt/	Esa. 40.
Damit die welt iren spott treibt/	Matth. 24
Wil kläger sein denn Gott selbs ist/	
Leugt vnd treug zu aller frist/	1. Cor. 2.
Tracht nur vff nutz/ gut vnd gelt/	
Veracht alles was Gott wol gefelt/	Psal. 115.
Darumb auff sich lädt Gottes zorn/	Psal. 94.
Den er im grimme hat geschworn/	Rom. 1.
Das keiner komm zu seiner rhue/	Heb. 3. 4.
Der nit nach seinem willen thue/	
Allein in seinem wort bekant/	
Menschen wort ist ein lautter tant:	Matth. 15.
Wer sein heyl darauff thut setzen/	Collos. 2.
Der wird sein seel hart verletzten/	Esa. 5.
Werffen in leyden angst vnd not/	Prouerbe
Darzu in den ewigen tod.	14.
Darumb lug für sich jederman/	
Die welt nicht mehr denn liegen kan/	Rom. 3.
Erhebt jr ding/ macht groß geschrey/	
In betrug/ falscheit/ gleißnerey/	
P üñ Kein	1. Iohan. 2.

- Iohan. 14. Kein glaub / kein lieb im hertzen ist /
 Was sie treibt / sind böß Teufels list /
 Zu verderbnuß aller frommen /
 Daß sie nit zum leben kommen /
 Iohan. 6. Welchs vns Christus erworben hat /
 So wir bleiben in seinem rath /
 Im glauben vnd gehorsam sind /
 Ephes. 4. Nit nachfolgen jeglichem wind /
 Der vns thut neben an blasen /
 Auß falscher leer der gottlosen /
 Marc. 16. Allein durchs Euangelion /
 Werden wir ewigs leben han.

N. X.

Summa

Summa des viij Capitels zun Hebreern.

Christus ist priester in ewigkeit / Caydt /
 Bestetigt mit Gottes geschwornem
 Nachordnung des Melchisedechs /
 Vnd mit des Leuitischē geschlechts /
 Er ist vollkommen vnd vnsterblich /
 Vertritt nun im himmel ewiglich /
 Vor dem Vater vns arme sündler /
 Als thut ein getrewer fürmünder /
 Gnugsam für sich selbs / eynig / alleins
 Hat er solchs ampt / mit keinē gemein.
 Davon auch Paulus bezeuget klar /
 Zum Timotheo ganz offenbar /
 Vnd Johannes der Apostel gut /
 In seiner Epistel schreiben thut /
 Welcher solchs nit glaubt / vñ habē wil
 Vff erden noch leiplich priester vil:
 Der gottsbotten schrift für lügen acht /
 Von dē heilgē Geist nit wol betrachte /
 Leugnet Christus ewigs priesterthum /
 Dadurch man allein zū Vater kompt /
 P v Dem

1. Thim. 2.

1. Ioan. 2.

Dem Edlen vnd Ernuet-
sten Alexandern von Helmstat/

wünsch ich Nicklas Keneysen / gnadt vnd
friedt von Gott dem Vater vnd
vnserm heilandt Jesu Christo.

Gnuetster G. lieber Juncker / nach
dem L. G. mir abermals ein be-
selch geben hat / mein gethane pre-
dig / vff den ersten sonntag des Aduents /
Anno 2c. xxviij. vffzuschreiben / vñ L.
G. ein Copey dauon zu geben / damit sie
nicht in vergeß gestelt werde / vñ
vmb besserer erfahrung willen d̄ warheit /
Bin ich willig in dē / wie auch vormalt /
L. G. mein armē dienst zuberweisen. Vñ
wolt Gott / die warheit wurde recht er-
kant / hoff auch Gott sol sein gnade dar
zu verleychen. Nun aber hab ichs nicht
darnor / das es L. G. meinung sey / das
die Epistel zu den Hebreern / in einen ver-
geß gestelt möge werdē / den sie im newē
Testament / vñ in allen Biblen geschri-
ben ist / darauff auch der grundt meiner
predig stehet / welche L. G. selbst person-
lich gehört hat / acht es sey verhalten n̄
vonnötte daß ich den selbigē Text (wel-

eben auch ein jeglicher selbs wol in seinē
 Buch lesen kan) Sampt andern neben
 eingefürte historiē d̄ heiligē geschriffte/
 alhie beschreibe: Sonder allein die ord-
 nung/so ich bey dē Text gehalten vñ den
 beschluß so ich darauß erfolgt habe (da-
 ran L. G. vñlleicht am allermeistē gele-
 gen ist) Wil ich in einer sum̄a anzeigen.
 Vñ ob ich schō nit alle wort in aller ord-
 nung/form/weise/vñ gestalt/wie sie da-
 zumal geredt sind/erlangē mag (welchs
 mir auch vñmüglich ist) od̄ so ich den
 handel/etwz weitläuffiger erklere/so ich
 doch d̄ sachēmeinung an ihr selbst kein
 abbruch thue: hoff ich L. G. sol mir
 niches für vngut haben / vñ vngeserlig
 sein. Wo ich L. G. hiemit kein genügen
 thue / bin ich vrbütig / mich ferners zwer-
 klere/vñ mit d̄ hülff Gottes/meiner pre-
 dig auß d̄ heiligē geschriffte rechēschafft
 zugeben/ für euch/ für L. G. vett. rn/vñ
 auch sunst wo sich das gebüret/darvon
 gar kein a^lschewens tragen / so wenig
 als ich mich für Gott selbst fürchte.
 Wan ich Gottes wortten vñ der heiligē
 geschriffte nicht vertrawet/dz sie gerecht
 vñ d̄

vnd warhafftig weren / mich darbey
 forchtet / vnd nit bekennen wolt : Was
 kunt denn **L. G.** vnd alle fromme
 Christen menschen / von meiner predi-
 g halten : Darumb Ernuester lieber
 Juncker / vernem **L. G.** jezunde
 den handel offentlich in schrifftten /
 den selbigen nach **L. G.** gelegenheit
 den Gottsgelerten fürzutragen / zuer-
 messen / zuerkennen / nach dem wort Got-
 tes. Werde ich denn irrig erfunden / wil
 ich mich gern bessers weisen lassen / vñ
 von dem irumb abstehn. Bitt vmb
 Gottes willen / die andern wöllen solchs
 auch thun. Die gnade Gottes wölle
 ewer Ernuestigkeit / in fried vnd gesunt-
 heit bewaren.

Bff dem sibenden cap. zu
 den Hebreern / ist die
 Predig der massen
 gestanden.

In dem anfang ist ingefürt Genes.
 14. Cap. die historien vnd figur
 von dem priester Melchisedech /
 vnd

vnd von dem heiligen patriarchen Abra-
 ham / darbey angezeigt (wie der Text
 klar inhelt) daß Melchisedech / genant
 ein König der gerechtigkeit vnd des frie-
 dens / sampt seinem priesterthumb / vber
 trefflich höher vnd würdiger gewesen
 ist / den der hohe priester im gesetz Aa-
 ron vnd daß ganz Leuitisch priester-
 thumb / welchs vō dem Abraham kom-
 men ist / Auß der ursach / daß weder an-
 fang noch ende des Melchisedechs in d
 geschriffte gefunden wird / vñ figürlich
 ein ewigs leben hat. Item daß er den
 Zehenden von dem Abraham empfan-
 gen / vnd ihn gebenedeiet hat. Vom
 Abraham aber vnd allem seinem ge-
 schlecht / zeigt die schriffte an / anfang vñ
 ende / daß sie vnvollkomen / zerstörlich
 vnd sterblich gewesen sind. Item daß
 das Leuitisch priesterthumb (welchem
 der Zehend nach dem gesetz zugestan-
 den vnd geben worden ist) hat auch
 den Zehendē dem Melchisedech geben /
 vnd von jm die gebenedeiuung empfan-
 gen. Denn dazumal / da Abraham im
 den

den Zehenden geben / vnd die Benedelung empfangen hat / da ist daß ge schlecht Leui noch in seinen Lenden gewesen. Vnd gleich wie wir in Adams alle gesündigt haben: Also haben die Leuitischen priester alle in Abraham den Zehenden geben / vnd die gebenedeiung vom Melchisedech empfangen. Dar auß wird offenbar (wie zuor gesagt) daß Melchisedechs priesterthumb / ober trefflich höher vnd würdiger gewesen ist / denn das Leuitisch priesterthum. Also viel von der figur im anfang des /

7. Cap.

Diese figur deutet gar fein vff Christus vnsern hohen vnd ewigen priester.

Melchisedech ist ein figur / Christus ist die warheit.

Melchisedech wird genent ein König der gerechtigkeit. Ein solcher König ist warhafftig Christus vnser **SEKX.** Sein Reich aber ist nit von dieser welt / in eüsserlichem gewalt vnd herligkeit. Sonder es ist geistlich / innerlich / vnd vn sichtbar

unsichtbarlich. Er regiert allein im herzen vnd gewissen der glaubigen / mit Ephes. 6.
 mit einem eysern schwert / sonder mit dem schwert des Geists / das ist / mit dem wort des heiligen Euangelij vnd gnaden Gottes. Welcher mensch dem selbigen gehorsamt im glauben / der ist im reich Christi / vnd gerecht für Gott. Dem allein der glaub macht frumb vnd gerecht / hat auch allein stat vnd ansehen für Gott / derselbigen gerechtigkeit ist Rom. 8.
 Christus ein König / aber der Teufel ist Heb. 11.
 ein König der vngerechtigkeit / das ist / Iob. 41.
 des vnglaubens / vnd der gottlosen.

Melchisedech wird genant ein König Salem / das ist / ein König des friedens / Ein solcher König ist auch warhafftig vnser **HEX** Jesus Christus / aber nicht nach dieser welt / euserlich vnd zeitlich an leib vnd gut / Er gibe mit den frieden wie in die welt gibt / Johan. 14. Er ist nicht komen frieden zu senden auff erdtreich / sonder das Schwert / Leiden / Trübsal /
verfol

verfolgung / zc. Matth. 10. Luce. 12.
 Darvurch die glaubigen in irem mut-
 willigen alten Adam / vnd sündlichem
 fleisch gecreuziget / im glauben geübe
 vnd probiert werden / Rom. 5. 1. Pe-
 tri 4. Vnd in der geduldt ire seelen fassen
 mögen zū ewigē leben / Luc. 21. Act. 14.
 Christus ist ein König des innerlichen
 friedens im hertzen vnd gewissen / der
 die glaubigen mit seinem Geist sterckt /
 vnd zu frieden stelt / auch mitten in al-
 ler eüßerlichen verfolgung vnd ansecht-
 tung an leib vnd gut / wie vns in den
 heiligen Aposteln vnd Märterern fürge-
 bildet ist. Von diesem frieden sagt Pau-
 lus Philip. 4. Der fried Gottes / wel-
 cher vberschwebt allen sinnen / bewar-
 ewre hertzen vnd sinn in Christo Jesu /
 zc.

Melchisedech hat in der geschriffte
 weder anfang noch ende / sonder ein für-
 gürliches ewiges leben. Also Christus
 hat ein warhafftigs ewigs leben / vnd
 nach der Göttlichen natur / weder an-
 fang nach ende / Johan. 1.

Melchisedech

Melchisedech ist höher vñ würdiger /
 denn der heilig patriarch Abraham
 (welcher doch von Gott die verheißung
 empfangen hat) vnd sein ganz
 geschlecht / fürnemlich das geschlecht
 Levi (welchem das priesterthumb von
 Gott hernach im gesatz Mosis zugeeeyg-
 net ward) darumb von notwegen /
 Christus die warheit noch viel höher
 vnd würdiger ist / denn das geschlecht
 Levi / vom Abraham geboren. Auch das
 priesterthumb Christi / nach der ord-
 nung Melchisedech / vbertrefflich hö-
 her vnd würdiger ist / denn das Leui-
 tisch priesterthumb / nach der ordnung
 Aaron.

Melchisedech nimpt den Zehenden
 vom Abraham / vnd gebenedeyet ihn:
 Christus nimpt die volkomēheit Christ-
 lichen lebens vnd wesens / von den glau-
 bigen Abrahams Kindern / vnd gebene-
 deit sie ewiglich / Gal. 3. Genes. 22.

Nach dieser figur des Melchise-
 dechs / folgt im Text (Ist nun die vol-
 kommenheit durch das Leuitisch priester-
 thumb

thumb geschehen / 2c.) von diesem Text an / Biff zum ende des 7. cap. wird das hohe priesterthumb Christi gar fein vnd meysterlich beschriben.

Zum ersten / daß es ein volkommen gnadenreich priesterthumb sey / welches gnediglich durch den glauben rechtfertigt von sünden / vnd selig macht alle außserwelten / nit vnvolkomen wie das Leuitisch priesterthumb vnder dem gesatz Mosi gewesen ist / allein auß dem werckē des gesatz / welche keinē menschē haben können rechtfertigē / von sünden erlösen / oder selig machen / Rom. 3. Gal. 2. Darumb auch vonnöten gewesen ist / daß das gesatz Mosi / sampt dem Leuitischen priesterthumb / vffgehoben vnd verendert würde / Nemlich daß das ernsthaftig vnd erschrecklich grausam gesatz / verendert würde / in das frölich vnd freudenreich Euangelium der gnaden Gottes / Nit in das Decret vñ Decretal / menschliche gesatz / damit man Gott vergeblich ehret / Matth. 15. Darnach daß das vnvolkomen

nen Leuitisch vnd leiblich priesterthumb / verendert würde / in das volckomen geistlich priesterthumb Christi vnd aller glaubigen / nit in ein ander vnvolkommen eüserlich vnd leiblich priesterthumb / welches den die Pfaffen zu vnsern zeiten auß lauterem vnuerstand fürgeben / vnd sich des hochberümen / haben aber kein grundt / solchs ihres leiblichen priesterthumbs / in gantzen Neuen Testament.

Was vom priesterthumb vnd priesteren geschrieben stehet / 1. Pet. 2. Bawend euch zu einem geistlichen hauß / vnd zum heiligen priesterthumb / ꝛc. Darnach / Ihr aber seind das außerswelt geschlecht / das Königlich priesterthumb / ꝛc. Item Apocalips. 1. Er hat vns geliebt vnd gewäschet von sünden mit seinem blut / vnd hat vns zu Königen vnd Priestern gemacht / vor Gott vnd seinem Vater / Item Apocalips. cap. 5. Du bist erwürgt vnd hast vns erkauft mit deinem blut / ꝛc. Vnd hast vns zu Könige gemacht vnd Priestern

Q ij ꝛc.

Item Apocalips. 20. Selig vnd heylig ist der / der theyl hat an der ersten vff-
 ferstehung / vber solchē hat der and̄ tod
 kein macht: Sonder sie werden Priester
 Gottes vnd Christi sein / vnd mit ihm
 regieren tausent jar. Diese Sprüch
 vom Priestertum vñ Priestern (sacerdo-
 tiū vñ sacerdotes genant) gehn die Pfaf-
 fen nicht allein an für ihre personen (ob
 sies dannoch angehn) sonder alle Chri-
 sten menschen in gemein. Denn es je of-
 fenbar ist / daß der heilig Petrus sein
 Epistel nit den Pfaffen zugeschriben
 hat / sonder allen Christen. So deuten
 die sprüch in der heimlichen offenbar-
 rung klarlich vff alle Christen mensche.
 Zu dem / was sonst hin vñ her von Bis-
 schoffen vnd Priestern geschriben ist /
 als in der Apostel geschichten / 20. cap.
 Da Paulus die Eltisten (Presbyteros) zu
 Epheso beschickt hat / vnd also zu inen
 geredt: Habt acht vff euch selbs / vnd
 vff die ganzen herd / vnder welche euch
 der heilig Geist gesetzt hat zu Bischoff-
 fen / zu weiden die gemeine Gottes / wel-
 cher

Ob er durch sein eigen Blut erworben
 hat / 7c. Dergleichen was von Bischof
 fen geschrieben ist / in der ersten Epistel
 Pauli zum Thimotheo 3. cap. Item
 von den Kliften (Presbyteris) in der
 Epistel zum Tito. 1. cap. geht sie auch
 nicht an. Denn Episcopi vnd Presbyteri /
 heissen nicht HERN vnd Meslefer: Son-
 der sie heissen wächter vnd Kliften /
 das ist / feine / Erbare / Gelehrte Leut /
 die ober das Christen volck sollen wa-
 chen / sorg tragen / vnd weyden mit
 dem wort Gottes / wie 1. Petri. 5. cap.
 geschrieben steht : Weydet die herde
 Christi die vnder euch ist / vnd verschet
 sie nit genöthigt / sonder selbs willig / nit
 vmb schandliches gewins willen: son-
 der auß geneigtem gemüth / nicht als
 die herrschendt ober das Erbe / sonder
 werdet ein fürbild der Herde / 7c. Es be-
 zeugt auch das geistlich Recht (s. q. 1.
 Cano. Qui Episcopatum &c.) Das ein Bi-
 schoffs Namn / sey ein Namn der Ar-
 beyt / vnd nicht ein Namn der würdig-
 keit / vñ seind die wort S. Augustini 7c.

Sie seind die / die dem volck solten
 fürgehn / in guten sitten / vnd in einem
 rechtschaffenen Christlichen leben / wie
 1. Timo. 3. sie der heilig Paulus zum Timoth. vnd
 zum Titto / 1. gar fein beschreibet. Ein
 Bischoff sol vnsträfflich sein / allein
 eines weybs Mann / nüchtern / züchtig /
 sittig / Gastfrey / leerhaffig / nit weins
 süchtig / zc. Diese heysen nicht ihres
 Ampts halben (Sacerdotes) Priester.
 Denn / wie vor gesagt / diesser Nam
 gehört nicht sonderlichen personen zu
 im Newen Testament: Sonder ist ein
 gemeyner Nam aller Christglaubigen
 menschen / welche alle Geystlich Priester
 seind in Christo dem **HERRN** /
 zc. Sie heysen aber (Episcopi, Presbyteri)
 Bischoff vnd Aeltesten / das ist wächter
 des volcks / vnd diener des worts
 Gottes / 1. Cor. 3. Wer ist Paulus?
 Wer ist Apollo? Diener seind sie durch
 welche ihr glaubig seind worden. Item
 1. Cor. 4. Darfür halt vns jederman
 nemlich für Christi diener / vnd haus
 halter vber Gottes geheymnis. *Summa*
 Alle

Alle Christen seind (sacerdotes) Priester:
 Aber alle getrewe vorgenger des volcks
 vnd verkünder des heiligen Euangelij:
 die seind (Episcopi, Presbyteri) Bischoff/
 vñ Altisten / nach inhalt des newen Te-
 staments.

Von den Messleseren / vnd Vigilien-
 sengern / ꝛc. (welche wir Priester
 nennen) weiß die heilige schrifft nichts
 zu sagen / darumb auch die verenderung
 des Leuitischen priesterthumbs Hebre.
 7. Cap. angezeigt / in keinen weg / vff
 vnser Pfaffheit mag verstanden wer-
 den / denn die verenderung nicht leib-
 lich / sonder geistlich geschehen ist / vff
 Christum vnd alle glaubigen menschen.
 Daß aber vnser Pfaffheit ein andere
 verenderung selbs erdicht hat / das laß
 ich sie nach ihrer weyse verantworten
 auß dem Decret vñ Decretal. in der Bi-
 bel finde man nichts dauon vberal.

Also sagt vnser Epistel / von der
 verenderung / daß Christus nicht sey
 auß dem geschlecht Leui : Sonder
 auß dem geschlecht Juda kommen.
 Q. iij. R.

Er sey auch nicht Priester worden nach der ordnung Aaron: Sonder nach der ordnung Melchisedech. Da da steht die verenderung ganz vnd gar / damit nichts anders wird angezeigt / den Christus sey der wahre Messias von Gott verheissen / vnd ein vollkommener gnadenreicher Priester / der vns ewig vor dem Vater vertrette / warhafftig verzeyhung vnserer sünde / gnad vñ Barmherzigkeit von Gott erlange / welches das Leuitisch priesterthum nach der ordnung Aaron zu thun nicht vermöcht hat. Den wo es solches vermöcht hetten: So wer es nicht vonnöten gewesen / daß Christus ein Priester nach Melchisedechs ordnung kommen were. Sibe da hört man gar nichts von solcher verenderung / die vnser Pfaffheit angehen / oder belangen möge: Der Text ist klar genug / so man in sunst gern recht verstehn wil.

Zum andern / sagt der nachfolgende Text / daß Christus priesterthumb in Ewigkeit sey gemacht / nach der krafft des

des vnendlichen lebens / vñ nicht nach
 dem gesatz des fleischlichen gebots /
 welchs zeitlich vnd vergenglich war.
 Das bezeugt er mit dem psal. 109. Du
 bist priester in ewigkeit / 2c. Dieweiles Rom. 9.
 nun ewig ist / dardurch das zeitlich gesatz
 vmb seiner schwachheit vnd vn-
 nutz willen ist vffgehoben / so muß es
 auch ewiglich wehren / vnd gelten vns
 für Gott zu versöhen / also daß im kein
 anders neues vnd zeitlichs priester-
 thumb mag nachfolgen : folgt im aber
 ein anders nach / so muß es nichts geltē /
 vn nutz vnd vergeblich sein. Ja vil vn-
 nützer vnd vergeblicher den das Leui-
 tisch priesterthumb / welches dannoch
 von Gott ein zeitlang eingesetzt vnd ein
 figur des zukünfftigen ewigen priester-
 thumbs Christi gewesen ist. Aber das
 gegewertig neue zeitlich priesterthum /
 mag kein figur sein : Denn es folgt im
 kein anders warhafftigs vnd ewigs
 nach vber das erst / ewig / warhafftig
 priesterthumb Christi / welches einmal
 nach gefolgt ist dem Leuitischen priester
 thumb /

thumb / vñ nun fürter ewig bleybt. So hat auch nun das new zeitlich vnd leiblich priesterthumb kein klare aufgetruckte gezeunuß von Gott / in der heiligen geschriffte / wie kan es den gut vnd nutz sein zu der seligkeit? Summa wo das vollkommen vnd ewig ist / da bedarff man des vnuolkommenen vnd zeitlichen nichts.

Zum dritten / sagt der Text / daß Christus priesterthumb allein vnd einig sey / darzu vnwiderrüfflich / bekräftigt vnd bestetigt / durch einen geschwornen Aydt Gottes / vff daß alle Christglaubigen menschen / bis zum ende der welt / allein durch Christum ein ungezweyffelten vnd sicheren zugegang haben sollen zu Gott / vnd durch keinen zeitlichen oder sterblichen Priester. Psal. 109.

Der HERR hat geschworn / vnd wird ihn nicht gerewen / das ist / er wirdt ewig nicht mehr endern / Du bist Priester in ewigkeit / ꝛc. Diese wort werden offft vnd viel in der Vesper gesungen

lungen vnd gelesen / aber fast vbel ver-
standen / wie sie denn verstanden sollen
werden / nach des heiligen Geists mey-
nung in vnser Epistel / da sie allein vff
Christum gezogen werden / wie auch
derselbig Psalm klärlich ausdruct / da-
rin sie geschrieben stehn / ꝛc.

Folgt im Text / Ihener seind viel die
Priester wurden / ꝛc. Dieser aber (Chri-
stus) darumb daß er bleibt ewiglich /
hat er ein vnvergenglichs Priester-
thumb / vnd lebt immerdar vns zuver-
dretten. Sie merckt mit fleiß / Er ist
allein / ein einiger vnd ewiger Priester
aller Christen menschen / wie auch Pau-
lus 1. Timoth. 2. Sagt / Es ist ein Gott /
vnd ein Mittler zwischen Gott vñ dem
menschen. nemlich der mensch Christus
Jesus / ꝛc. Vnd / 1. Johan. 2. Wir habē
ein fürsprechen für Gott Jesum Chri-
stum / den gerechten / ꝛc. Ist das war?
Daß Christ⁹ das Priesteramt vff sich
selbs allein genommen hat / alle aufferwel-
ten glaubigen mensche zuuertreten / vñ
zuuersönē ewiglich für seinē himlischen
Vater?

Vater: Wo zu seind jnen denn die zeitliche
 chen Priester nutz? Ja wie kan sich ein
 armer / sterblicher / bresthafftiger vnd
 sündlicher mensch vff erden / als ein
 Priester / mittler / fürsprecher fürstellen
 zwüschen Gott vnd dem menschen /
 daß es dem eynigen / ewigen priester
 thumb Christi / vnd dem geschwornen
 Aydt Gottes nicht nachtheylig sey? Für
 war wil man die sacht recht ansehen /
 vnd Christlich betrachten / so ist es nicht
 so ganz ein schlechter handel mit der
 Pfaffheit zu vnseren zeiten als man wil
 wenen. Die grosse menge / daß ihr viel
 seind / vnd die langwirige gewonheit /
 helffen nit / sie können auch darmit ihr
 gewissen vor Gott nit verthedigen / sie
 keren sich gleich vff welche seiten sie
 wollen. Vff der einen seiten haben sie
 kein Gottes wort: Vff der ander seiten
 ist Gottes wort stracks wider sie.
 Denn sie können nicht Priester sein nach
 Melchisedechs ordnung / den Christus
 ist allein vnd kein anderer. So können
 sie auch nicht Priester sein nach Aarons
 ordnung:

ordnung: denn sie sein nicht von dem
geschlecht Levi / Darzu hat dasselbig
priesterthumb vffgehört vñ ein end ge
nommen. So können sie auch nicht Prie
ster sein nach Christus ordnung: denn
dasselbig priesterthumb ist nicht leib
lich (wie sie sich fürstellen) sonder geist
lich / begreiffet alle Christen menschen
ohn vnderschiedlich / bedarff auch kei
ner leiblichen salbung: Sonder es hat
die salbung des heiligen Geists / 2. Co
rinth. 1. vnd 1. Johan. 2.

Über diese drey ordnung des priester
thumbs / findet man sunst keine andere
göttliche Priesterordnung in der gan
zen heiligen schrift. Denn die Priester /
welcher die schrift sunst an andern or
ten gedencft / als / 1. Reg. 12. Da der Kö
nig Hieroboam Priester verordnet hat /
bey den gulden Kelbern in Bethel vnd
Dan. Item / als die Propheten Ba
al / zu Achabszeiten / 1. Reg. 18. Item
als die Priester Bel / zu des Propheten
Daniels zeiten / Dani. 14. Vnd 8 gleichen
mehr / die sind nit von Gott verordnet /
sonder

sonder abgöttische Priester gewesen
 Darumb ihre ordnung vnsern Priestern
 nit dienstlich ist / sich damit zubeschir-
 men / haben also kein Gottes wort in 6
 heiligen geschriffte / das etwas klerlichs
 austruck / von der ordnung ihres leib-
 lichen Priesterthumbs.

In geistlichen rechten stehet wol viel
 von irer ordnung geschrieben / auch von
 iren personen vñ wirdigkeit / Bischoff/
 Probst / Dechant / Canonicus / Vicari-
 us / Pfarherr / Srümesser / Caplahn / 7c.
 Es ist aber ohn Gottes wort / eyttel
 menschlich vnd eigenutzlich erdicht
 ding. Da weihet man keinē zū Priester/
 er sey wie from vñ gelert erwölle / er habe
 denn ein pfründ oder titel / Dist. 70. Cano.
 Neminem absolute, & cano. Sanctorū Canonam
 Suchs im geistlichen rechten. Darnach
 wolt ieglicher gern die beste pfründ ha-
 ben / vnd der höchst daran sein / ja sie
 wöllen sich an einer pfründ nit benüge
 lassen / sie haben gern viel / 7c. Da
 zancft man sich vnd hadert drum (O
 ein Christlicher handel) zu letzt gehet
 man

man zu Cohr / man singet vnd liest nit
 lauter vmb Gottes ehr willen: Son-
 der auß bezwang ihrer eygen ordnung/
 vnd auß forcht der oberhern. Item
 daß man Corpus beneficij / vnd die Pres-
 senz verdienen möge: Sunst künde
 man des Cohrgangs / Singens / vnd
 Messens / wol müßig gehen / vñ ge-
 rahen. Sie wissen selbs das es war ist.
 Auch ligt es so klar am tage / daß es nit
 geleugnet mag werden.

Solche ordnung vergleicht sich nun
 gar nit mit Gottes wort / vnd mit dem
 heiligen Euangelio / welches von dies-
 sen dingen allen gar nichts weiß / so ha-
 ben die Aposteln / vnd die ersten aller
 frombsten Christen / mit solchen din-
 gen nie zuschaffen gehabt / sie haben
 keinen Bischoff erkandt / denn welcher
 Gottes wort geprediget vñ gelehret hat/
 der ist ein Bischoff bey jnen gewesen /
 vnd sunst keiner. Diaconi sind gewe-
 sen diener der armen leut / Act. 6. Des-
 chent / Canonici / Vicarij / Frümme-
 ser / Caplahn / Lantsbischthumb /
 stiffe

Stifte / Klöster / Clausen / 2c. mit guten
 Zinsen / Renten / Gültten versehen / dar
 auff man grösser fleiß hat / denn vff
 Gottes dienst / sind den ersten heiligen
 frommen Christen unbekandt gewesen /
 als / von denen Christus nie gered oder
 etwas befohlen hat / dauon man auch
 in der heiligen Bibel mit einen Buchsta
 ben findt. Darumb muß es von den men
 schen nachfolgender zeit erdicht / vñ also
 verordnet sein. Nun ist es aber gewiß
 auß den Worten Christi / Matthei 15.
 cap. daß man mit menschen sagen
 gen / ordnungen / gebotten / vñ lehren
 Gott vergeblich dienet / vnd im kein
 wolgefallen thut / mit allem dem / das
 in seinem wort nit gegründt ist / man
 treibt nit mehr denn gleißnerey damit /
 wan es auch am aller besten ist / vñ ver
 spottet Gott den **HERRN** / wie der
 Pharisæer / von dem Christus / Luc. 18.
 saget. Man sihet nit mehr / den daruff /
 was menschlicher vernunfft / klugheit /
 weißheit / vnd gutduncken gemess ist /
 vnd ansehens hat für der welt. Das ist
 aber

aber alles ein greuel / vnd vermaledeiet
für Gott / Luc. 16.

Darumb werde Priester oder pfaff/
nach menschlicher weiß vnd ordnung
wer da wil / so mag es keiner mit gutem
gewissen werden oder sein / der Gottes
wort von hertzen vertrawet vñ glaubt:
dieweil solch Priesterthumb / ein lan-
ter menschen gedichte ist / daruff sich
kein recht Christen hertz grunden kan.
Darnach auch / daß es dem gnaden-
reichen / vollkommenen / einigem / vnd
ewigem priesterthumb Christi / mit
dem geschwornen eydt Gottes bekräf-
tiget vnd bestetiget / zu wider ist / wel-
ches dardurch verlegnet muß werden /
wie oben angezeigt / vnd auß der Epi-
stel zu den Hebr. offenbar wird. Also
thun die nit vnrecht / die solch mensche-
lich erdicht priesterthumb vnderlassen /
oder danon abstehen / ob sie schon die
welt für buben helt / da ist nichts an ge-
legen / Gott weiß welcher der frömbst
ist. So sithet man auch wol / wie ein
Erbares leben ihr viel führen / die die
K andern

andern für Buben vrtheilen / vnd auß zu
schreien bereidt sind. Man darff nit
viel darvon reden / man thue nit mehr
den die augen vff / so wird mans sehen.

Ja wer augen hat zusehen der sehe /
vnd wer ohren hat zu hören der höre /
Wird jemandts der rechten strassen she-
len : darff er für war Gott kein schule
geben. Denn alles was Chrißlich vnd
recht ist : das ist vns durch Chrißtum
vnd seine Aposteln volkornlich gesagt /
vnd vorgeschrieben : alles ander / gehet
die Chrißten nichts an gegen Gott. Also
auch das eisserlich vnd leiblich priester
thumb / dauon man im gantzen newen
Testament nit ein buchstaben findt.

Das aber etwan vorzeiten / die Do-
ctores viel vñ diesem eisserlichē priester
thumb geschrieben / vnd gelert haben /
auch ihr viel selbst solche Priester gewe-
sen sind : das thut nichts zu der sach / da
mit etwas zu verantworten. Denn inen
ist nit beßholen gewesen / dem wort Got-
tes / nemlich dem Euangelio Chrißti /
vnder dem sie sich Chrißten behümbe
habent.

haben/ etwas zu oder ab zuthun / sondern das selbig lauter / nach seiner rechten art predigen vnd lehren / welches sich bey diesem priesterthumb nit befindet / von ihnen geschehen. Der Text ist klar für augen / vnd lest sich nit verbergen / so mag des heiligē Geists meisterschafft auch nit weichen vnd stat geben / ihrer meisterschafft. Die Apostel sind ja gelehrter gewesen / den alle die / die je docter vnd meister geheissen sind worden / da bey laß man es bleiben / menschliche kunst gilt nichts in dieser sachen.

Solchs alles wird nit darumb geredt / daß man das volck vff die Priester verhetz / vnwillen / vnd feindschafft anzurichten: Mein lieben freund / man sol den Priestern nit feind sein / man sol inen auch mit leidts thun / denn sie auch zum größern theil der sachen vnschuldig vnd vnwissend darzu kommen sind: wollen wir rechte geschafften Christen sein / so sollen wir brüderlich mitleiden haben / Gott für sie bitten (ja wan sie schon vnser feind wehren) daß er sie

R ij mit

mit dem lichte seiner göttlichen gnaden
erleuchten wöll / vff das sie die warheit
lernen erkennen / von dem irthumb ab-
stehen / vnd für die handt nehmen / was
dem heiligen Euangelio gemess / Christ
lich vnd recht ist.

Darumb wird aber solches gepredia
get vnd geredt / das die Christen mens-
schen / ihren rechten / Einigen / Erwa-
gen Hohenpriester vnd Bischoff ier
seelen / iren versöner / mirtler vnd fürs-
sprecher im himmel für Gott / recht ler-
nen erkennen / allein vff ihn al ihr ver-
trauen / zumer sicht vnd hoffnung setze /
vnd nit vff menschen larwen / denn alle
menschen sind vngerecht vnd lugner /
aus der lehr des Propheten Davids /
vnd des heiligen Pauli / allein Gott ist
gerecht vnd warhafftig. Darumb wels-
cher vff menschen vñ menschengedicht
sein vertrauen setzt : Der samet sein sel-
igkeit vff vngerechtigkeit / vnd vff lü-
gen / vñ ist vor Gott vermaledeit. Hiere.
17. Welcher aber Gott vnd seinem wort
glaubt vnd vertrauet : Der samet sein
seligkeit

seligkeit vff gerechtigkeit vnd warheit/
er ist gebenedeyt / vnd wird selig / das leh
ret vns alle geschriffte / ꝛc.

Gott verleihe vns seine gnad / Amen.

Summa Summarum.

Die Christen menschen haben kein
zeitlich Testament / Tabernackel / Altar /
Sündopffer mehr vff erden / Hebre. 8.
Darumb bedörffen sie auch keines zeit
lichen vnd leiblichen priesterthumbs
mehr vff erden / Alle ding sind nun him
lisch / geistlich / vnd ewig / in Christo /
vnd durch Christum erfüllet. Welcher
mensch im daran nit lest gnügen : son
der alle solche ding widerumb new /
zeitlich vnd leiblich vff erden anricht
zu der seelen heil : der verleugnet offent
lich (inhalt der geschriffte) Christum /
sein himlisch / einig vnd ewig priester
thumb / auch das opffer welches ein
mal geschehen ist für die sünd der welt /
darnon in den nachfolgenden / 9. vnd
10. cap. zu den Hebreern.

R iij Allein

1. Timo. 1.

Allein Gott die ehr.

Rom. 3.

Menschen sind lügner.

Matth. 5. Recht Christen verachtē gleyßner thors
 Iohan. 4. heit/

Philipp. 3. Sie betē Gott an im Geist vñ warheit.
 Iren Bauch beten an Baals Pfaffen/
 Mit Gott habē sie nit viel zuschaffen/
 Ohn feist pfründen/ faultag/ vñ guths
 leben/

Wil niemands Pfaff sein/ nach gotts
 dienst streben/

Solchs gibt ware kundtschafft zu aller
 frist/

Das Pfaffenwerck nichts den gleyßner
 rey ist/

Man laufft gen Rhom/ dient Pabst/
 Bischoff/ Cardinall/

Auch anderen Lehenhern vberall/
 Man schenckt/ man kaufft/ dreibt sel-
 zam hantirung/

Mit rauschen/ tauschen/ vnd permiss-
 irung/

Man

Man wird Mönch / Nonnen / in Klö-
 stern / Clausen /
 Globt fälschlich groß ding / thut Bue-
 ten lausen /
 In farben regeln / orden / mancherley /
 Als sey der Christē glaub ein dyrdendey /
 Man leucht / singt vnd liest / nacht /
 tag / frū vnd spat /
 On verstandt / geist / glauben / treibt lau-
 tern spott.
 Ist solchs Gott ein ehr / so ist sein wun-
 der /
 Vnd schlag darin blitz / hagel vnd don-
 ner /
 Anderst kan mā die sach nit verblümē /
 Was Gottes wort verdampft / kan nies-
 mands rhümen /

Der Papisten stande
 Ist Gott unbekant /
 Betreugt leuth vnd lande /
 Fürcht kein sünd noch schand.

ERRATA.

Folio 21. l. 23. ein solches. f. 21. l. 9. so nach
f. 24. l. 20. den armen f. 35. l. 7. zu niessen
f. 40. l. 13. noch der zeit f. 56. l. 1. gewarnt
habe f. 60. l. 23. im Brod f. 74. l. 2. et 3. ntesen
wir sie f. 98. l. 21. geehret f. 103. l. 5. glauben/
welcher f. 106. l. 21. den wird f. 118. l. 2. hilff
f. 117. l. 5. ablas hilff f. 128. l. 25. wol gefallen
f. 130. l. 10. niemands denn f. 132. l. 22. wie
möchten denn f. 135. l. 21. der heilig Petrus
f. 140. l. 2. dem rath f. 176. l. 2. Messen ist
f. 179. l. 1. Bacchum f. 186. l. 21. opfer/ einig
in f. 206. l. 10. nach irem f. 207. l. 16. des heil-
ligen Geists f. 217. l. 6. mit außgestreckten
f. 221. l. 11. So oft jr Messhalter f. 231. l. 4.
Zeiget vnd treigt f. 240. l. 25. anfang noch
ende.

FINIS.